

JOACH. JUSTI BREITHAUPT,  
S. Theol. D. & P. P.

DE

PERFECTIONE

PARTIUM

TRACTATIO

THEOLOGICA.




---

EDITIO SECUNDA.

---

HALÆ, LITTERIS ORPHANOTROPHII,  
ANNO MDCCCV.

CPM PRIVILEGIO.



DEACON THEOPHILUS

2. Theol. D. & P. T.


DE

THEOLOGICAL

PARTIAL

TRACAT

THEOLOGICAL



THEOLOGICAL  
LIBRARY  
AND  
MUSEUM



**VIRO**

*Plurimum Reuerendo atque Am-  
plissimo,*

**DOMINO**

**ANDREAE REINBECCIO,**

**PRÆPOSITO AC SUPERINTEN-  
DENTI LYCHOVIENSI MERI-  
TISSIMO,**

**PATRI SUO OMNI AMORIS AC  
HONORIS PIETATE PRO-  
SEQUENDO,**

*Salutem obsequentissime  
dicit*

**filius obedientissimus,**

**RESPONDENS.**





## *Venerande Parens !*

**Q**uam de Perfectione dissertationem vides, trado Tibi, ceu documentum pietatis in Te meæ publicum. Cui enim Theologicarum exercitationum specimen dicare satius sit, quam Patri amantissimo? cujus animo in me patrio, ac cura singulari, nihil mihi est prius, nihil antiquius. Taceo jam innumera beneficia, quibus me inde usque a primis incunabilis cumulatisime fovisti, ne, si ea non animo tantum grato recolam, sed etiam solennius enarrem, in modestiam peccare videar. Hoc saltem pace Tua dixerim: quum Te, per Dei gratiam, utar Patre tam facili pariter ac pio, hoc est, optimo, obstrictum me judicaui, ut, occasione data, quovis modo meam Tibi reuerentiam exhiberem. Accipe igitur, Pater longe carissime! quam offero dissertationem; & ita accipe, ut, quod facis, Teque semper facturum spero, me in posterum etiam paterne complectaris, nec desistas precibus a Deo contendere, ut quam defendo liberati arbitrii integritatem, ipsemet intra me tuear ac seruem, adseruem, conseruem. Ille ipse Deus Te Ecclesiæ & familiæ nostræ, spiritu & corpore integrum, sospitet diutissime! Dabam Halæ d. IIX. Cal. Sept. a. M DCC III.





## DE PERFECTIONE PARTIUM.

*Quod illa Stantium sit propria, & quidem sine exceptione mandati primi aut ultimi.*

### CAP. I.

#### QUAESTIONIS STATUS EXPLICATUR.

##### §. I.



**V**T distincta causæ totius de *Perfectione* pateſcat ratio, clauem optimam quærentibus, reperire licet apud **CHEMNITIUM** Locor. Theol. part. II. de lege Dei; ubi cap. III. agitur de *perfecta obedientia*, quam lex requirit, & cap. II. de *impletione Decalogi*, quomodo fieri possint, quæ præcipiuntur. Id enim utrobi- que agitur, & demonstratione ex Scripturis sacris, & illustratione ex Historiarum Ecclesiæ Antiquitatibus, ne, vel ἀναμαρτυρία, *totalis* a peccato immunitas, vel ἀδυναμία, *nouæ integritatis impossibilitas*, contra veritatem, verbo Dei traditam, renatis, seu vere conuersis, tribuatur.



*Principio, inquit CHEMNITIUS cap. III. §. 5. Hieronymus, cum ipsi objiceretur (Anathemasit, si quis dixerit, Deum præcepisse impossibilia) simpliciter respondet libr. 2. Dialog. adversus Pelagium: Sunt impossibilia naturæ, sed possibilia gratiæ. Et Augustinus etiam in primo conflictu cum Pelagianis, in multis locis ita locutus est: Gratia sanat voluntatem, ut voluntas sana impleat legem. Postea vero Cœlestius, Pelagii discipulus, arripuit illud axioma, & cœpit spargere illam sententiam: Ergo homo, licet non possit naturalibus liberi arbitrii viribus legi perfecte satisfacere, potest tamen, accepto Spiritu renouationis, perfecta obedientia implere legem, ita ut sine peccato esse possit; quia, quando quis satisfacit legi, quando non est reus in aliquo mandato Dei, quando lex non potest accusare aliquid in homine, &c. tunc est sine peccato, quia peccatum est à voluntate. Ibi Augustinus coactus est diligentius scrutari testimonia Scripturæ de hoc Articulo, & explicatius tradere hanc doctrinam: quod scilicet etiam renati, qui aguntur Spiritu Sancto, non possint in hac vita pervenire ad illam perfectionem, quam lex requirit; sed electos eam habituros primum in vita futura. Conf. Exam. Concil. Trid. de bonis operibus, sub finem.*

*Ex quibus intelligitur, Patres orthodoxos, ante Pelagianorum hererodoxias, SIMPLICITER, de lege per Spiritus Sancti gratiam implenda, & absolute locutos esse: deinde autem Augustinum, peruersis Cœlestii interpretationibus adactum, inuestigasse distinctius, quomodo homines legi ne ipso quidem regenerationis spiritu perfecte satisfaciant, sed altera Christi gratia, quæ remissionem peccatorum contrito corde credentibus confert, id præstet unice; id quod in Locis*



cis Theol. cap. III. de Lege apud Chemnitium prolixè docetur; nec non, quomodo nihilominus vera quædam legis *impletio inchoata* ipsis fidelibus relinquenda sit, ne turpiter prolabamur eo, ut utraque gratia, & *justificationis & renouationis*, diuerso & *sensu & effectu* agnoscenda, permanere salua atque integra nequeat. Quo de periculo, euitando in utramque partem, dignissima consideratu sunt, ibidem cap. IIX. quæ verbis sequentibus commendantur..

*Est UTRUMQUE verum, QUOD IMPOSSIBILE ERAT LEGI &c. Rom. IIX.3. & ut JUSTITIA LEGIS IN NOBIS IMPLERETUR, QUI SECUNDUM SPIRITUM VIVIMUS &c. ibid. v. 4. Et in SINGULIS præceptis hæc doctrina diligenter inculcanda est: & QUOMODO LEX SIT IMPOSSIBILIS, ET QUOMODO IMPLETIONEM EJVS HABERE POSSIMVS.* Ultrique enim PERICULOSE, & sæpe non ex IGNORANTIA, sed ex PETVLANTIA erratur. Pharisei, quia scriptum est Ezech. XXXVI, 37. *Faciám, ut in præceptis meis ambuletis: fingunt, se posse singulis præceptis PERFECTA obedientia satisfacere.* Epicuri, quando audiunt: *Neminem in hac vita posse legi Dei perfectæ obedientia satisfacere; hoc velamine excusant omnes lapsus contra conscientiam, & fingunt, credentes nihil nec posse nec debere in mandatis Dei seruare.* Sed hoc SOMNIVM æque falsum est, ac Phariseorum DELIRIVM. Manifesta enim sunt Scripturæ sententiæ de renatis: Ezech. XXXVI, 27. *Faciám, ut in præceptis meis ambuletis, Jer. XXXI, 33. Scribam legem meam in corda eorum.* Rom. IIX, 4. *Vt justitia legis impleatur in nobis.* Rom. III, v. ult. *Per fidem lex non tollitur, sed stabilitur.* Diligenter igitur in SINGVLIS præceptis ostendendum est, quomodo & quatenus lex sit vel impossibilis, vel possit impleri. Et distinctim dicendum est de renatis, & non renatis.

§. II. Renatos dicimus STANTES, ut questionis subjectum sine ambiguitate ponamus. Stantes vero



dicuntur illi adulterum inter Christianos, qui non tantum olim, ut infantes, regenerationis per Baptismum participes facti, sed a lapsibus etiam, rationis usu commissis, quibus regenerationis gratia excussa fuerat, vera conuersi pœnitentia, gratiæ *justificantis* & *sanctificantis* compotes sunt reddit.

Accedit & hæc ratio; quod ipsa *partium perfectio* denominationem suam acceperit a *legis partibus*, quatenus hæ intra hominem *per Fidem* instauratæ ac *stabilite* existant. Rom. III, 31. Neque enim de ullis Conuertendis, licet verbi efficacia *præueniente* ad pœnitentiam ac *fidem* excitentur, *ut talibus*, Perfectio partium dici potest: nam luctantur isti adhuc ante *justificationem*, necdum *partibus* superandis & reficiendis integre consistunt. Simulac vero *gratia* ita fuerit *operans*, ut *fides* secundum omnes legis partes *victoriam de mundo* obtineat, 1. Joh. V, 4. opusque Conuersionis sic compleatur; ex eo ipso *actu* incipit *status* gratiæ, qui demum *stantes fideles* efficit. Unde consequitur, tantum momenti in hac quæstione versari, vt, negare partium perfectionem, nihil sit aliud, quam negare, quod in Ecclesia dentur Fideles veri seu stantes, h. e. homines vere ad Deum conuersi; ceu pluribus patebit infra.

§. III. Quando ergo de Stantibus renatis quæritur, an iis assignanda perfectio aliqua; confestim observamus, aduersus *Scholasticos Pontificios*, Pelagianorum vestigia, si non tenentes, certe sua ex parte imitantes, a Theologis *Protestantibus* vsum distinctionis, inter *GRADVVM ET PARTIVM PERFECTIIONEM*, adhibi-

tum



tum esse. Quum enim omnis perfectio de Fidelibus negari posse haud videretur, præsertim vrgentibus eam tot Scripturæ Sacræ locis; *Romanenses* autem, pariter ac Pelagiani, sine justo discrimine ipsam propugnarent, confusionem isthanc (*indistinctas generalitates* vocat eam *Chemnitius in Exam. Conc. Trid. de B. operibus*) munientes sacris litteris, atque harum mentem illius obscuritate, premerent inuolutam: ecce! quemadmodum antea cum Pelagii aßeclis *Augustinus* rem aggressus fuerat, similiter nostrates, quod reliquum inueniebant contra sui temporis aduersarios, euoluere amplius hoc argumentum studere. Ita GERHARDVS Loc. Theol. Tom. III. de lege Dei, §. 194. postquam iis, quæ *Bellarminus* e schola Pelagianorum produxerat, ipsas *Augustini* responfiones opposuit, hæc addit: *Ceterum, VT RES SIT EVIDENTIOR, proponimus hanc distinctionem. Perfectio alia est absoluta, quam possumus vocare perfectionem graduum: alia vero respectiua & conditionata, quam docendi gratia vocabimus perfectionem partium.*

Videtur ipse quidem *Bellarminus* paulo distinctius agere, quando *impletionem legis* aliam esse *absolutam*, aliam *comparatam*, sæpe animaduertit: sed eo filo, quo discrimen illud explicare is solet, rem intricat magis, quam extricat. Quocirca digna sunt, quæ considerentur, *HVLSEMANNI* verba in *Manuali August. Confess. disp. de bonis operibus*: *Frequenter Bellarminum confugientem videas ad distinctionem inter perfectionem hominis absolutam, & comparatam. lib. 2. de Monach. cap. 2. & 13. lib. 1. de amiss. grat. & stat. peccati cap. 13. lib. 4. de Justific. cap. 14. (Quam distinctionem & nos quidem admittimus: sed tunc loquimur de facto; non de jure diuino, ac si hoc duplicem perfectionem in hac vita exigat) inter equalitatem meriti &*



præmii absolutam & proportionatam, lib. 5. de Just. c. 6. 14. & 18. &c. Quibus confidenter hoc supponit, esse in Deo duplicem justitiam, rigidam & moderatam, atque ad hanc demum si opera nostra adæquantur, sufficere ad mercedem vitæ æternæ jure promerendam. Fundamentum hoc duplicis justitiæ facit Socinus 1. lib. de Servat. cap. 1. ad eleuandam Christi satisfactionem, & asserenda operum merita & perfectionem. Ex eodem lacu disputatio de peccato veniali, sua naturalitæ, de satisfactione pro peccatis, purgatorio, & innumera absurditates aliæ euaporarunt. Quæ cum obseruatione jungendam censemus & alteram, quod juxta Bellarmin. 2. de poenit. cap. 11. prop. 3. summa monachorum perfectio sit, vitare peccatum mortale. Circa quod effatum pergit Hülsem ibid. Disput. 14. de Rebus ciuil. Nemo illorum mihi visus est, qui summum Monasticæ perfectionis gradum positivè describat aliter, quam a vitatione peccati mortalis. Qui negativè eum, aut indeterminate describunt, sibi ipsis non constant. Si cui vero non ignotum est, quanta molis sit apud Papistas, peccatum mortale alicui impingere, existimabit profecto, rem esse minus arduam, præsentæ Dei gratia, ad eum monasticæ perfectionis gradum pervenire, quem plerisque Nostrorum Laicorum, ex charitatis regula, adscribimus. p. 589. 591. Conf. de peccatis mortalibus ib. c. IX.

Quam peruersa, obsecro, agendi ratio illa est, perfectionem e diuino jure, quantumvis temperato, deductam velle, & eam suspendere a sola peccati mortalis fuga! Putaris, in cælum se extulisse Pontificiam perfectionem; quam vix e criminum manifestorum cæno euasisse, vides. Hinc tam necessarium erat, meliorem vindicare, & cum Chemnitio, contra Papistas non docere modo, quomodo Legi nostra perfectio nulla satisfaciat, sed etiam, quomodo abundare tamen debeat justitia nostra plus quam Phariseorum, Matth. V, 20. interiores in corde crucifigere concupiscentias, mortificare actiones carnis, & repugnare pravis inclinationibus, & inchoare novos motus con-

sen-



*sentientes legi Dei.* Loc. Theol. de Lege Dei c. VIII. & cum Gerbardo aliisque ostendere, licet non assequamur summam graduum perfectionem, esse tamen *partium perfectionem*, seu integritatem, fidelibus propriam, quæ supra dictæ perfectioni Papisticæ multo antecellat. Conf. Gerbardus in notis ad Matth. c. V, 48. ubi etiam distinguit *inter perfectionem absolutam, seu graduum, & conditionatam, respectivam, seu partium.* (easdem locutiones vide ap. D.A.C. Schubartum in Via ad perfect. Germ.) Hutterus in Explicatione Libri Concordiæ p. 230. 231. Quique hunc sequitur Cundisius in Notis ad compend. Hutter. p. 704. Jacob. Wellerus ad Rom. p. 732. Dietericus Instit. Catech. p. 229. 273. Friedlib. Medull. Theol. p. 184. Rappolt. Op. Theol. p. 1911. Quensted. part. IV. Theol. Did. Pol. de lege. Henr. Mullerus Conc. Epist. in 1. Joh. IV, 18.

§. IV. Quum vero ante omnia opus sit, habere exploratum, quid allata distinctio præcise significet, ne in ambiguis laboremus frustra; profuerit, ex Theologorum probatissimorum usu sensum & sententiam indagare certiore, atque hinc quæstionem nostram constituere. Laudatus GERHARDUS c. I. de Lege Dei, Tom. III. Loc. Theol. sic habet: *Absoluta perfectio est, quæ summum illum obedientiæ gradum, quem lex requirit, integre præstat. Talis perfectio fuit in Adamo ante lapsum, talis etiam in Christo, qui integram ac numeris & gradibus omnibus absolutam obedientiam legi præstitit. In renatis talis perfectio non est, nisi tantum imputatione, quatenus perfecta illa Christi obedientia per fidem ipsis imputatur. Perfectio conditionata est sincera renatorum secundum TOTAM LEGEM obedientia, in hac vita inchoata, in æterna tandem vita consummanda; siue, est serium ac sincerum studium obediendi Deo secundum OMNIA*



OMNIA ejus praecepta, etsi aliquid desit respectu graduum. Hanc perfectionem renatis tribui, non diffitemur. Dicitur autem hac obedientia renatorum PERFECTA (1) ratione omnium mandatorum, siquidem OMNIBVS & SINGVLIS Dei mandatis obedire student renati, quamuis obedientia sit inchoata. Psalm. CXIX, 6. Tunc pudore non afficiar, cum respexero ad omnia praecepta tua. (2) Ratione sinceritatis, qua vero & non simulato affectu, serio & non hypocritico studio, renati Deo obediunt, ac prauis motibus resistunt. Psal. CXIX, 34. Toto corde exquisiui mandata tua. (3) Ratione probabilis & sanctae conuersationis, quam ducunt sine querela. Phil. II, 5. Sic Noa dicitur vir justus & perfectus in generationibus suis. Gen. VI, 9. (4) Ratione infirmorum, qui nondum peruenerunt ad illum cognitionis & obedientiae gradum. Ephes. IV, 13, 14. Hebr. V, 13. Quam & distinctionem inter perfectionem graduum atque partium, & explicationem perfectionis partium quadruplicem, iisdem fere verbis repetit WALTHERVS Harmoniae Biblicae p. 125. & 126. Notamus autem: (1) quartum illud membrum admittere simul in ipsa partium perfectione diuersum gradum, secundum quem alii infirmius, alii firmitus eam tueantur. (2) Denominationem perfectionis hujus alterius, a partibus, fundari in ipso principio normatiuo, nimirum lege, seu praeeptis Decalogi; & quidem in tota lege & omnibus singulisque mandatis, ne qua Decalogi pars excludatur. Atque hoc velle istam distinctionem, etsi id adpellatio omnium & singulorum ostendit satis, alii tamen idem & negatiue exprimunt: ut DIETERICVS Instit. Catech. p. 273. Bona opera dicuntur in Scripturis perfecta, non ob perfectionem graduum, ob perfectam nimirum in summo gradu cum Lege Dei conformitatem; sed ob perfe-

ctio.



*Etionem partium, nempe obedientie inchoatae, secundum OMNIA PRAECEPTA DEI, NON ALIQUA TANTUM.* Ita enim, BROCHMANDUS System. Theol. de Lege cap. VI. Duplicem esse impletionem legis: unam partium; alteram graduum obedientiae legalis. Impletio legis, inquit, quantum ad partes, ea est, qua quis, NON UNI AUT ALTERI PRAECEPTO LEGIS, SED OMNIBUS LEGIS PRAECEPTIS obsequi studet. At impletio graduum obedientiae legalis est, qua quis omnia & singula legis praecepta, secundum illam angelicam & summam perfectionem observat, quam lex requirit. Illa est possibilis: quod testatur Dei Spiritus exemplo Josue. 4. Reg. XXIII, 25. Davidis, Ps. XVIII, 23, 24. & Zachariae atque Elisabethae, Luc. I, 6. Hæc autem possibilis non est Rom. III, 19, 20. & VIII, 3. Gal. III, 10. Sermonem autem esse Apostolo Rom. XIII, 8. de impletionem legis, quantum ad PARTES, non autem quantum ad GRADUS PERFECTIONIS, e contextu manifestum est. Suadet enim Apostolus dilectionem proximi, quia praecepta secundæ tabulae, ab Apostolo enumerata, summam comprehenduntur in hoc sermone: Diliges proximum tuum sicut te ipsum.

Quærenti, cur tanta solitudine Auctores omnem ullius præcepti exclusionem prohibeant, occurrit fundamentum de ipsa perfectionis, seu impletionis, natura. Posito enim toto, seu perfecto, ex partibus tali, ponantur omnes partes, necesse est: nam partes simul sumtæ, pro rei veritate, sunt perfectum ipsum, nec ab eo realiter, seu vere, differunt. Contra, si partes non requirerentur omnes, perfectio, quæ poneretur, reapse non poneretur. Itaque id egerunt Theologi, præceptorum OMNIUM ET SINGULORUM significantius mentionem facientes, ut intelligerent Aduersarii, nos impletionem legis, quæ fieri a renatis queat, non vanam aut fictam, sed veram & OMNIBUS



*SUBSTANTIALIBUS PARTIBUS* perfectam fateri ac concedere; negare solummodo eam, quæ gradibus nullis destitueretur, & seueritatem iudicii diuini, sine remissione peccatorum, sustinere posset, qualem *Tridentini* comminiscabantur. Quapropter obseruatu dignum est, perfectionis partium *synonymum*, esse quidem *impletionem legis*, at non *impletionem legis perfectam*; etenim hæc est perfectio graduum sola: atque exinde *Romanenses* inter & *Protestantes* controuersiam minime agitari hanc, num acceptis gratiæ viribus lex impleri possit; verum hanc, num perfecte impleri possit. *Remouenda sunt calumnia*, Chemnitius ait Ex. C. Trid. de B. oper. quæst. 3. ut *STATUS QUÆSTIONIS* recte constituatur. Non enim docemus, *impletionem legis* ita esse impossibilem, ut, qui per spiritum renouationis renati sunt, nec possint nec debeant in hac vita inchoare obedientiam legis. Quæstio est, an *SCILICET PERFECTA IMPLETIONE* legi diuine plene & cumulate ita satisfaciant, ut lex diuina non habeat, quod in illis bonis renatorum operibus in hac vita accusare & damnare possit, si Deus in iudicium cum ipsis, sine venia & remissione, intrare vellet.

Ceterum statuendam ita *impletionem legis inchoatam*, eamque secundum omnia præcepta accipiendam esse, consentiunt Theologi *Reformati*, quorum mentem exhibet in *Disputatione Historico-Theol. de perfectione Christiana* BECMANNUS, documentis ac verbis utens sequentibus: *Johannes Dauenantius* Episcopus quondam *Sarisburiensis* de *justitia actuali* cap. 51. Nos nunquam inficias iuisse, scribit, posse Renatos & spiritu charitatis imbutos, etiam hostes suos diligere, posse etiam ceteros actus facere, qui mandantur in *Decalogo*; sed, eos in operibus hisce faciendis assequi illam solum-



modo, quam Theologi appellant perfectionem PARTIUM, non perfectionem graduum, notat. Cui accedit Pareus lib. 4. cap. 11. de justificatione contra Bellarm. p. 1075. ubi Bellarmino dicenti, dilectionem tam esse perfectam, ut precepto adimplendo sufficiat; respondet: Hoc verum est de impletione mandati sincera, inchoata, qualem cum Scriptura nos tribuimus sanctis; falsum vero de impletione mandati absoluta. Ibid. p. 107. hæc habet: In locis allegatis, quæ perfectionem tribuunt aliquibus, vel ab omnibus requirunt, perfectio intelligitur, non graduum, siue is obedientiæ gradus, quem legis ængelißica requirit; sed perfectio partium, siue integritas, opposita hypocrisi, hoc est, verus & non simulatus affectus, & studium obediendi Deo & repugnandi cupiditatibus, atque initium obedientiæ secundum omnia Dei mandata. Quibus consona docent Leidenses Theologi Synopsi purioris Theologiæ Disput. 34. th. 27. p. 460. Ubi integritatem Bonorum Operum esse ajunt, qua omnia, quæ Deus lege sua a nobis postulat, ex puro & toto corde atque ex omnibus viribus nostris præstamus, quæ alio nomine perfectio integritatis & partium nominatur. Et Disp. 32. Postquam diuersos Regeneratorum gradus constituissent, & monuissent, Regenerationem, veteris hominis naturam non tantum reprimere, ut quidam male sentiunt, sed etiam abolere, & veram sanctitatem ac iustitiam ejus loco substituere, quæ in Resipiscentiæ fructibus quoque resplendeat. Thesi 5. & 6. addunt: Quemadmodum vero pueri, etsi imperfectius eam exserunt, integram tamen hominis formam, omnibus suis partibus constantem, habent. Sic neminem vere resipiscentem aut regnitum agnoscimus, nisi qui formam integram regenerationis possidet, perfectione, ut loquuntur, partium, etsi quotidie ei sit proficiendum in perfectione graduum. Perfectio hæc essentialis consistit primum in eo, ut omnes facultates animæ humanæ renouentur, intellectus, voluntas & affectus, secundum OMNIA præcepta Dei; deinde ut eousque renouentur, ut peccatum in iis non regnet, Rom. 6. & ut non ambulent secundum carnem, sed secundum spiritum. Rom. 8, 1. Atque hæc est illa perfectio, quam Deus ab omnibus fidelibus exigit, & qua sancti illustres fuerunt.



Perfectio nimirum, quæ proprie quidem nomen isthoc sustinet, non tamen uno semper modo, vel respectu, intelligenda est. Commune illud omnino semper remanet, quod cuilibet perfectioni completa forma propria deesse haud debeat; ipsa autem formæ ratio peculiaris cernitur in *relatione*, quæ non una observatur, sed diuersa esse potest: respicitur enim ad partes vel *essentiales*, vel *integrales*, vel *accidentales*, vel alias aliorum generum; unde & ratio denominandi varia emergit. Ita utique, a Theologis quæ reperitur perfectio partium in *Christianismo*, (conf. GEIERI *Meditationum mortalitatis Germanicarum* LXIX. *de Perfecto*) est & *essentialis* & *integralis*, licet non *gradualis* sit. At enim, ne quis forte regefferit, manere id ipsum in *questione*; an nempe Theologica hæc partium perfectio, quæ in hac competit vita fidelibus, partes suas omnes comprehendat: plurimum dubitationis sublatum fuerit, modo iterum ex ipsa rei indole annotemus, ad *integralem perfectionem* neutiquam requiri, ut partes uniuersas & *principales* & *minus principales* statim contineat, verum ut habeat modo illas omnes, quæ *totum integrale simpliciter consideratum* constituunt; quippe quo, ipsoque & *essentiali*, reliquæ possunt esse posteriores, quæ propterea *minus principales* dici solent. Exemplum datur in ramo, qui arbori adnascitur; vel in dentibus, qui integrum infantem sequuntur interuallo satis longo: pariter enim fit apud homines regenitos, ut radicem quidem omnium virtutum foueant, fidemque per charitatem exserant secundum omnia & singula præcepta, magis magisque autem experiantur, quam multi & *profectus* & *defectus* super sint; circa quos si gratia laboret, quoad potuerit, cer-



re vtrunque non prohibetur, quo minus integritas fidei ac charitatis, quæ ipsa est perfectio partium, sibi constet. Atque idcirco nihil quærendum restat, nisi hoc tantum, utrum integritas illa, secundum omnia & singula Decalogi præcepta, sit fidelibus, vere *talibus*, omnibus ac singulis tribuenda; an semper adhuc eatenus pars *constitutiva* aliqua desideretur. Nunc enim perfectionem partium consideramus, non tam *comparativam*, qua deinceps prouectiores augentur in dies, quam potius *in se spectatam*, & *abstractam a gradibus*; sine qua nec Poenitentia seu *Conuersio vera & completa*, nec *Regeneratio* esse queat, nedum *Renouatio*, *strictius* apud eruditos accepta.

Concludamus hanc vocabulorum evolutionem iudicio *Theologico* æque ac *Historico* G. J. VOSSII, *Historia Pelagianæ* lib. V. part. I. quod in hoc negotio grauisimum facile agnosci potest. *Catholici*, inquit, (Pelagianis, omnimodam perfectionem obtrudentibus) *respondebant*; per eam perfectionem (quæ in Scriptura sanctis attribuitur) intelligi tum *sinceritatem*, siue *verum & non simulatum studium obediendi OMNIBVS DEI MANDATIS*; tum obedientiæ istius *ACTVALEM IMPLETIONEM*, sed pro modulo hujus vitæ, & comparate ad alios fideles: non plenam & omnibus numeris absolutam. Nempe quomodo domus vocatur, quæ etiamnum exstruitur. Quod fieri triplici potest respectu. Primum ratione initii ac desiderii; ut sit *συνεδοχὴ* partis, & *μετὰ τὴν ἑκτα* finis. Deinde comparatione promissi, ut si quis quod ædificio deest, hoc de suo se suppleturum receperit. Similiter igitur justitiam hujus vitæ perfectam dici censent (1) *inchoate* siue *κατὰ συνεδοχὴν*, initii & desiderii ratione; (2) *comparate*, siue *κατὰ σύγκρισιν*, ratione impiorum & imper-



*imperfectiorum. (3) euangelice, sed cum velamento gratiæ; quia omnia facta deputantur, quando, quod factum non est, ignoscitur. Quibus addere possumus, quod vulgo NON APTE MINUS, QUAM VERE dicitur, aliam esse PERFECTIÖNEM PARTIUM, aliam GRADUUM. Puer perfectus est priore significatu, non posteriori. Ita Christiani sunt perfecti, quatenus serio student ambulare, ac reapse ambulant, NON IN UNA PARTE, AUT CERTIS PARTIBUS, SED OMNIBUS PRÆCEPTIS DOMINICIS, nullam eorum partem ab obedientia sua studio separantes. Hanc & Catholicorum veterum fuisse sententiam, clare eorum verbis docere possumus. De quibus plurima documenta ibidem produciuntur. Cum iis congruit descriptio WENDELINI, Christianæ Theol. lib. I. cap. XXVI. Partium perfectio est, qua totum aliquod omnibus suis partibus integrantibus constat, etsi partes integrantes ad justam perfectiönem & maturitatem nondum peruenierunt: ut videre est in corpore infanti-li. Graduum perfectio est, qua totum aliquod omnibus suis partibus integrantibus ita constat, ut justam quoque perfectiönem & maturitatem partes singule sint adeptæ, ad quasuis sufficientes & idoneas actiones: ut videre est in corpore virili. Neque alia est sententia Metaphysici SCHARFII, Metaph. Disp. XVIII. Perfectio partium habet totalitatem partium sibi debitarum. Sic perfectiöne partium illud dicitur perfectum, quod constat omnibus partibus, ad ipsius integritatem spectantibus. Perfectio graduum appellatur, quæ omnibus gradibus debita suæ perfectiönis gaudet, abundatque quadam excellentia.*

§. V. At vero etiam atque etiam cauendum, ne huic disquisitioni inanis verborum contentio subesse videatur, qua nihil pestilentius, nihilque ab animo atque instituto nostro alienius est. Esset λογωμαχία, si urgeremus locutionem, quæ in Scripturis sacris haud fundaretur. Nec λο-



*γρηγορία* non esset, si eam, quæ vocibus iisdem nusquam legeretur in verbo Dei, propter sensum quendam visum incommodum repudiatam nullo modo vellemus, si tamen veritas, designata ipsius usu, aliis sub dictionibus re-reliqueretur æque salua & integra. Quando autem ratio, ex qua in dubium vocatur usitata perfectionis partium notatio, nulla est alia, quam quod dubitetur de re ipsa; an scilicet omnes partes, ad ejusmodi *perfectionem integram* necessariæ, in veris fidelibus dentur: hic sane quæstio instituitur, non de *verbis* meris, sed de ipsa *rei veritate*. Hæc denique si ita comparata fuerit, ut diuinitus patefactum Evangelii & salutis ordinem ingrediatur, quid apertius aut manifestius, quam elaborandum esse omni studio, ut dubia opposita discutiantur, verborumque ac rerum tantarum usurpatio sarta tecta conseruetur ab omni detrimento?

AUGUSTINUS, si quis unquam maxime, nitebatur eo totus, ne quid *Pelagianis*, perfectionem ex facultate humana temere deriuantibus, contra doctrinam sanam cederetur: veruntamen is ipse propterea *non dubitabat fateri*, Deum *possibilia mandasse*, & *quidem sensu isto*, quod & *singula & omnia*, *singuli omnesque fideles per gratiam Dei implere valeamus*; quæ iterum verba sunt VOSSII *Histor. Pelag. l. c.* confirmantis idem testimoniis Augustinianis. Quamquam vero simul crederet Augustinus, (cum Historico adhuc loquor ex iis, quæ apud ipsum antecedunt) *neminem a conversione sua, vel certo tempore majoris profectus in pietate & sanctimonia, omne omnino peccatum euitasse*: tamen si quis hac parte dissentiret, *tolerabiliter erraturum putabat*; dummodo eum, quem ad apicem istum perfectionis peruenisse existimaret, hunc consecutum putaret, *non per naturam, sed per gratiam Spiritus Sancti*; dum  
item



*item alium potius talem fuisse, esse, vel fore existimaret, quam se ipsum; nisi forte certissimo indicio (qualis esset revelatio diuina) isthoc de se esset edoctus.* Ipsa Augustini dicta fere sunt repetita; adduntur autem loca *Patristica* multo pluribus. Conf. Hülsemanni Man. A. C. Disp. III. p. 124. Non jam disputabimus, rectene satis a Patre, an secus, posterioris membri conditio ultima prioribus subiecta sit, quam de quoquam affirmare auit nemo: id modo attendamus, velim, qua mente is controuersias tractarit. Animaduertimus enim, sic sensisse illum, vt in dogmatibus non tam errorem, censuerit, quam in hoc ipso id, quo *PERNICIOSE* homines *FALLERENTUR*, (ita loquitur lib. de Spiritu & Littera cap. II.) acerrime carpendum esse. Quod exemplum, si non eodem, at saltem isto imitandum est modo, ne quid desiderari fingamus in *verbis*, quibus exterminatis momenta *rerum* maxima euertantur. Ecquid deplorandum magis, quam si a docentibus *impletio legis* crude negetur fieri posse, unde legentes vel audientes ansam capiant, diuinæ voluntatis implendæ curam abdicandi? vel, si quis in *perfectiōem* ipsam inuehatur, & hinc odium ejus concipiant homines, quam Christus & Apostoli tantopere commendant? Nempe ita fit plerumque, ut circa ea, quæ ipsius Christi sunt, ex quacunque abusus specie velamen carnis ac malitiæ induatur, idque aliis *ignorantibus*, ultroque arripientibus, temere offeratur, ingenti cum animarum damno: quum contra, monstrato errantium *abusu*, ipsa illa, quæ *Spiritus Dei sunt*, purgata ab interpretatione sequiori, tanto fidelius atque ardentius præcipienda sint. Quæ quidem *questionis fallacia* est illa, sicut initio præmissimus, quam præcipue in *doctrina de lege* in utramque partem detestari jubet Chemnitius, tanquam (ut ipsius ver-

bis



bis utamur) *ignorantiam aut petulantiam, gravissime a Deo puniendam; ne videlicet videamur, vel justificationem ex perfectione inani quærere, quæ, sano de partibus sensu, vera illam, ceu fructus, consequitur; vel perfectionis hujus studium persequi hostiliter, cujus potius cursum intra limites suos dirigere oportebat. Crediderimus equidem, non omnes, aduersus perfectionem pugnantes, fraudem istam intendere: qui debebant tamen meminisse, quod hanc certo ex humana imprudentia struat diabolus, cujus (τὰ νοήματα) machinationes non susque deque habendæ sunt. 2. Cor. II, II. Atque hæc etiam est causa, qua adducti circumspectius statum ejus, quod in quæstione est, ante oculos ponendum, sumus arbitrati.*

§. VI. Antequam ad specialiora progrediamur, generalius unum de Perfectione Christiana iudicium adhuc præmittemus, in quo, constructo e S. litteris, totius argumenti cardo versatur. Sic enim HORNEIUS Disp. Theol. part. II. disp. IV. p. 506. &c. „Cum supra multis probauerimus, iustitiam illam inhærentem in hac vita simpliciter & absolute quidem perfectam non esse, quæri potest, „an ergo nulla ejus perfectio sit, & si qua est, quanta illa, „sit vel esse possit aut debeat. Et sane negari non potest, „cum animi illa renouatio non simul & semel fiat, sed paulatim crescat, non initia tantum aliqua iustitiæ illius inhærentis, sed incrementa quoque & PERFECTIÖNEM „ESSE: unde in tota doctrina Christi alii sunt infantes adhuc, qui lactis potu indigent, sicut scriptum est I. Cor. „III, I. Ego porro, fratres, non potui loqui vobis ut spiritualibus, „sed ut carnalibus, ut infantibus in Christo: lactis potu vos alui, „& non esca: nondum enim poteratis id ferre, & ne nunc quidem potestis; alii vero in fide & agnitione Filii Dei jam  
C  
adoles-



„adoleuerunt, qua de re Eph. IV, II. scriptum est: Dedit  
 „alios quidem Apostolos, alios vero Prophetas, alios autem Euange-  
 „listas, alios autem Pastores & Doctores, ad compactionem sanctorum,  
 „ad opus ministerii, ad adificationem corporis Christi, donec per-  
 „ueniamus nos omnes in unitatem fidei, & agnitionis Filii Dei,  
 „eis ἀνδρα τέλειον in virum adaltum, ad mensuram plenae stature  
 „Christi, ut ne simus amplius pueri, qui fluctuemus & circumfera-  
 „mur quouis ventu doctrinae; - sed sincere nos gerentes in chari-  
 „tate, αὐξήσωμεν εἰς αὐτὸν τὰ πάντα, in eo prorsus adolesca-  
 „mus, qui est caput Christus. Quare etiam Scriptura horta-  
 „tur, ne in rudimentis illis doctrinae fidei & pietatis sub-  
 „sistamus, sed ad perfectionem contendamus, Hebr. VI,  
 „1. Quapropter omisso, qui in Christo rudes inchoat, sermone, ad  
 „perfectionem feramur, non jacentes rursus fundamentum resi-  
 „piscientiae ab operibus mortuis, & fidei in Deum, baptismatum do-  
 „ctrinae, ac manuum impositionis & resurrectionis mortuorum &  
 „iudicii eterni. Et Paulus ita se facere dicit Philipp. III,  
 „13. Fratres, ego me ipsum non reor (metam) apprehendisse: nu-  
 „num autem ago, ea quidem, quae a tergo sunt, obliuiscens, ad ea,  
 „quae a fronte sunt, contendens, scopum versus feror, ad premi-  
 „um supernae vocationis Dei in Christo Jesu. Ὅσοι ἔν τέλειοι, τῶ-  
 „το φρονῶμεν. Quotquot itaque perfecti sumus, hoc sentiamus.  
 „Nec dubitari potest, idem omnibus faciendum esse, qui-  
 „bus cordi est pietas & propria salus? sicut enim qui e-  
 „ruditionem amat, & verum aliquem ex ea fructum  
 „percipere cupit, non in rudimentis litterarum semper  
 „hæret, sed quantum potest, in studiis se confirmat ac  
 „perficit; ita de pietate quoque comparatum est: quin id  
 „præterea hîc accidit, ut si quis in ea non procedat, &  
 „relictis, quae a tergo sunt, subinde ad anteriora conten-  
 „dat, is non tantum nihil proficiat, aut in cursu subsi-  
 „stat, sed retro feratur, & ea etiam, quae didicerat, de-  
 „discat,



„discat, ac leui negotio omnia euertat. Deinde id etiam  
„certum est, pietatis studium, si serium non sit, nullum  
„esse; tale autem non est, cum non ex toto corde credi-  
„mus, aut Deum & proximum diligimus; unde merito  
„Philippus Diaconus eunucho dicebat: *si ex toto corde cre-*  
„*dis, licet.* Et Paulus 2. Tim. I, 5. Timotheum commendat  
„*ob fidem minime simulatam.* Et Iacobus cap. I, 6. ait: *Postu-*  
„*let cum fide, minime dubitans: nam qui ambigit, similis est flu-*  
„*ui maris, qui ventis agitatur & iactatur.* De charitate au-  
„tem lex ipsa ita loquitur Deut. VI, 5. *Diliges Dominum*  
„*Deum tuum ex toto corde, & toto animo, & omnibus viribus: &*  
„*Leuit. XIX, 18. Diliges proximum tuum, sicut te ipsum.* Idque  
„repetit Christus Matth. XXII, 37. Luc. X, 27. & alibi. Nec  
„aliter Paulus 1. Tim. I, 5. *Finis mandati, inquit, est chari-*  
„*tas ex mundo corde, & conscientia bona, & fide minime simu-*  
„*lata.* Et 1. Joh. III, 18. dicitur: *Filioli mei, ne diligamus ver-*  
„*bo, neque lingua, sed facto & veritate.* Et additur: *Et per*  
„*hoc cognoscimus, nos ex veritate esse, & coram ipso secura red-*  
„*demus corda nostra.* Ex toto autem corde Deum non  
„diligat, qui non supra omnia eum amat, h. e. etiam cha-  
„rissima ejus amori postponit: unde Christus Matth. X, 37.  
„dicit: *Qui amat patrem aut matrem supra me, non est me*  
„*dignus, & qui amat filium aut filiam supra me, non est me di-*  
„*gnus.* Et Luc. XIV, 26. idem hoc sic exprimit: *Si quis ve-*  
„*nit ad me, & non odit (contemnit præ me cum aliter fie-*  
„*ri non potest) patrem suum & matrem, & uxorem, & libe-*  
„*ros, & fratres, & sorores, atque adeo etiam animam (vitam)*  
„*suam, non potest esse meus discipulus.* Sed nec proximum  
„sicut se ipsum amat, qui non, quæcunque voluerit, ut sibi  
„fiant, hæc aliis facit, sicut Matth. VII, 12. scriptum est: nam



„vera charitas iram cohibet, benigna est, non inuidet, non a-  
 „git perperam, non inflatur, non agit indecore, non querit quæ  
 „sua sunt, non exacerbatur, non cogitat malum, non gaudet in-  
 „iustitia, gratulatur autem veritati, omnia tegit, omnia sperat,  
 „omnia sustinet, ut describitur 1. Cor. XIII, 4. Unde et-  
 „iam connexus perfectionis vocatur Coloss. III, 14. & impletio  
 „legis Rom. XIII, 10. Quare ut recte credamus, & Deum  
 „& proximum sincere diligamus, res sane ardua est, NEC  
 „PARVÆ PERFECTIÖNIS. Et hæc ergo ita se omnino ha-  
 „bent. Nec minus tamen vera sunt, quæ supra asserta,  
 „neminem ad tantam in hac vita iustitiæ perfectiönam  
 „pertingere, ut non ea semper cum magna adhuc im-  
 „perfectiöne & imbecillitate conjuncta maneat, donec  
 „ad alteram illam perueniatur. Unde jam facile intelli-  
 „gitur, omni Christiano duo hæc cum primis necessaria  
 „esse, unum, ut veræ pietati non perfunctorie, sed serio  
 „studeat, nec recte tantum inchoet, sed, quantum in  
 „hac infirmitate fieri potest, ad perfectiönam subinde  
 „feratur: ita enim non fictæ, sed ex toto corde Deum colet,  
 „nec unquam in studio virtutis & pietatis segnescet, sed  
 „exercebit se, Pauli exemplo, ad conscientiam habendam sine of-  
 „fensa apud Deum & apud homines semper, sicut Act. XXIV,  
 „16. scriptum est: alterum, ut quantumcunque profe-  
 „cerit, sciat multum adhuc sibi deesse: sic enim superbi-  
 „am & præsumptionem cauebit, & cum fecerit omnia, quæ edi-  
 „cta sunt nobis, dicet: Servus inutilis sum, nam, quod debui facere, fe-  
 „ci, ut Christus ipse præcipit Luc. XVII, 10. Nec ideo animo  
 „concidat, quod imperfectum se esse sentiat: nam ut S.  
 „Augustin. expos. Ps. CXXXIIX. docet, omnes in ejus libro  
 „scribentur, non perfecti solum, sed etiam imperfecti. Non timeant,  
 „inquit, imperfecti, tantum proficiant. Nec, quia dixi, non timeant,  
 ament



„*ament imperfectionem, & ibi remaneant, ubi inuenti sunt;*  
 „*tantum proficiant, quantum in ipsis est. Quotidie addant, quoti-*  
 „*die accedant, tamen a corpore Domini non recedant. etc.*

Haftenus HORNEIUS, qui loco priori incrementa, Perfectionem appellat; (conf. JUST. GESENIUS in I. Theff. IV. Conc. Epist. II. Domin. Reminisc.) sed posteriore ipsam charitatis erga Deum ac proximum sinceram mentem accuram, de qua nobis in hac disputatione potissimum sermo est: utroque autem sensu Perfectio Partium a Theologis adhibetur, ut jam supra monuimus §. IV. Ibidem adductis Auctorum, de distinctione ipsa, testimoniis simul junctum volumus sequens RIVETI, Exerc. 52. in Genes. p. 215. *Perfectio alia est absoluta, quam GRADUUM PERFECTIONEM* appellare possumus: *alia Respectiva & Conditionata, quam PARTIUM PERFECTIONEM* dicere possumus. *Absoluta perfectio iterum est duplex: (I) Qualis fuit in Adamo in statu innocentiae: in quo erat perfectio partium & graduum, quia in iustitia originali creatus carebat omni prorsus peccato, sed tamen natura sua mutabilis & nondum confirmatus gratia, qua labi non posset, non erat ab omni peccandi periculo liber, ut nunc sunt Angeli sancti & pii homines beati. Altera est saltem per equivalens talis. Nam iustitiae Christi imputatio & peccatorum remissio supplet ejus defectum, per quam pro justis & immaculatis habentur apud Deum, qui in Christum credunt. De ea perfectione, quam in Christo habemus, in quo etiam legis iustitia impletur a nobis, loquitur Apostolus Coloss. I, 28. II, 10. Ebr. X, 4. Perfectio vero inchoata per OMNES partes in nobis, etsi non absoluta per gradus, est sincera & ἀνυπόκριτος secundum TOTAM LEGEM obedientia, siue sincerum ac serium studium obediendi Deo secundum omnia ejus praecepta; etsi respectu graduum aliquid desit, & admisceantur ex humana infirmitate reliquia.*



Mente igitur circa rem tractandam, ipsiusque differentiam, satis declarata; pergimus ad propositæ locutionis & quæstionis vindicationem, ut Theologicis rebus par est, demonstrandam.

## CAP. II. THESIS FIRMATUR.

**A**D demonstrandum, quod perfectio partium, dicto sensu accepta, salva Evangelii veritate negari nequeat de *Stantibus*; duo principia confici debent: (1) *Legis divinæ partem nullam fidelibus veris deesse.* (2) *Ubi pars legis ulla defuerit, gratiam nullam esse.* Quibus sat perspectis, in hac causa antiquæ positionis firmitudinem labefactare nihil poterit. Sunt autem ejus inter se affinitatis, ut, qui utrumvis recte norit, eo ipso, necessaria ambo esse, agnoscat.

### PROPOSITIONIS I. DEMONSTRATIO.

I.

**D**E *Stantibus* quando affirmamus, divinæ legis partem nullam iis deesse, seu, quod idem, *nulla non præcepta*, h. e. partes Decalogi omnes & singulas, ab ipsis impleri: supponimus, *Stantes*, h. e. veros *Fideles* quoslibet, eo gratiæ statu gaudere, ut in iis *Lex per Fidem stabilita sit*. Hoc contra Judæos Paulus docet Rom. III, 31. *Legem igitur inutilem reddimus Per Fidem? Absit! immo legem stabilimus*, νόμον ἰσχύμεν. Neque est, quod putemus, id de *Credientibus* non capiendum *inbæsiue*, sed tantum *imputatiue*, quatenus absolutissima Christi obedientia imputetur illis ex Fide; qua de *justificatione* Apostolus ibi egerit: nam, etsi hoc verum, nec negandum est, ad ipsam *imputationem*, tanquam fundamen-



damentum, simul omnino respici; tamen, si de hac lo-  
 lum accipiat dictum illud, nihil eo aduersus Judæos ob-  
 tinuisset Doctor gentium, sed isto sensu obfirmati essent am-  
 plius in calumnia, quasi doctrina de *Fidei imputatione* Legem,  
 & finem legis sanctitatem, peruerso modo negligeret ac  
 impediret. Quod conuicium ut rescinderet Paulus, alteram  
 Euangelii proprietatem una commendatum ibat; respon-  
 dens, *Fidem & justificandi & sanctificandi* pollere efficacia,  
 tametsi diuersa *operandi ratione*; quam utramque capitibus  
 sequentibus porro declarauit. Et loci & mentis hujus in-  
 terpretatio clarior affertur Rom. VIII, 3, 4. *Quæ legis erat im-  
 potentia, cum viribus esset destituta per carnem, Deus, suo ipsius  
 filio misso in forma consimili, carni peccato obnoxia, idque pro  
 peccato, condemnauit peccatum in carne: ut jus illud legis com-  
 pleatur in nobis, quatenus non secundum carnem ambulamus, sed  
 secundum Spiritum.* Hæc iterum, nulli negamus, de *justi-  
 ficatione*, quæ per fidem fit, agere; id quod euincit *emphasis*  
 vocabuli, *δικαίωμα*: quod quomodo opponatur utrique,  
 suo conjugato *δικαιοσύνη*, iustitiæ, & *δικαίωσις*, justificationi,  
 optime docet SPENERUS *Iustitiæ fidei* cap. VIII. p. 1248.  
 attamen secum illa inferre *Sanctificationis effectum*, ex appo-  
 sito palam est. Quod autem, & qua ratione, hoc postero-  
 re prius effatum expediatur, dilucide sic exponit BEZA  
 in *Notis*: Aliud est, inquit, *δικαίωσις*, id est, absolutio nostra,  
 quam τὸ *δικαίωμα*, de quo supra ad Rom. I, 32. illud ipsum, quod  
 requirit lex, ut ex ejus præscripto iusti & integri coram DEO  
 censeamur. Nam quum ad peccatorum remissionem, & imple-  
 tionem iustitiæ, accessit etiam hoc tertium, id est, PERFECTA  
 NATVRÆ NOSTRÆ INTEGRITAS (qua omnia gratis conse-  
 quimur in Christo per fidem apprehenso;) ut in omnes facies se  
 conuertat Satan, iusti sumus coram Deo, etiam ex absolutis-  
 sima



*suma Legis formula. Quamobrem etiam dixit Apostolus supra c. III, 31. se legem non euertere, sed STABILIRE. Porro idem scite explicat rem ipsam, ad τὸ ἐν ἡμῖν, in nobis. Non dicit Apostolus, ὑφ' ἡμῶν, a nobis. Neque enim idcirco nulla in nobis est condemnatio, quod iustitia in nobis sit inchoata; sed quia in Christo sumus, in quo plene sumus sanctificati. Nam quod de imputata Christi sanctificatione dicimus, ita accipiendum est, ut sciamus, non idcirco nos sanctos coram Deo haberi, quod Christi hominis integritas sarciat, quod nostra deest; sed, quod ille nos in solidum sanctificauit in sese in aeternum. Quorsum igitur, dices, illa iustitia in nobis per eundem Christum inchoata? Nempe, ut sit testis, nos in Christo esse, in quo omnia sumus adepti. Ideo Apostolus admodum apposite subjicit, quæ ad nostram illius in Christo coeptæ justificationis usum pertinent; ut intelligamus, quod verissimum est, FRUSTRA DE FIDE AC CHRISTO APPREHENSO GLORIARI, QUI RE IPSA NON OSTENDUNT, SE CHRISTI SPIRITVS ESSE PARTICIPES.*

§. II. Ita ergo per fidem stabiliri, seu impleri, & inhaesive in nobis legem, ex mente Apostolica, adhuc confirmamus Ecclesiæ testimoniis. CHEMNITIUS de lege Dei c. VIII. Quando, ait, de renatis loquimur, RECTE dicitur, ab illis impleri legem DVOBVVS modis. (1) Fide & imputatione. (2) Inchoatione, seu noua obedientia ex fide. Et simul verum est, sanctos debere agnoscere, se procul abesse a PERFECTA IMPLETIONE legis in hac vita. Item: Paulus duplicem impletionem Legis tribuit renatis. (1) Ad iustitiam omni credenti, ut nibi condemnationis sit, quia Deus misso Filio prestitit, & damnauit peccatum. (2) Ut justificatio legis in nobis impleatur, qui non secundum carnem, sed secundum Spiritum viuimus. Qua in re vestigia premuntur APOLOGIÆ Aug. Conf., præclare ista omnia enarrantis p. 48. Scriptum est apud Prophetam: Dabo legem



*gem meam in corda eorum. Et Rom. III, ait Paulus: LEGEM STABILIRI, non aboleri PER FIDEM. Et Christus ait: si vis ingredi in vitam, serua mandata. Item: Si dilectionem non habeam, nihil sum. Hæ sententiæ & similes testantur, quod oporteat Legem in nobis inchoari, & magis magisque fieri. Loquimur autem non de ceremoniis, sed de illa lege, quæ præcipit DE MOTIBUS CORDIS, videlicet de Decalogo. Quia vero FIDES AFFERT SPIRITUM SANCTUM, ET PARIT NOVAM VITAM IN CORDIBUS, NECESSE EST, QUOD PARIAT SPIRITUALES MOTUS IN CORDIBUS. Et qui sint illi motus, ostendit Propheta; cum ait: Dabo legem meam in corda eorum. Postquam igitur fide iustificati & renati sumus, incipimus Deum timere, diligere, petere & expectare ab eo auxilium, gratias agere & prædicare, & obedire ei in afflictionibus. Incipimus & diligere proximos, quia CORDA HABENT SPIRITUALES ET SANCTOS MOTUS. Similiter p. 84. Christus ad hoc datus est, ut propter eum donentur nobis REMISSIO PECCATORUM, ET SPIRITUS SANCTUS, qui novam & AETERNAM VITAM ac AETERNAM IUSTITIAM in nobis pariat. Quare non potest lex VERE FIERI, nisi accepto Spiritu Sancto per fidem. Ideo Paulus dicit, LEGEM STABILIRI per fidem, non aboleri, quia LEX demum FIERI POSSIT, cum contigit Spiritus Sanctus. p. 85. Profitemur igitur, quod NECESSE sit, inchoari IN NOBIS, & subinde magis magisque FIERI LEGEM. Et complectimur simul utrumque, videlicet spirituales motus & externa bona opera.*

NOTA. (1) Scriptura & Libri Symbolici de Lege loquuntur, non tantum *objective*, sed plerumque & *subjective*; non tam quatenus *in se*, tanquam doctrina extra hominem spectari solet, quam prout ipsa instaurata in Fidelium conscientia consideratur, ita ut fide sentiant, ei a



Christo satisfactum, nouisque vitæ spiritualis viribus imbuti, indolem ejusdem, mentem ac typum, intra se expriment. (2) Legis, per Fidem in *justificatis* stabilitæ, fructus *immediatus* est, ut carnis concupiscentiam Spiritu mortificantes, Spiritum inhabitantem refineant, & juxta hunc ambulent. Rom. VIII. cum v. 4. conf. v. 13. (3) Hinc lex a renato *vere fieri potest*, ut *Apologia* testatur, interioribus illis spiritualibus motibus atque affectibus ipsi consentientibus, & externis operibus.

§. III. Ex præmissis superest quærendum, utrum *tota* Lex stabilita sit in regenitis; anne partium una, vel plures, ut aliquæ deessent? Nihil vero est, cur dubitemus, quum *absolute* Scriptura de lege dicat; de ipsa tota, h. e. omnibus ejus partibus, simul sumtis, *predicatum* affirmari. *TOTA LEX*, inquit Christus Matth. XXII, 40. *pendet in duobus illis mandatis*, de charitate erga Deum atque homines. Alterutrum autem si tollas a fidelibus; legem in ipsis stabilitam, nemo dixerit. Nec charitas vera amplius est, seu Dei, seu proximi, si aliquam ejus partem vel præceptum ullum excipiendum putes: quemadmodum & totam catenam rumpit, qui unam ejus particulam. Audiamus ipsum sui interpretem *Paulum* Gal. V, 14. quod *omnis lex* uno de dilectione verbo compleatur; & Act. XX. quomodo legem apud Ephesios per fidem stabilierit: *Omne Dei consilium*, ait, *annunciaui vobis*, v. 27. *nec prætermisi quidquam eorum, quæ conducerent, docere vos publice & domatim*. v. 20. Si quis in contrarium cogitet; ita quidem tradi legem integram *docendo*, & forte etiam *intelligendo* accipi, nec partem ullam subtrahendam esse; dubium manere tamen de facultate præstandi ea, quæ præcipiantur, an secundum hanc



hanc, per omnia & singula, Lex in fidelibus instaurari possit : ad hunc scrupulum eximendum recognoscamus, qui fiat, ut, *justificati non secundum carnem, sed secundum Spiritum ambulent, Spirituque Dei agantur*. Rom. VIII, 4. 14. Ex quibus Apostolicis dictis aduersus Pontificios SPENERUS in *Iustitia Fidei Evangelica* c. IV, p. 532, 3. optime obseruat; Spiritum non ducere fideles tantum *partialiter*, nec aliquam legis partem excludere, sed ut unum, ita & omnia præcepta Dei urgere adimplenda. Jam vero, si filii Dei hunc Spiritus ductum sequi, & juxta eum incedere valent, immo ambulant, fatente Scriptura; non potest non lex in iis, sub *uniuersali* partium respectu, stabilita esse, tam ad præstandum, quam cognoscendum. Quæ quidem res, tanquam negotii nostri nucleus, ut pateat euidentissime; antequam e Scripturis eam demonstrare pergamus, *ambiguitas*, quæ circa *Legis definitionem* veritati huic penetrandæ impedimentum affert maximum, penitus remouenda est.

Notandum igitur, id quod modo indicauimus, diuinam legem in sacris litteris spectari dupliciter; *vel obiectiue, vel subiectiue*. Propterea, qui solummodo *obiectiue* Legem intuentur *moralem*, per eam intelligunt nihil aliud, quam iussa Dei, quæ tabulis Decalogi continentur, tanquam externa signa voluntatis diuinæ. *Subiectiue* autem si quis eandem recte intuetur, juxta Scripturæ sensum, haud sane excludenda est norma agnita, sed tum legis nomine notatur magis status animi, legem vel detinentis in iniustitia; vel exprimentis, Spiritu fidei & charitatis: hic enim apud veros fideles est ipsa imago Dei (*attributorum diuinorum & æternæ voluntatis simulacrum, ipsorumque mandatorum exteriorum typus*) interius viuide,



instaurata. Conf. Rom. I, 18. VIII, 2, 3. Atque hic *conceptus*  
*subjectivus*, de Spiritu diuinitus collato, est simplex, adeo-  
 que facillime ad legis impletionem significandam ad-  
 aptandus: ille *objectivus*, licet similiter possit contrahi, ut  
 Apostolus annotat Gal. V, 14. *Tota lex uno verbo completur*  
*isto: Diliges proximum tuum, ut te ipsum*: tamen, ut pluribus  
 Lex præceptis constat, *compositus* est, atque impedit, quo  
 minus statim assequar, qui fiat, ut Lex, quamdiu Spiritus  
 ille manserit, non possit non tota præstari. Simili ut rem  
 illustremus considerandi modo: ipsum Deum O. M. qui  
 suspexerit, qualis in se est, quo simpliciorum de Spiritu  
 simplicissimo sensum potuerit concipere, eo minus aber-  
 rabit; qui autem maiestatem illius miratur secundum *attri-  
 buta* diuersa, etsi nihil perperam facit, tamen per con-  
 templationem quasi partium exteriorum, facilius errori  
 fuerit obnoxius. Quemadmodum ergo quispiam nega-  
 uerit v. c. iustitiam Dei *vindicatiuam*, ex eo, quod hanc  
 cum amore Dei, misericordia, & reliquis bonitatis infini-  
 tæ respectibus, conciliare nesciat, immemor integerrimæ  
 lucis, quæ *consumens ignis est* Hebr. XII, 29. ita non mirum  
 pariter, quod præceptionem legis variam, ipsiusque sub-  
 limiores partes respicienti, difficile videatur creditu, ipsa-  
 rum nullam deesse hominibus, *primitias Spiritus* adeptis.  
 Fatendum equidem, in comparatione data inesse dissimili-  
 tudinem; in uno tamen illo, quod quærimus, una eadem-  
 que est prorsus ratio: videlicet, complurium *effectuum*, per-  
 tinentium ad unicum operationis principium, nullos ne-  
 gandos, ubi hoc æque ad eos determinatur in *Subjecto* ido-  
 neo. Sumatur obuium magis simile ex *genere naturalium*,  
 e.g. de efficaci medicamento, præstante virtutes plurimas;  
 vel, de igniculo, innumeras conclauis latebras illuminan-  
 te.



te. Quis rerum harum adhuc ignarus, sibi persuaserit, tam multiplicem efficacitatem effluere ex uno spiritu, aut semine, aut lumine minutissimo? Videbantur singulae Totius partes non posse impleri, nisi unaquæque seorsim suum semen, aut suum proprium lumen, reciperet. Cujusmodi cogitatio, ut ex virtutum quarundam naturalium inficitia poterat provenire, sic multo magis similiter hæsitatio occurrit in diuinis, multo sublimius se habentibus. Quo Christus ipse digitum intendit Matth. VI, 22, 23. *Lucerna corporis est oculus, si oculus tuus simplex fuerit, TOTUM corpus tuum lucidum erit: quod si oculus tuus malus fuerit, TOTUM corpus tuum tenebrosum erit. Ergo si lumen, quod in te est, tenebrae sunt, ipsæ tenebrae quanta?* Et Luc. XI, 33, 34, 35, 36. *Nullus, si lucernam accenderit, in occulto ponit eam, neque subter modium, sed in candelabrum, ut, qui ingrediuntur SPLENDOREM videant. Lucerna corporis est oculus: cum igitur oculus tuus fuerit simplex, TOTUM quoque corpus tuum lucidum erit: cum veromale fuerit, etiam corpus tuum tenebrosum erit. Considera ergo, num lumen, quod in te est, tenebrae sint. Itaque si corpus tuum TOTUM lucidum fuerit, NON habens ALIQUAM PARTEM tenebrosam, erit lucidum TOTUM, ut cum lucerna fulgore te illustrat. Loquitur sane hic Dominus de Lege, subjective spectata, de statu oculi, seu intentionis animi, qua homo omnes totius sui negotii partes considerat: quæ vel lex peccati & mortis est, vel lex spiritus vitæ in Christo Jesu. Rom. VII, 24, 25. VIII, 2. dominans, vel caro, vel Spiritus. Gal. V, 16, 17. Sicuti ergo oculus se habet ad corpus & partes corporis, sic caro vel spiritus ad observationem mandatorum Dei. Lucerna si pleno aliquem fulgore illustrat, totum ejus lucidum est corpus, non amplius habens tenebrosam partem aliquam; ita, si lex Spiritus per regenera-*



tionem cor hominis irradiat, *LEX* etiam *TOTA* externa impletur eatenus, ut ejus pars nulla sit, cui spiritualis mens atque indoles, in animo humano per Spiritum fidei accensa, non respondeat, vitamque reddat conformem. Hæc utique est ipsa Christi sententia, quam similitudine ista declarare voluit! Atque illud ipsum est, quod ex Pauli ore contendimus; si lex per fidem stabilitur, & exinde renati non secundum carnem, sed secundum Spiritum ambulant, nullius præcepti impletionem ipsis derogari posse.

Quod autem hæc veritas ex *definitione* Legis *simplici* & *subjectiva* tam facile illucescat, & contra ex *objectiva*, & *composita* præceptorum consideratione, plerumque sit incomprehensa, vel perceptu difficilior; id ipsum etiam augetur inde, quia mandata pleraque, præsertim sublimiora, per *interdictionem* ac *negationem* tradita sunt. At vero Lex, ut voluntatis æternæ effigies secundum originem est suam, non directe præ se fert *relationem* illam ad vetanda mala, sed ex se respicit *bonum* unice, quod sola charitate, e Spiritu Dei haurienda, metitur, creatis mentibus præscribendum: induit autem formam enunciandi potissimum *negatiuam* propter τὸ ἀδύνατον Rom. VIII, 3. qua indicatur, per *lapsum*, & contractum carnis dominatum, non potuisse Deum *lapsis*, ut talibus, præcipere charitatem, *in se spectatam*, quia ne percipere quidem amplius homines verum de charitate sensum, nedum ipsum *charitatis regnum* admittere, aut huic præstare obsequium poterant; sed incipiendum esse a *regno cupiditatis* destruendo. Rom. VIII, 7. Conf. *Augustin. de Doctrina Christi*. l. III. c. X. Verum enim vero erratur vehementer, si *Mosaicam* istam *Legis Figuram*, non de *stantibus* aliter, quam de *pristina lapsorum* conditione,



ne, sumendam esse duxerimus. Hac, opinor, re discussa, nullum restabit obstaculum, quod aditum ad veritatem præsentissime introspectiendam remoretur. Quapropter illico videndum, (1) quomodo præcepta, præsertim *negantia*, ad *irregenos* pertineant; & (2) quomodo post *Conversionem* eadem non porro habenda sint tanquam repagula, quibus deterreantur *regeni* a partibus legis adimplendis. Ad *PRIMUM*, non abs re fuerit, in meditationis huius subsidium vocare, quod *Lex subintrasse* dicitur Rom. V, 20. Νόμος παρεῖσθαι, *lex præter* (bonum, quod aderat) *introiit*. Quemadmodum enim sola salutis causa post lapsum diuinitus constituta est in *Euangelio*, seu promissionibus de miseratione Dei usurpandis; atque interim accidit, ut præterea opus lege esset prohibitiua, qua *lapsus* aueretur, id est, ne, seria peccati agnitione posthabita, impediretur fides: sic ipsa Lex, si a lapsu, vel præterito, vel futuro, abstrahas, in se spectata, in solidum versatur circa bonum, nec speciem illam, quæ in litteris de malo *negatiua* est, *per se* assumfit, verum *per accidens*, ut lapsuris vel lapsis prouideret. Et quidem isthoc sensu confirmat Apostolus, sciendum hoc ipsum, quod Lex justo non posita, καὶ τὰ, sed legis contemtoribus, & iis, qui subijci nolunt, impiis & peccatoribus, nefariis & profanis, patricidis & matricidis, homicidis, scortatoribus &c. & si quid aliud sana doctrina oppositum est, ἀντίκειται: nec non sciendum, quod bona sit ipsa lex, (in natura sua originali, atque ita etiam reperiatur in littera) si quis ea utatur legitime, νομίμως, secundum rationem natiuo modo ipsius propriam, h. e. si quis a litteræ pedagogia ad Spiritus fidei ac charitatis exercitium perductus fuerit. 1. Tim. I, 8, 9. Lex idcirco, quatenus in litterarum monumentis posita, est opposita omni malo, tanquam doctrina sana & salutaris, aduer-



uersus insanas corruptorum hominum opiniones atque inclinationes adhibenda. Conf. Ps. XLIX. & CXLIV. Quibus peruersitatibus ut *opposita* est, ita & præmissis pollicitationibus Euangelicis *apposita* subintravit, προσετέθη, ad transgressiones illas arguendas, ut iterum *Paulus* monet Gal. III, 19. addens, *usque quo venisset semen illud, cui facta est promissio.* Postquam etenim semen ipsum aduenit, CHRISTUS, de Lege interrogatus hic respondit non *negatiue*, sed *affirmatiue*, juxta primigeniam ejus indolem: *Diliges Deum tuum, diliges proximum tuum.* Matth. XXII, 37. 39. significaturus, id quod Johannes interpretatur c. I, 17. Legem illam, *per Moysen datam esse*; at se venisse, qui ipsam gratiam, legis impletionem SVAM, nobis imputandam, & ipsam charitatis veritatem, legis impletionem intra nos instaurandam, efficeret. Nam *littera occidit, spiritus autem viuificat.* 2. Cor. III, 6. At vero cur data est hæc littera, occidens? quia per eam *agnitio peccatorum.* Rom. III, 20. Et NEGATIVE PROPOSITA SVNT PRAECEPTA, inquit Chemnitius L. Th. de nono & decimo præcepto: *quia lex data est, ut non tolleretur peccata, sed ut abundaret delictum.* Rom. V, 20. Quando enim prohibetur in omnibus *concupiscentia*, cujus superandæ potentia impius vel hypocrita adhuc destituitur; exsuperante peccato, Lex demum ad *pedagogiam* emergere potest, compellens ad Christum. Rom. VII, 13. 23, 24, 25. Gal. III, 24, 25. Quo utroque loco simul additur, quod ad ALTERVM, nobis jam ostendendum, spectat; apud *justificatos* non eundem, sed alium prorsus statum esse, ut *victores agant Deo gratias per Jesum Christum*, neque sub pedagogo sint amplius, sed *adoptionis testimonio* fruantur. Cur enim, ut iterum utamur interrogatione, *littera legis occidenti* opponitur, *Spiritus*, & hic dicitur *viuificans*? An forte, si *renatus*, Spi-  
ritu



ritu Christi animatus ac munitus, audiat de fugienda idololatria, concupiscentia &c. vel etiam sentiat aliquid ejusmodi tentationum; ut istum putet, se non amplius stare in omnibus præceptis, se vitam ex Deo circa hanc, illamve partem, non retinere? Absit! immo vero Spiritus fidelibus *viuificans* tribuitur, quod, quamdiu tales sunt, possideant illum, ipsamque tueantur *vitam* juxta omnia & singula præcepta, licet contra *carne* afficiantur; secundum quam nimirum non ambulant, sed secundum *viuificantem dominum*, qui & in ipsis est manetque, non secundum aliquas, sed omnes legis partes. Ponamus, *datam legem fuisse, quæ viuificare posset*. Quid inde sequetur, nisi *vere ex lege justitiam esse*? Ita infert Paulus Gal. III, 21. pergens; *Sed conclusit Scriptura omnia sub peccatum, ut promissio ex fide Jesu Christi daretur credentibus. v. 22. Cæterum hanc Spiritus Sancti promissionem veri Credentes nacti sunt; quæ nihil aliud est, quam Spiritus fidei, Rom. III, 27. Lex spiritus vitæ in Jesu Christo. Rom. VIII, 2. 2. Cor. IV, 13.* Quid hinc colligemus? An non vere jam ex hac lege justitia? omnino, quæ ex fide Jesu Christi ipsis tribuitur. Sed anne & vera ex Spiritu fidei existit justitia, quæ producat in nobis? Omnino: nam fideles *PLENI sunt fructibus justitiæ, qui per Jesum Christum fiunt ad gloriam & laudem Dei. Phil. I, 11.* Ita proinde Moses per litteram *negatiuam*, occidendo illuminat; Christus contra per spiritum *positiuum*, viuificando illuminat. 2. Cor. III, 7, 8. &c. Eph. V, 14. ex Es. LX, 1. Conf. Luth. Comm. ad Gal. passim. Ne quid vero scrupuli relinquatur, quærimus & hoc; num ex fidei lege *justificatio* fluat, tam per justitiam renatis inhærentem, quam per justitiam e Christo imputatam. Negamus autem id constanter: non, ac si Spiritus Christi haud integram, ad omnes legis



partes, obedientiam pariat; verum ideo, quod iustitia inchoata non existit, nisi penes hominem jam tum *iustificatum*, nec iudicium diuinum adæquare potest *gradibus*, quibus perficiendis carnis reliquiæ semper obstant. Atque hinc discendi occasio suppeditatur, quo quidem pacto, post *Conuersionem*, regenitis Legis Mosaicæ usu adhuc opus sit: neque enim *Antinomorum* castra sectamur. Et si namque ipsi, ad Deum vere conuersi, legis Spiritum secum ferunt, tamen causa, ob quam littera legis data est, nondum cessat apud eos prorsus. Sublata sunt, fateor, peccata pristina; ast, ne caro apud hos recrudescat, non tantum ex spiritu corroborandi, sed subinde ex littera quoque nouis de insidiis ac periculis commonefaciendi erunt. Interea Fideles hunc legis stimulum multo aliter experiuntur, quam quibus Lex opposita ante *Conuersionem* est. Hi *sub lege* sunt ita, ut *Lex contra ipsos* sit, ius maledicendi & cogendi exercens: illi non *sub lege* sunt, quia aduersus id, contra quod lex est, etiam ipsi sunt, *carnem crucifigentes cum affectibus & concupiscentiis, spiritu & uiuentes in* intrinsecus, & extrinsecus quoque *incedentes*. Gal. V, 18. 23, 24, 25. Conf. Rom. VI, 14. Ecce! si contra regenitos lex non est, quæro, an ulla ejus pars, seu præceptum, non impletur ab iis? simulac enim haud impleretur ullum, lex contra ipsos esset, ipsique sub lege essent. Jac. II, 10. Quod interim afficiantur carne & lege moneantur, id ipsos non *extra* vel *contra* legem constituit, quales hæc inuenit labentes vel lapsos; sed *stantes* exsuscitantur modo in pace & custodia sua, possessione ac munimento, quo contra mandatum nullum excidunt, quamdiu tales permanent. Phil. IV, 7. *Sunt complentes legem Christi*. Gal. VI. 2. *nam Deus* *carit*



*charitas est : & qui manet in charitate, in Deo manet, & Deus in eo.* 1. Joh. IV, 16. Hanc legem Christi implentes, an Mo-  
 fis præceptum aliquod haud impleant? Immo vero hi  
 dudum, lege Moſis (quod ad primum & proprium ipsius  
 uſum, in augendo peccato conſiſtentem, attinet) ſuperiores  
 ſunt, tanquam vetere illo *marito mortuo, in quo ante Con-*  
*uerſionem detinebantur*; nunc *ſeruientes Deo in nouitate ſpi-*  
*ritus, ac non in vetuſtate litteræ.* Rom. V, 20. VII, 6. Dixeris;  
 negatiuum illud tamen non implent: *Non concupiſces.* Quod  
 ſupra probatum dedimus, urgemus firmiter. Hæc nega-  
 tio minime *CONTRA ipſos* poſita eſt, qui dudum habent  
 ex fide & charitate illud, ob cuius defectum accuſat alios,  
 nondum ad Deum reductos. Qui autem cum Deo uniti  
 denuo ſunt, annon repleti ſunt manentque (dum perſi-  
 ſtunt in eo ſtatu) concupiſcentia bona & vera, *Spiritu con-*  
*cupiſcente* Deum atque omne bonum, & *concupiſcente con-*  
*tra ipſam carnem*? Gal. V, 17. a qua utut afficiantur, tamen  
 non deturbantur ex præſidio ſuo, quod tam in *primo & ul-*  
*timo*, quam in reliquis omnibus præceptis retinent, im-  
 plentes omnia eatenus. Quatenus vero carnis affectum in-  
 iuncti etiamnum ſentiunt, non ſecluduntur eo a legis exple-  
 tione vera, quam *inchoate* præſtant ipſo *actu* continuo &  
 ſtatu; ſed adiguntur ad agnoſcendam rationem adimplen-  
 di imperfectam, & *perſiciendam ſanctificationem in timore*  
*Dei, purgantes ſe ab omni inquinamento carnis & ſpiritus* 2.  
 Cor. VII, 1. Sicut igitur Protoplaſti ante lapſum interdi-  
 cto de arbore uti poterant, & tamen perſiſtere in perfe-  
 ctione ſua; ſimiliter renati, qui aduerſus legem peccato  
 afficiuntur quidem & læduntur, quoad tamen veritatis  
 ſpiritum retinent, Legis parte excutiuntur nulla, ſed certo  
 modo in ea omni perſtant. τὸ ἀδύνατον, quod potentiæ de-



erat ante fidem, sublatum est *nomine Domine Jesu*, viresque *sanctificantes* substitutæ sunt *per Spiritum Dei nostri*, ut pars nulla sit legis, quæ non instaurata in ipsis & stabilita sit tam solide, ut *abluti illi, & sanctificati & justificati*, nullo modo redigantur *sub ullius rei potestatem*, verum agglutinati Domino, unus cum eo Spiritus sint. I. Cor. VI, II, 12. 17. Quicquid igitur τῆ ἀδυνατίης superfuerit, non potest ad Legis partes referri, quarum nulla est non repleta penes sanctos virtute Spiritus Sancti: pertinebit ergo tantum ad gradus, tanquam ea incrementa seu partes, quæ minus principales sint, hoc est, quarum aliquo defectu perfectio totius integralis, quæ in Spiritu fidei & charitatis integra est, non aboleatur. Et committitur hinc fallacia a dicto simpliciter ad dictum secundum quid, quando, quod simpliciter aduersus impios dictum est in lege, *non concupisces*, tanquam destitutos Spiritu tam ratione partium, quam graduum; id eodem sensu ad vere conuersos rapitur, ac si & de his ipsa integritas partium negaretur, qui dudum fundati in Spiritu juxta omnem legis partem sunt, nec tales deficiunt, nisi secundum quid, impediens gradum, atque hoc respectu lege *negatiua* utuntur. Qua obseruata sequiore Legis interpretatione atque applicatione, ejusdemque vero apud regenitos usu patefacto; simul cognoscitur, *Euangelium & legem* haud confundi eo ipso, quod docetur cum Paulo & Libris Symbolicis, ipsam legem & in *basine* stabiliri per fidem, ipsumque verum Legis Spiritum esse illum, quem Euangelium affert, sensumque ejusdem *affirmatiuum* ipsam inferre charitatem, per quam fides sese exserit, atque illum natura priorem esse *negatiuo*, utpote qui ex illo pendet. Matth. XXII, 40. Quod si denique, ut euictum est, præceptio Legis Mosaicæ *negatiua*, propter lapsum modo arguen-



guendum, apud nondum vere conuersos *proprium* suum  
 usum inuenit; deinde autem apud vere conuersos & stan-  
 tes, non *ante* impletionem legis *positiuam*, sed *post* eam &  
 fundatam & durantem, & quidem non nisi *indirecte* minas  
 adhibet propter carnem, tanquam hostem deuictum,  
 qui extra cordis propugnaculum vim recolligit; nec ve-  
 ro victor atque impletor legis Spiritus inuaditur, quin  
*omnia ignita aduersarii jacula scuto fidei extinguere possint* ab  
 iis ipsis, *indutis thorace iustitiae, & habentibus lumbos veritate*  
*circumcinctos, calceatosque pedes praeparatione Euangelii pacis*;  
 Eph. VI, 14, 15, 16. etiam atque etiam videmus, *negatiuas* illas  
 interdictiones perperam intelligi, si apud *stantes* contra  
*partium Decalogi impletionem* sumantur, easque hanc potius  
 suo relinquere loco firmatam in fidelibus, neque in ipsis,  
 tanquam Christi Spiritu completis, quidquam accusare,  
 nisi *imperfectiorem*, quam caro iis affricat, semper aliquid  
 de gradibus vel detrahens vel impediens.

NOTA. Non alia est *Lex Christi*, & alia *Lex Moysis*; sed  
 utraque unius eiusdemque est *substantiae*, lex moralis, æ-  
 ternæ & immutabilis iustitiæ, seu præceptiuo seu prohi-  
 bitiuo tradatur modo, ita ut unus altero etiam includatur.  
 In Scripturis quidem aliquando discernitur ita lex, non  
*realis* differentiæ causa, at *formali tamen* distinctione  
 quadam, & ex eo fundamento, quod Lex, *Moysis* di-  
 cta, secundum primum & proprium ipsius finem atque  
 usum, respicit hominem irrogenitum, redigendum ad *re-*  
*gnantis peccati lapsusque*, omnes humanas vires exsupe-  
 rantis, vim cognoscendam, ipsamque ad *pedagogiam*; at-  
 que hinc formam præceptionum *negatiuarum* præ se fert  
 potissimum: quando autem dicitur *Christi Lex*, respicit  
 hominem regenitum, in quo Spiritum charitatis, quem



Moses *implicite* omnino, sed remotius exigit, *explicite* ac proxime ex fide supponit ac requirit; proptereaque forma loquendi *affirmativa*, seu *positiva*, uti solet. Utraque obedientiam omni ratione perfectam intendit, tametsi modo insigniter diuerso. Lex, Moſis dicta, id præſtat, *directe & formaliter* homines lapsos intuendo, & vetando maxime, actus *intrinſece* malos omni tempore & sub omnibus *circumſtantiis*; *indirecte* simul damnans eorum principium *habituale* connatum, & requirens habitum atque actus oppositos spirituales bonos. Eadem vero Lex, ut Christi in Nouo Testamento dicitur, idem vult, *directe & formaliter* homines renatos iubens custodire *charitatem*, seu *veritatem*; Eph. IV, 20, 21. *indirecte* simul habitum atque actus oppositos quoscunque corripiens, sed cum ἐπιεικεία Evangelica. Vocatur autem Lex Christi *noua* Joh. XIII, 34. non ob noua præcepta, quæ Moſis lege non fuerint comprehensa, ut *Sociniani* frustra opinantur; sed ob nouam gratiæ *oeconomiam*, qua Christus ipsum charitatis Spiritum afferebat, cum Moſes contra modo litteram aperuiſſet, Pharisei autem plurimis commentis deprauaſſent eam; quibus etiam *poſterioribus* necessario antiquandis, vera & unica lex, tanquam renouanda in Spiritu & veritate, opponitur. Ita ſemper in hac cauſſa cogitandum illud Joh. I, 17. *Lex per Moſen data: gratia & veritas per Jeſum Christum facta.* Illustrationis uberius ergo lubet apponere interpretationes duas, quæ poſt alias leguntur in GERHARD. Harmon. Euangel. cap. CLXXIV, 5. *Nouum vocat Christus dilectionis mandatum, quia ad nouum hominem per Spiritum Sanctum renouatum pertinet, & non niſi nouo Spiritu a Christo accepto impletur. Hanc rationem itidem proponit Iohannes: Mandatum nouum ſcribo vobis, quod verum eſt in ipſo & in vobis, quia*



quia tenebrae transierunt, & verum lumen jam lucet. id est, sicut in Christo est vera ac sincera dilectio, ita quoque eadem in vobis vigeat; atque hactenus praeceptum dilectionis est nouum, quatenus requirit cor per Spiritum Sanctum renouatum, ut Christum in dilectione imitari possimus. Veteres tenebrae ignorantiae errorum ac impietatis transierunt, ac noua & vera lux per Spiritum Sanctum in cordibus vestris est accensa; ideo in vobis per Spiritum jam illuminatis & renouatis, nouum illud dilectionis mandatum verum est, ut est in Christo verum, id est, OPERE COMPLETUM. Mandatum Mosaicum seruabatur Spiritu timoris & seruitutis: Christi praeceptum seruatur Spiritu amoris & libertatis; quam rationem huius appellationis profert Lyranus in b. l. Huc referri potest, quod August. tract. 65. in Job. disputat, praeceptum dilectionis vocari nouum, quia nos renouat; id est, per dilectionem testamur, quod simus in Christo noua creatura, Gal. VI, 15. cum non nisi renouatus per Spiritum Sanctum nouum hoc mandatum implere possit. Cur nouum, inquit, a Domino appellatur, quod tam vetus esse conuincitur? an ideo est mandatum nouum, quia exuto vetere induit nos hominem nouum? innouat quippe audientem vel potius obedientem, non omnis, sed ista dilectio, quam Dominus mandat &c. Dilectio ista nos innouat, ut simus homines noui, heredes Testamenti noui, cantatores cantici noui. Hec dilectio innouauit Patriarchas, Prophetas, Apostolos, ipsa & nunc innouat gentes, & ex uniuerso genere humano colligit populum nouum, corpus nouae nuptae Filii Dei unigeniti sponse. Nouum vocatur dilectionis mandatum, quia nouo modo a Christo est promulgatum. Et Moses & Christus idem dilectionis mandatum proponunt, sed non eodem modo. Moses rigidissime perfectam & omnibus numeris absolutam charitatem requirit, quae exactissime cum norma legis diuina congruat; proinde etiam accusat & damnat omnes, quotquot non praestant perfectissimam illam obedientiam. Christus vero per ἐπιείκεια Euangelicam rigorem illum



lum mitigat, INCHOATAM & PERFECTAM credentium charitatem, modo sit seria & ἀνυπόκριτος, paterne acceptat, adhaerentem imperfectionem & immunditiem merito suo tegit. &c. Moses tantum precipit charitatem, sed non subministrat vires, ut præceptum illud implere possimus. Christus vero per Spiritum Sanctum largitur vires præstandi quod jubetur. 2. Cor. III, 7. Gal. III, 2. Mosaica lex circumdata & involuta erat variis ceremoniis, Christus autem legem dilectionis ab illis quasi repurgat, sicque mitigat graue legis jugum, quod innumera ferme præcepta continebat, quæ omnia ad unum dilectionis præceptum reuocat. Thomas in b. l. Omnis charitas est noui Testamenti, quemadmodum & gratia; quoniam Christus, qui noui Testamenti est auctor, charitatem & gratiam meritus est hominibus utriusque Testamenti. Merito ergo potest mandatum amoris dici nouum, siquidem charitatis est, quæ ad Nou. Test. pertinet. Quamuis ergo Mosaica lex itidem ad dilectionem homines urgeret, tamen quia multis appendicibus, ceremoniis & constitutionibus erat quasi implicita, & quodammodo obruta; ideo charitatis doctrina non tam clare ibi effulsit & emiuit, sublatis vero in Nou. Test. illis appendicibus & umbris, ejus lux clarius apparere coepit. Breuioribus integram mentem eorum, quæ notare hic voluimus, sistit AEGID. HUNNIUS in Exposit. Epist. ad Rom. c. XIII. p. 456, 7. Expletur lex Dei a Christianis, non in ea exquisita perfectione, qua initio per Moysen lata est; sed prout Christus in Nouo Testamento præceptum charitatis renouauit, idque respectu eorum, qui jamjam iustificati sunt, sic attemperauit, ut Deus propter Christum inchoatam ipsorum nouam obedientiam non velit secundum rigorem iustitiæ suæ examinare, nec damnare renatos, si maxime non assequantur exquisitissimam illam perfectionem legis diuinæ. Atque hoc discrimine præceptum charitatis a Jobanne vetus & nouum dicitur. Vetis quidem, quemadmodum in Veteri Testamen-



to per Moſen latum eſt. NOVUM autem eo modo, quo a Chriſto in novo Teſtamento (ſublato illo intolerabili jugo, rigore & damnatione legis) renouatum eſt. Sicut inquit Job. XIII, 34. Præceptum nouum do vobis, ut diligatis inuicem. Ergo MOSIS LEX impleri a nobis non poteſt: LEX CHRISTI autem, quam de charitate colenda nobis præſcripſit, POTEST ab hominibus renatis IMPLERI. Quemadmodum ſcriptum eſt Gal. VI. inuicem alii aliorum onera portate, & ſic complete legem Chriſti. Et rurſum, 1. Job. V. In hoc cognoscimus, quod diligamus filios Dei, cum Deum diligimus, & præcepta ejus ſeruamus. Hac enim eſt charitas Dei, ut præcepta ejus ſeruemus; & præcepta ejus graua non ſunt. Idem in Quæſtionibus & Reſponſionibus de juſtificatione p. 203. PRAECEPTUM CHRISTI de dilectione NUMERO IDEM eſt cum MOSIS PRAECEPTO; differt autem ab illo, quatenus Moſes rigidiffime exigit abſolutam dilectionem. Chriſtus autem illud præceptum de diligendo proximo ſic mitigat, ut inchoato obſequio ſit contentus, dummodo a SERIO STUDIO ANIMORUM promanet. Et hac ratione præceptum dilectionis jam Chriſti præceptum, Chriſtique Lex dicitur: cujus PRAECEPTA VERE GRAUIA NON SUNT, quandoquidem id, quod in lege erat intolerabile jugum, abſtulit ipſe a nobis, & in ſuos humeros tranſtulit; exigens quidem a Chriſtianis charitatem mutuam, ſed ita, ut perfectionem abſolutam illam per Moſen requiſitam non flagitet. Ceterum eo minus graua ſunt ejus præcepta, quod SPIRITVM SVVM SUBMINISTRAT, AC VIRES LARGITUR AD OBEDIENDVM SVIS MANDATIS. Quæ ἐπιείκεια, ſeu mitigatio requiſiti obſequii, locum quidem habet extra forum juſtificationis apud homines jam reconciliatos & juſtificatos; nequaquam vero in ipſa juſtificatione, ubi Deo pro peccatis æquiuacente λόγῳ abſolutiſſimo ſatisfaciendum eſt, cui rei omnium Sanctorum obedientia & dilectio par eſſe requirit.

§. IV. Propositionis demonſtrandæ fundamenta poſuimus duo: primum, in ipſa legis natura ſitum, quatenus



nus per Fidem stabilitur ipsa vere & *totaliter*; alterum, peti-  
 tum ex indole usus legis apud renatos, qui in his nullam  
 ejus partem sublaram esse arguat, licet hanc illamue ur-  
 geat instaurandam, magisque excolendam. Firmamus  
 utrumque adhuc aliis Scripturæ testimoniis, ut veritas di-  
 uina omnem rationis hæsitacionem superet. Non simula-  
 tum, sed omnino serium Christi verbum esse Matth. XIX,  
 19. *Si vis ad vitam ingredi, serua mandata: testatur Apol. Aug.*  
*Conf. p. 83. & 115.* Optime hanc Apologiæ interpretatio-  
 nem defendit Wolffg. FRANZIUS de *interpret. Sac. Script.*  
 p. 551, 2. Nequaquam, inquit, Christi mens fuit, quasi quærenti,  
 quid faciam? omissa Euangelica fide, respondere voluerit de FA-  
 CERE, & ita tantum FACIENDA & SERVANDA monstrare, &  
 hoc ipso simul impossibilitatem operum allegare Christus. Serio &  
 sancte hæc admonuit Christus, non simulate, non ambigue, aut per-  
 plexe respondit, sed talem dedit responsionem, qua & in sese est veris-  
 sima, & quam omnes concionatores hodie suis inculcare debent audi-  
 toribus, quod SERVANDA ET FACIENDA SINT MANDATA,  
 SI VOLUNT AD VITAM INGREDI, UT HOC PACTO DI-  
 STINGUANTUR VERE CREDENTES A NON VERE CREDEN-  
 TIBUS. Vere credentes sciunt, se justificari sola fide; sed tamen no-  
 runt simul, justificados fide non debere vivere suis arbitriis juxta suum  
 beneplacitum, in impuritatibus. Hoc enim pacto testificantur, se veram  
 intus habere fidem, quia fides per charitatem est efficax. Gal. V, 16.  
 Fidem habebat hic adolescens, alias a Christo nihil serio amplius edoceri  
 petiisset. Prorsus similis est ratio Luc. III, 7. ubi omnis turba baptizatur,  
 sed post baptismum susceptum veniunt ordine, & querunt ibidem a Jo-  
 hanne 1. turba, 2. publicani, 3. milites, quid jam post baptismum facere  
 debeant; quibus singulis sua bona opera præscribit, non ad justi-  
 ficationem conducentia, sed justificatorum signa externa infallibi-  
 lia



*lia*, ne quis dicat, se credere, & tamen pessime vivat. QUO UNO NOMINE MALE AUDIUNT NOSTRAE ECCLESIAE APUD AMICOS ET INIMICOS EXTRA ET INTRA GERMANIAM. Unum igitur & eundem finem propositum sibi habent (1) admonitio Christi ista, (2) admonitio Jobannis jam dicta. Congruit cum iisdem Jacobus Apostolus cap. II. CARPZOVIUS Isag. in Aug. Conf. & Apol. p. 285. hæret quidem in sensu nescio quomodo post Reformationem Evangelicam ab aliquibus mutato, ac si audacia humana, iis confundenda, accusaretur: non potest tamen non fateri, explicationem *Melanchthonis*, seu *Apologiae*, esse orthodoxam; quod nobis hoc in loco sufficit. Itaque docet orthodoxa Ecclesiae nostrae doctrina, non quidem sine Christo, sed hoc vere agnito ac recepto, mandata Dei servari, fierique legem posse; ut laudata *Apologia* toties totiesque clamat. An vero non alienum ab ea sententia fuerit, de præceptis Dei, ad servandum propositis, statuere, primum vel ultimum excludi? Ipsa *Apologia* p. 83. 84. ubi sententias confirmat de lege facienda, magno studio vitandum monet, ne legem accipiamus de ceremoniis, vel externis tantum operibus; eamque maxime exponit de motibus cordis & affectibus, tanquam iis, quæ sunt propriae legis divinae, pertinentque ad mandatum primum atque ultimum.

Idcirco observamus porro, TOTIUS Legis impletionem dici charitatem. Malumus hic AEGID. HUNNII commentatione, quam nostra uti, in cap. XIII. Ep. ad Rom. Qui diligit alterum, legem explevit; non quidem in ea perfectione, qua lata est lex, sed pro hujus vitæ modulo: ubi Deus propter obedientiam filii sui, nostram quoque licet inchoatam, seriam tamen, & a filiis profectam obedientiam, paterno favore acceptat, regens defectum & imperfectionem obsequiorum nostrorum me-



rito perfectissimæ obedientiæ Christi. Cum autem dilectione legem expleri dicat, dilucidius nunc explanat per enarrationem præceptorum secundæ tabulæ; quorum **SINGULA** ad hunc scopum & finem directæ sunt, ut proximus diligatur. Siquidem illa: non moechaberis: non occides: non furaberis: non falsum testimonium dices: **NON CONCUPISCES**: summam in hoc capite, tanquam compendio, continentur: diliges proximum tuum, sicut te ipsum. Quemadmodum ipse Christus Matth. XXII. totum Decalogum in hæc duo capita redegit; primæ quidem tabulæ præcepta sub hoc comprehendens mandato summo: diliges **DEUM** tuum ex toto corde, tota anima, & omnibus viribus: secundam vero tabulam sub altero præcepto, quod primo illi magno mandato simile sit, complexus est; nempe: diliges proximum tuum, sicut te ipsum. Qui ergo vera charitate præditus est, is proximo non operatur malum; id est, is non occidit proximum, non violat ipsius thorum, non bona ejus per furtum aut rapinas inuolat, non falso testimonio illum grauat, non res ipsius concupiscit, sed eas potius augeri proximo suo capit; & ut summam cum Apostolo concludam: Consummatio legis est dilectio, eo nimirum sensu, qui paulo ante est expositus. Ecce! manifestissimum ac luce omni clarius, partem Decalogi postremam non eximi ab ea legis impletione, quæ charitati, per quam fides se exserit, tribuitur. Quapropter & illius, **NON CONCUPISCES**, impletio est charitas. Quo spectat, quod HOPFNERUS de Justificat. Disp. VII. aphor. 4. affirmet, hanc sinceram & seriâ caritatem suam, qua quis ita diligit Deum, ut luctans cum amore creaturarum, non patiatur ab eo se vinci & subigi, cuilibet renatorum infallibiliter cognitam esse posse. Atque id ipsum toto cap. VIII. ad Rom. docetur, quando Apostolus demonstrat, veros fideles non esse carnis debitores. v. 12. Hanc enim conclusionem infert ex certis rationibus; quoniam

Spiri-



*Spiritus Dei in ipsis habitet, qui & legi subjiciatur, sensuque illo, quem efficiat, & pacem & vitam præstet, ita mortificans actiones corporis contrarias, ut ipsum adoptionis testimonium persistat. v. 6, 7, 9, 10, 13, 14, 16. Cum autem idem charitatis Spiritus, qui legis impletio existit, in renatis, qui concupiscentia tentantur quidem, sed non vincuntur, factam a Deo mansionem (Joh. XIV, 23.) tueatur ac retineat; ecquis non videt repugnantiam in eo, si quis nihilominus asserere audeat, partem legis ultimam, de non concupiscendo, non impleri! Fieri sane quolibet tentationis prauæ affectu, ut gradus, a lege requisitus, in hac vita non obtineatur, extra disputationem est: partem vero legis seu charitatis illam, quæ vel primo vel postremo constat præcepto, durante charitatis Spiritu & vincente, amitti aut cessare, tanquam non seruata; non minus repugnat, quam sincerum diem propter nubeculas quasdam noctem esse, vel, viuentem hominem, propter valetudinis incommoda, quæ tamen curentur, nihilominus statuere mortuum. Neque aliud sibi vult Paulus Gal. V, 14. &c. asseuerans, universam legem una dilectionis mentione compleri; addensque licet in contrarium caro concupiscat, tamen, si non perficiatur ejus cupiditas, sed homo aduersus eam incedat Spiritu, atque hoc ipso ducatur, propterea ipsum non sub lege esse, v. 18. nec legem esse contra eum, seu contra Spiritus fructus, quibus constanter is operam dat. Nam Spiritus fidei, & charitatis, & legis, est unus Spiritus, immo unus cum Deo Spiritus. 1. Cor. VI, 17. quo, qui Christi sunt, crucifigunt carnem cum affectibus & concupiscentiis (conf. Rom. VIII, 13.) atque ita victoriam partam custodientes, eodem Spiritu viuunt, eodem Spiritu incedunt, nec eodem ipso legem implere desistunt, ibid. v. 24, 25. quain diu tales permanent, de quibus sermo est.*



Prætermittimus alia complura loca, quæ huc referri possunt, atque unum modo vexatum illum, quo dicta continentur, respicimus Jacob. I, 4. *Patientia opus perfectum habeto, ut sitis perfecti & integri, in nullo deficientes.* Hic perfectionem partium, ut *necessariam & possibilem* expresse præcipi, nulli dubitamus. In promptu est locus *parallelus* I. Cor. I, 5, 6, 7. *In omni estis ditati in ipso; in omni sermone, & omni cognitione; prout testimonium Christi confirmatum fuit in vobis: adeo, ut in nullo charismate vos deficiatis.* Ex aperta *universalitatis*, affirmantis & negantis, oppositione intelligimus, de credendis atque agendis, ad salutis viam pertinentibus, negari, quod desit eorum aliquid *Corinthis*, expertis Christi efficaciam. Eadem vero verba eundem sensum habent Iac. I, 14. Sic enim docet, varias tentationes inferuire probandæ fidei, luctationi & patientiæ, cujus opus manere integrum debeat ita, ut parte nulla destituatur. De partibus *credendorum agendorumque* id dici, non tantum ex *parallelismo* allato liquet, verum etiam ex *Synonymia* præmissa. Namque *in nullo deficientes*, vocantur eo significato τέλειοι, perfecti, quod ὁλόκληροι sint: hujus autem vocabuli mens optime ostenditur Act. III, 16. ubi ὁλοκληρία est integritas membrorum, claudo restituta. Quemadmodum proinde in *corpore* ὁλόκληρος ille est, qui nec membris, nec membrorum quorundam usu privatus existit: sic etiam in *Spiritu* capiendi ὁλόκληροι, qui nihil, quod mandatum est, hoc est, nullam charitatis seu legis partem, desiderari in se patiuntur. Quam enim *sortem* indepti sunt Christo addicti, habent sane *totam* illam in *spiritu*, quo ipso Dominus suos induit. I. Joh. III, 24. IV, 13. Spiritus hic, fide ac charitate pollens, facile quidem in *varia* defectuum pericula incidit, præsertim ob

car-



carnem contraria concupiscentem; atque ita & *sapientia* & reliquorum adminiculorum indiget, semper instaurandorum: Jac. I, 5. ipsi tamen stantes eatenus *perfecti* atque integri esse & debent & possunt, *Jacobo* restante, ut in *nullo* officiorum genere prorsus *deficientes*, cupiditatibus repressis, Spiritum legis intra se ab earum dominatu integrum conseruent. Conf. 1. Thess. V, 23. Rem omnem *Augustinus* sic neruose comprehendit: *Interroga cor tuum, vide, utrum habeat charitatem. Si est ibi charitas, est ibi PLENITUDO LEGIS; jam in te habitat Deus, sedes Dei factus es.* Tom. 8. Ps. 91.

## PROPOSITIONIS II. DEMONSTRATIO.

### I.

**R**estat; an, si ulla fuerit legis pars, quæ ab iis, qui Christum sequuntur, præstari nequeat, gratia, nihilominus vera in iis statui possit? Nullum quidem esse Decalogi præceptum, quod non seruetur a durantibus renatis, hæc autem veritas, quod tantæ sit necessitatis, ut, ubi aliquid demi aut imminui per contrariam hypothesein videatur, nihil relinquatur. de gratiæ, charitatis, fidei ac salutis habitu, qui in fidelibus necessario inest, ipsaque ita ordinis Evangelici series in periculum incurrat; ut maximum in eo causæ momentum cernitur, sic illud, ne dubium in opinione maneat, ante oculos dilucide adhuc proponendum est. Nec sane dubitationem hujusmodi poterit fouere, qui ex superioribus satis intellexerit, legem impleri uno legis, h. e. fidei ac charitatis Spiritu; qui cum dirimi distrahique non possit, licet circa diuersas res versetur, non unum, vel aliquot modo præcepta *moralia*, sed omnia æque complet, tanquam



quam indiuiduus ipse atque indissolubilis, destinatus uniuersis legis partibus, nulli soli proprius, neque ab ulla secludendus, sed non minus communis semper singulis, quam totus in singulis. Unde planum fecimus dudum, si v. c. ultimum ex præceptis ab aliquo non impleatur, fieri non posse, quin penitus sublata in homine illo gratia sit, vel nondum adfuerit completa ulla.

§. II. Hinc Jacobus cap. II, 10. tam absolute pronunciat: *Quisquis totam legem seruauerit, offenderit autem in uno, omnium reus tenetur.* Augustinus super his ad Hieronymum epist. 29. *Quæso & per Deum obsecro, ut exponas mihi, quod multis spero profuturum, quomodo accipiendum, quod in epistola Jacobi scriptum est: quicumque totam legem seruauerit, offendat autem in uno, omnium reus est.* Ipse autem mox verba Apostolica ex antecedentibus declarans, confirmationem subijcit de inseparabilitate virtutum, nota etiam ex Philosophorum auctoritatibus, quibus omnibus placuerit, eum, qui unam virtutem habet, omnes habere, & qui unam non habet, nullam habere. At enim verum hujus nexus fundamentum, quod illi ignorabant, scite obseruat, consistere in charitatis sancta indole, quæ si, ut finis præcepti, de corde puro & conscientia bona, & fide non ficta, extiterit, 1. Tim. I, 5. una vera & magna sit virtus, merito dicta fortis, sicut mors, Cant. VIII, 6. quia, *SICUT MORS ANIMAM AVELLIT A SENSIBUS CARNIS, SIC CHARITAS A SENSIBUS CARNALIBUS.* Quæ sententia plane diuina, exhaurit omne illud, quod quæritur in hoc negotio. Ponamus finem præcepti istum, *amorem Dei effusum esse in corde ALICVJVS*, Rom. V, 5. certe a sensibus carnalibus defendet ac purgabit animam; nec præceptum quoddam erit, quod non fideliter obseruetur hoc modo, variis licet tentationibus cor afficiatur. Contra ponamus, ab



ab eodem homine præceptum de *non concupiscendo* rursum violari, ipsumque affectibus prauis cedere & succumbere; cur hic reus tenebitur mandatorum omnium, nisi quod charitatis Spiritum perdiderit, magistrum omnium atque effectorem? Cur item Christus Dominus dicit, Matth. V, 19. *Quisquis soluerit unum ex mandatis hisce minimis, & ista docuerit homines, minimus vocabitur in regno coelorum?* Habebantur nimirum pro minimis, quæ ad cupiditatem frenandam pertinerent; quorum si unum solvebatur, quasi vel non deberet, vel non posset impleri, impedita erat omnis gratia & salus, utpote quæ sub dominante carne impetrari haud poterat. Quemadmodum ergo, si quis ita doceret homines, interclusa poenitentia ac fide, interiit *omnis oeconomia Evangelii*; similiter, hodiernum eadem jactura metuenda fuerit, si pars legis ulla perfici negetur posse. Idem est, quod Johannes coarguit Epist. i. c. III, 17. *Qui habuerit mundanas facultates, & viderit fratrem suum egentem, & clauserit viscera sua coram eo, quomodo charitas Dei manet in eo?* Quomodo quis, inquam, clauserit viscera sua coram altero, nisi concupiscens retinere, quod alteri attribuit charitas, piumque hunc affectum reprimens ac supprimens? Nec vero Apostolus inde infert modo, quod proximum erat: quomodo *charitas alterius* manet in eo? sed, cupiditate victoriam recuperante, priuationem charitatis manare longius, ipsamque primam tabulam simul, omnemque gratiam euertere, ostendit, interrogans: *quomodo charitas Dei manet in eo?*

§. III. Præclara quædam affert HULSEMANNUS Disp. XVI. *Man. de libero arbitrio*, quæ ansam hujus rei illustran-



dæ suppeditant. *Præceptorum negativorum summa est, non concupisces, Rom. VII, 7. Quis irrogenitus, solis nature viribus, carentiam inesse debitam ab hoc malo præstare potest? Certe illi omnes sequuntur desideria & cogitationes carnis suæ, non per habitum acquisitum, sed φύσις, per naturam, ut Apostolus ait Eph. II, 3. & soli illi, qui Christum induunt, crucifigunt concupiscentias, Gal. V, 24. Quem igitur actum, cui insit forma, ex lege diuina inesse debita irrogeniti edent? Nec enim substantia actus illa dicenda est, quæ materialia cum vero actu commixta habet; sed, quæ sit vera actus substantia, ex regula agendorum, lege Dei scripta, æstimandum est, uti aliquoties Christiani iussi sunt. Deut. XII, 26. Ezech. XX, 19. Gal. VI, 16. Quibus rectissime docetur (1) in substantia actuum dijudicanda spectandam esse formam, quæ ex lege diuina inesse ipsis debeat: (2) hæc si adsit, videlicet charitatis Spiritus, præstari carentiam, a concupiscendi malo, inesse debitam: (3) hanc ipsam illos, qui Christo induti, crucifigant concupiscentias, præstare. Itaque intelliguntur ex iis luculentissime duo illa, quæ constituimus: primum, habentibus ex fide ipsam legis formam seu indolem, expultricem illam vitiorum, non deesse operum legis ullorum substantiam; atque alterum, priori consequens, ubi una legis pars impleri nequeat, formam penitus abesse, neque ullos actus consentaneos edi. nam si adesset ipsa, nullam partem non tueretur, concupiscentias crucifigens. Ex quo fluit pariter, solite videndum esse, an non illa docendi ratio, quæ fingat, non instruere Fidem fideles viribus idoneis ad faciendum præceptum primum & ultimum, aut his eos non valere eatenus; in opinione tam noxia versetur, ut exinde homines omni feria cogitatione de iis observandis facile priuentur, gratiæque omni veritate.*



NOTA. Ne videatur Augustinus, vel nos cum eo, superiori §. II. & in tractatione secutura sæpius, dictum Pauli Rom. V, 5. quod Theologi Euangelici de charitate Dei erga nos merito accipiunt, de charitate nostra potius interpretari; animaduertimus, respicere semper Augustinum charitatem, prout fas est resque postulat, non præcise ut actum in nobis, sed per modum habitus & doni collati, ut diffusam in corde per Spiritum Sanctum. Unde consistit utrumque; & intelligi charitatem Dei erga nos, & eandem, quatenus ejus efficacia spirituali gustu diffusa in cordibus spectatur, esse ipsam in nobis scaturiginem, seu flammam, charitatis nostræ erga Deum atque homines. Pari sensu illud I. Joh. II, 5. de *charitate Dei perfecta*, *passive* potius, quam *active*, capiendum est.

## THESEOS CONFIRMATIO.

### I.

**D**emonstratis duobus firmamentis, ut *Thesis* plane confirmemus; *Stantium* hæc natura propria ex generatione est, ut *lumbis circumcincti consistant in veritate*, Eph. VI, 14. juxta uniuersas diuinæ voluntatis partes peragenda; qua dissoluta, siue in agendo siue in docendo, ipsa Euangelii veritas utrobique dissipatur. Atque ut rem isthanc ab origine indagemus funditus, implendæ legis ratio non fuit alia ante lapsum, quam quæ post lapsum restituta nobis a Christo est, si effectiōis *substantia*, quam dicunt, spectetur: hæc enim consistit in fidei ac charitatis spiritu, cujus promissum ex Euangelio denuo accipitur. Gal. III, 14. Difficultates, quæ ante & post *accidunt*, rem nequaquam mutant. Carnis repugnantia & imbecillitas nulla ante lapsum erat; qualibetate fiebat tum, ut non *parti-*



*bus modo, sed etiam gradibus* integris constaret ipsa perfectio: post *lapsum* sine contentione inter spiritum & carnem victoria nec obtinetur, nec retinetur; interim spiritu vincente, libertas recipitur vera, & dominans ille fidei ac charitatis spiritus ipsa est *forma*, quam Lex requirit. Ea autem forma quod perpetuo certamine est custodienda, conditio quidem hæc *justam graduum perfectionem* impedit, *partium* vero ipsarum, quæ superstitie fidei & charitatis præsidio nequeunt cessare, integritatem nullo modo. An non illud ipsum est, quod Johannes 1. Ep. c. III, 9. asseuerat; *quicumque ex Deo natus sit, eum non posse peccare, quoad semen Dei in ipso manserit?* Semen ergo Dei, seu gratia Spiritus Sancti, habitans in fidelibus, si efficit, ut non (*mortaliter*) peccent, aut peccare possint, licet contra cupiditates sit iis laborandum; quodnam, quæso, præceptum excipiemus, aduersus quod peccent, vel peccare, vel semen illud non asseruare queant?

Et vero *imperfectio* illa *partium*, ne stantibus renatis affingatur, adeo prorsus aliena censetur ab Euangelio, ut hoc e contrario iis, qui non secundum carnem, sed secundum spiritum ambulantes fideliter luctentur, etiam *mensura spiritualis* accessionem, quo minus *incorrupti seminis* victoria videri possit mutila, tanquam propriam assignet. OMNIA valeo per Christum, qui me corroborat! Phil. IV, 13. Apostolus, in acerrima aduersus carnem pugna constitutus, exclamat: nec negant Theologi nostrates, dictum id recte exponi de perfectione partium. Conf. FRIEDLIB. Med. p. 184. Et Christus clarissime promittit, quod diximus, Matth. XIII, 12. *Quisquis habet* (*ἔχει*, ita, ut teneat 1. Tim. I, 19. Hebr. XII, 28.) *dabitur ei, & REDUNDABIT.* Optime in *Breuiario Hülf.* p. 704. ea re adducuntur promissa



missa illa maxima & pretiola, fore, ut *fugientes eam*, quæ in mundo est, concupiscentiarum corruptionem, (num forte, ut partem aliquam legis amittant? minime, sed) *natura diuina consortes facti*, virtutes sibi copiose adesse sentiant, & ampliorem introitum sibi patere in aeternum regnum Domini nostri & Seruatoris Jesu Christi. 2. Petr. I, 4. &c. item illa Eph. IV, 15: *Veritatem facere debemus in charitate, ut CRESCAMUS PER OMNIA IN CHRISTO.* (Conf. Coloss. III, 19. 1. Petr. II, 2.) *Ex quo totum corpus compactum & connexum &c. augmentum corporis facit, ad edificationem sui ipsius in charitate.* Sicut autem, addit Auctor, augmentum corporis nostri phisici sentire possumus, ita renouatus sentit augmentum corporis mystici, respectu sui ipsius, ex studio bonorum operum. Quo merito referimus, quæ de promissionum Euangelicarum usu leguntur 2. Cor. VII, 1. quod iis adducti, qui tanto opere a Deo diligantur, *purgent se ab OMNI inquinamento carnis ac spiritus, eo ipso PERFICIENTES sanctimoniam in timore Dei*; hoc est, nihil de perfectione sua deperdant, verum illis ad maiorem potius sanctitatis gradum prouehantur. Ita crescere pietatis opus ex ardore ad subigendum omne malum, edocemur diuinitus: quo certius atque exploratius sit, necesse est, ipsam victoriæ fidei constantiam perfectam in suis partibus consistere, neque ullis superatis prauitatibus mutilari. Quia etenim ab iis, qui in fide perseuerant, prima fiducia & gloriatio spei, ipsumque initium substantiæ spiritualis (ἡ ἀρχὴ τῆς ὑποστάσεως) firmum retineri Hebr. III, 6. 14. debet ac potest; non potest ab iisdem, quam diu fideles vere sunt, ulla pars, quæ firmitatem illam constituerit, abesse; at, quicquid circa eam desiderabitur, ad gradum imperfectionem pertinebit: contra quam non æque valere argumenta hactenus allata, Scriptura haud celat,



lat, profectum in partium omnium incrementis, non vero in graduum absolute ponens.

§. II. Mirificus hac in re disputator *Augustinus* est, qui ex utraque parte nihil cedit *Pelagianis*, tam apertus in perfectione *integrali* stabilienda, quam in *absoluta* neganda strenuus. Nesciebant, quid vellent *Aduersarii*, Legem expleturi per *gratiam creatricem* seu *naturalem*; nec *supernaturalem*, si hanc illi sociarent, aliam interpretantes, quam *quæ faceret, ut sciremus, non item, quæ iuuaret, ut faceremus*. Hist. Pelag. Voss. Lib. V. part. i. p. 489. Quas scopas dissolutas repudians atque confringens Pater, considerabat in Scriptura Sacra sententias Apostolicas; nec eas tantum, quæ, sine peccato esse neminem, docent, sed contra etiam illas, quæ, *quomodo & quatenus* gratia vera peccatum vincere possit ac debeat, inculcant. Animaduvertebat, has partim negare, quod præcepta Dei sint difficilia; partim affirmare, quod detur aliqua perfectio, & certus quidam perfectionis fons atque affectus, qui omnino in fidelibus regnet. Atque sic perducebatur ad cognitionem admirandam, ut in veritatis æquabilitate persisteret utrinque. Suspiciantibus itaque *Pelagianis*, ipsum delapsurum esse in alterum extremum, quod dicitur, omnemque perfectionem negaturum; ille nihil faciebat minus, sed ipsos potius unicum & solidum legis adimplendæ fundamentum fugere, arguebat.

Et primo quidem, veritatis ejus, quod mandata sint facilia, non incidit neruos; immo expromit eos, atque explicat. Apponamus integram *Augustini* mentem, quam ad docendum præscribit. *De natur. & grat. sub finem. Si volumus animos, ad recte viuendum frigidus & pigros, Christianis exhortationibus excitare & accendere, primitus exhortemur*  
ad



ad fidem, qua Christiani fiant, & ejus nomini subjiciantur, sine quo salui esse non possunt. Si autem jam Christiani sunt, & recte vivere negligunt, verberentur terroribus, & premiorum laudibus erigantur; ita sane, ut non solum ad bonas actiones, verum etiam ad pias orationes eos exhortari meminerimus, atque hac instruere sanitate doctrina: ut & illi gratias agant, cum instituerint bene vivere, quod aliquid sine difficultate fecerint; & ubi difficultatem aliquam sentiunt, fidelissimis & perseverantissimis precibus, & misericordiae promptis operibus, facilitatem a Domino impetrare persistant. Sic autem proficientes, ubi & quando **PLENISSIMA JUSTITIA PERFICIANTUR**, non nimis curo. Ubicunque autem & quodocunque **PERFECTI** fuerint, non nisi gratia Dei per Jesum Christum Dominum nostrum perfici posse, confirmo. Sane, quando liquide cognoverint, nullum peccatum se habere; non se dicant non habere peccatum: ne veritas in eis non sit, sicut in eis veritas non est, qui, cum habeant, non habere se dicunt. Valde autem bona sunt praecepta, si legitime his utamur. Eo quippe ipso, quo firmissime creditur, Deum justum & bonum impossibilia non potuisse precipere, hinc admonemur, & in facilibus quid agamus, & in difficilibus quid petamus. Omnia quippe fiunt facilia **CHARITATI**, cui uni Christi sarcina levis est, aut **EA VNA EST SARCINA IPSA, QVAE LEVIS EST**. Secundum hoc dictum est, **ET PRAECEPTA EJUS GRAVIA NON SUNT**, ut, cui gravia sunt, consideret, non potuisse diuinitus dici, gravia non sunt, nisi, quia **POTEST ESSE CORDIS AFFECTVS**, cui gravia non sunt; & petat, quo destituitur, ut impleat, quod jubetur. Et quod dicitur ad Israel in Deuteronomio, si pie, si sancte, si spiritualiter intelligatur, hoc idem significat: quia utique, cum hoc testimonium commemorasset Apostolus; Prope est verbum tuum in ore tuo & in corde tuo: quidam hic habet, in manibus tuis; in corde enim sunt spirituales manus. (Septuaginta:



ἐγγύς σε ἐστὶ τὸ ῥῆμα σφόδρα ἐν τῷ σώματί σε, καὶ ἐν τῇ καρδίᾳ σε καὶ ἐν ταῖς χερσὶ σε ποιεῖν αὐτό.) hoc est, inquit, verbum fidei, quod predicamus. Conuersus ergo quisque, sicut ibi præcipitur, ad Dominum Deum suum ex toto corde suo, & ex tota anima sua, mandatum Dei non habebit graue. Quomodo est enim graue, cum sit dilectionis mandatum? Aut enim quisque non diligit, & ideo graue est: aut diligit, & graue esse non potest. Diligit autem, si, quod illic admonetur Israel, conuersus fuerit ad Dominum DEVM suum, ex toto corde suo, & ex tota anima sua. Mandatum, inquit, nouum do vobis, ut vos inuicem diligatis. Et qui diligit proximum, legem impleuit: & **PLENITUDO LEGIS, CHARITAS.** Secundum hoc & illud dictum est: si ambularent semitas bonas, inuenissent utique semitas iustitiæ leues. Quomodo ergo dicitur, propter verba labiorum tuorum ego custodiui vias duras? nisi, quia utrumque verum est: duræ sunt timori, leues amoris. **CHARITAS ergo INCHOATA, INCHOATA JUSTITIA est, CHARITAS PROUECTA, PROUECTA JUSTITIA EST: CHARITAS PERFECTA, PERFECTA JUSTITIA est:** sed charitas de corde puro, & conscientia bona, & fide non ficta: quæ tunc maxima est in hac vita, quando pro illa ipsa contemnitur vita. Sed major, si non habet, quo crescat, cum de mortali excesserit vita. Ubique autem & quandocunque ita plena sit, ut ei, non sit, quod adjiciatur; non tamen diffunditur in cordibus nostris, vel naturæ, vel voluntatis operibus, quæ sunt in nobis, sed per Spiritum Sanctum, qui datus est nobis, qui & **INFIRMITATI nostræ OPITVLATVR, & SANCTITATI COOPERATVR.** IPSA est enim **GRATIA DEI** per Iesum Christum, Dominum nostrum, cui est cum Patre & Spiritu Sancto æternitas, bonitas, in secula seculorum. Idem in eandem rem Lib. de Perfectiōne iustitiæ scribit: Non aliam ob causam Scriptura commemorat, non esse grauius præcepta diuina, nisi ut anima, quæ illa grauius sentit,



tit, intelligat, nondum accepisse VIRES, quibus talia sint præcepta Domini, qualia commendantur, leuia scilicet atque suauia; & oret gemitu voluntatis, ut impetret DONUM FACILITATIS. Ibid. infra: Commendantur ergo, non esse graua, ut, cui graua sunt, intelligat, se nondum accepisse DONUM, quo graua non sint: hilarem enim datorem diligit Deus. Nec tamen, cum ea graua sentit, desperando frangatur, sed ad querendum, petendum, pulsandumque cogatur. Et Psalm. LIX, 8. Humeros pios quarebat Christus, cum diceret: IUGVM enim meum SVAVE est, & SARCINA mea LEVIS est. Alia sarcina premit & aggrauat te; Christi autem sarcina subleuat te. Alia sarcina pondus habet, Christi sarcina pennas habet. Nam & auis si pennas detrahbas, quasi onus tollis; & quo magis onus abstulisti, eo magis in terra remanebit. Quam exonerare voluisti, jacet; non volat, quia tulisti onus: redeat onus, & volat. Talis est CHRISTI sarcina. Portent illam homines, non sint pigri, non attendantur illi, qui eam ferre nolunt; ferant illam, qui volunt, & inuenient, quam fit leuis, quam suavis, quam iucunda, quam rapiens in coelum & e terra eripiens. Ex quibus omnibus percipere est, totum conuicti Augustinum eo, ne, perfectionem Pelagianorum diruens, veram gratiae operantis virtutem fidelibus abrogare videretur. Nec vero hæc vera fuerit, neque id verum, quod detur AFFECTVS CORDIS, CUI PRAECEPTA DEI HAUD GRAUIA SINT, eorum si ullum impleri nequeat.

Propterea porro obseruatu dignissimum iudicamus, quantam scripta Augustiniana passim adhibeant curam ac constantiam, ut vires peccati & gratiae contrarias discernant, juxta illud Sapient. VII, 30. Lucem quidem occultat nox, Sapientiae autem non praeualet malitia. & Rom. VI, 14. Peccatum iis non dominabitur, qui non fuerint sub lege, sed sub Gratia. Quocirca plurimum momenti collocatur in oppositione ista



## DE PERFECTIONE

litterarum sacrarum, quod hæ totius legis *negatiue* malum intimum debellandum faciant *cupiditatem*, seu *concupiscentiam carnis*, quam *desiderium peccati* Augustinus appellat; ipsique opponant Legis *affirmatiue* propriam formam, *charitatem*, non quomodocunque acceptam, sed *charitatem illam Dei*, *diffusam a Spiritu Sancto in cordibus*. Rom. V, 5. Doctrinam inde sic informat ille lib. III. de Doctr. Christi. c. X. *Omnia* (patefacta) *ad charitatem nutriendam atque corroborandam, & cupiditatem vincendam atque extinguendam valent*. *Charitatem* voco, *motum animi ad fruendum Deo propter ipsum, & se atque proximo propter Deum*. *Cupiditatem autem*, *motum animi ad fruendum se & proximo, & quolibet corpore, non propter Deum*. Quanto autem magis regnum cupiditatis destruitur, tanto charitatis augetur. Recte igitur existimat, se inuenisse *PRINCIPIUM BONI* prolapsis instaurandis, non, quod infirmius sit malo; ast, eo quod robore in resipiscentibus possit uti, ut, deuicta corruptione, omnem legis partem expediat, præstetque magis & magis, tanquam vera *charitas ex puro corde, & conscientia bona, & fide non ficta*. 1. Tim. I, 5. quæ talis non esset, si ea non impleretur illud, *Non concupisces*. Quapropter nullus dubitat lib. de vera Innocent & Ps. LXVII, 14. affirmatione *uniuersali atque absoluta* pronunciare: *OMNE præceptum Dei leue esse amanti*. Nec ob aliud intelligitur dictum, *Onus meum leue est*; nisi quia dat *Spiritum Sanctum*, per quem diffunditur *charitas in cordibus nostris*. Quam quidem sententiam Paulinam ex Rom. V, 5. in hoc argumento, velut anchoram, tenet firmiter, eaque integritatem legis, ex fide instantibus stabilitam, usquequaque obseruat. Uberrime dicti illius usus huiusmodi conspicitur in libro de *Perfectione iustitie contra Coelestium*; ubi utrumque ait fidelissime, ut,

tum



rum perfectionem graduum supremam ab hac vita seponat, illis præcipue verbis: *Cum est adhuc aliquid carnalis concupiscentia, quod vel continendo frenetur, non OMNIMODO ex tota anima diligitur Deus: tum perfectionem partium sanctis & fidelibus in hac vita vindicet. Huc enim tendunt pleraque, quorum nonnulla adferamus. Generalis prohibitio est, non concupisces; & generalis jussio, diliges. Vnde breuiter & Apostolus Paulus utrumque complexus est Rom. XII, 2. Prohibitio enim est, Nolite conformari huic seculo; Jussio autem, sed renouamini in nouitate mentis vestrae. Illud pertinet ad non concupiscere, hoc ad diligere: illud ad continentiam, hoc ad iustitiam: illud ad declinandum a malo, hoc ad faciendum bonum. Non concupiscendo enim vetustate exspoliamur, & nouitate induimur diligendo. Sed nec quisque potest CONTINENS esse, nisi DEUS DET, ET CHARITAS DEI DIFFUNDATUR in cordibus nostris, non per nos ipsos, sed per Spiritum S., qui datus est nobis. Hoc autem fit de die in diem in iis, qui volendo & credendo & inuocando proficiunt, & præterita obliuiscuntur, in ea, quæ ante sunt, extenduntur. Ad hoc enim Lex ista præcepit, ut cum IN HIS IMPLENDIS homo defecerit, non se extollat superbia tumidus, sed ad gratiam confugiat fatigatus; ac sic eum Lex terrendo, ad Christum diligendum paedagogi perducatur officio. Conf. supra cap. II. §. III. de usu legis negativæ. Quando vero in iis implendis, quæ de non concupiscendo præcipiunt, hominem deficere posse, audimus; non negantur ea impleri posse: namque antea dictum est, fieri illa ex charitate DEI per CONTINENTIAM, ἐνκρασίαν, 2. Petr. I, 6. quæ ipsa est virtus noui ac decimi præcepti, ex agnitione diuinæ charitatis sic oriunda, ut animum fortissima cœlestis amoris suauitate vinciat, ne diffluat cupiditatibus, sed Spiritus Christi altitudinem custodiat temperantia ac tolerantia. Act. XXIV, 25. Gal. V, 23.*



Ejusdem notæ est, quod ex interuallo scribit : *Lex prohibendo auget peccati cupiditatem, nisi diffundat Spiritus charitatem; quæ plena & perfecta tunc erit, cum videbimus a facie ad faciem.* Quibus paucis omnia complectitur felicissime. Omnino plenam & consummatam nondum esse charitatem, proficitur : eandem tamen, a Spiritu Sancto in cor, de humano diffusam, id præstare affirmat, ne lex prohibendo valeat peccati cupiditatem augere ; hoc enim, quam diu ipsa non impletur fidei & charitatis Spiritu, efficere haud desistit. Ita ergo partem legis, concupiscentiæ oppositam, seruari, urget iterum. Argumentatur etiam pulchre ac solide, pro perfectione integrali, ex iis, quæ vias Dei integras, & vitam fidei integram designant. Quod Jobus dicit : *Vias ejus custodiui, & non declinaui a mandatis ejus, neque discedam : Custodit vias Dei, qui non sic exorbitat, ut eas relinquat, sed in eis currendo proficit, etsi aliquando, ut infirmus, offendit & titubat, proficit autem minuendo peccata, donec perueniat, ubi sine peccato sit.* Non enim aliter potest eo modo proficere, nisi custodiendo vias ejus. Declinat autem a mandatis Domini, atque discedit apostata ; non ille, qui etiam, si habeat peccatum, conflagrandi tamen cum eo perseverantiam non relinquit, donec eo perueniat, ubi nulla cum morte contentio remanebit. Quod autem ait idem sanctus Job : non reprehendit me cor meum in omni vita mea : tunc nos in ista vita, in qua ex fide vivimus, non reprehendit cor nostrum, si **EADEM FIDES**, in qua corde creditur ad justitiam, **NON NEGLIGIT** reprehendere peccatum nostrum. Unde dicit Apostolus : Non enim, quod volo, facio bonum, sed quod odi malum, hoc ago. Bonum est enim, non concupiscere ; & hoc **BONUM VULT** justus, qui ex fide vivit : & tamen facit, quod odit, quia concupiscit, quamvis post concupiscentias suas non eat. Quod



si fecerit, tunc vere ipse fecit, ut cedat & consentiat, ut desiderio peccati obediat. Tunc enim cor ejus reprehendit, quia ipsum reprehendit; non illud peccatum ejus, quod habitat in membris ejus. Cum vero non sinit regnare peccatum in suo mortali corpore ad obediendum desideriis ejus, nec exhibet membra sua arma iniquitatis peccato; inest quidem peccatum in membris ejus, sed non regnat, quia non obeditur desideriis ejus. Et ideo, dum quod non vult agit, id est, non vult concupiscere, & concupiscit, CONSENTIT legi, quia bona est. Hoc etiam VULT ET IPSE, quod LEX, quia non vult ipse concupiscere; & Lex dicit, Non concupisces. In hoc quoniam VULT, QUOD ET LEX VULT, procul dubio consentit legi: concupiscit tamen, quia non est sine peccato; sed jam non ipse operatur illud, sed id, quod in illo habitat peccatum. Ideo non ipsum reprehendit cor ejus in omni vita ejus: hoc est, in fide ejus, quia justus ex fide vivit. Ed ideo FIDES ejus est VITA ejus. Scit enim, quia non habitat in carne ejus BONUM, ubi habitat peccatum: sed, NON EI CONSENTIENDO VIVIT EX FIDE, QUAE INVOCAT DEUM, UT ADJUVETUR PUGNANS CONTRA PECCATUM; quod ut omnino ibi non sit, adjacet ei VELLE, sed perficere bonum, non adjacet: non, FACERE BONUM, non adjacet, sed PERFICERE. Nam in eo quod non consentit, BONUM FACIT; & in eo, quod odit concupiscentiam suam, BONUM FACIT: & in eo, quod eleemosynas facere non cessat, BONUM FACIT: & in eo, quod illi, qui in eum peccat, ignoscit, BONUM FACIT: & in eo, quod petit sibi dimitti debita sua, & veraciter dicit, quod dimittit etiam ipse debitoribus suis; & orat, ut non inferatur in tentationem, sed liberetur a malo, BONUM FACIT. Ei tamen, PERFICERE BONUM, non adjacet; quod tunc erit, quando illa concupiscentia, quae habitat in membris ejus, nulla erit. Non ergo EUM reprehendit cor ejus, quando reprehendit peccatum, quod habitat in membris ejus, & non habet quam reprehendat infidelitatem ejus. Ita nec in VITA SUA, id



*est, IN FIDE SUA, a corde suo reprehenditur, & sine peccato non esse, convincitur. In quibus ne quid Lector accipiat secus, potissimum duo discernenda sunt: (1) cum justus facere, malum dicitur, & concupiscere, sermo est de motibus, non proæreticis, sed inuoluntariis, non tollentibus fidem ac gratiam operantem. (2) hîc bonum facere, & perficere bonum, sic distinguuntur, ut illud sumatur de actibus veris completisque, ex fidei & charitatis Spiritu proficiscentibus secundum præcepta singula, quales ad perfectionem partium sufficiunt; hoc autem, de modo perficiendi juxta omnes gradus. Et quid, pro perfectione partium legis in Stantibus, dici aptius potest, quam illud sequens? Abstinet se ab OMNI RE MALA, qui peccato, sine quo non est, vel nunquam omnino consentit, vel si aliquando premitur, non opprimitur; sicut LUCTATOR FORTIOR, etsi aliquando tenetur, NON IDEO (id) PERDIT, QUO (per quod) SUPERIOR INVENITUR. Item, de utraque & partium & graduum: Nunc omnis proficiens, recta intentione proficiens, RECEDIT AB OMNI PECCATO, & tanto inde fit longinquior, quanto plenitudini justitiæ perfectionique (absolutæ) propinquior: quia & ipsa concupiscentia, quod est peccatum habitans in carne nostra, etsi manet adhuc in membris mortalibus, MINUS tamen NON DESINIT proficientibus. Aliud est ergo, recedere ab omni peccato, quod nunc in opere est: aliud, recessisse ab omni peccato, quod in ILLA perfectione tunc erit. Sed tamen & qui jam recessit, & qui adhuc recedit, non est negandus FACERE BONUM. Idem tamen enim distinguitur ibi inter ILLAM perfectionem justitiæ, quæ in hac vita non est, & eam, quæ in hac vita est.*

Nec tamen prætermittendum, quomodo Augustinus sic pugnans, ipsum perfectionis vocabulum, etiam de hujus vitæ cursu & Stantium officio, locis pluribus usurpare so-



soleat. Ibidem hæc legimus: *Quamdiu peregrinantes a Domino per fidem ambulamus, non per speciem, unde dictum est: Justus ex fide vivit: hæc est nostra in ipsa peregrinatione justitia, ut ad ILLAM PERFECTIONEM plenitudinemque justitiæ, ubi in specie decoris ejus jam plena & perfecta charitas erit, NUNC ipsius cursus rectitudine & PERFECTIONE tendamus, castigando corpus nostrum & servituti subjiciendo, & eleemosynas in dandis beneficiis, & dimittendis, quæ in nos sunt commissa, peccatis, hilariter & ex corde faciendo, & orationibus indefinenter insisterendo, & hoc faciendo in doctrina sana, qua edificatur fides recta, spes firma, charitas pura. Hæc est NUNC nostra JUSTITIA, qua currimus, esurientes & sitientes ad PERFECTIONEM PLENITUDINEMque justitiæ, ut ea postea saturemur. Non negans perfectionem hujus vitæ, partium quæ sit, ubi alteram, quæ graduum est, indicat; apponere consuevit plenitudinem, qua istos exprimeret. In oratione Christi, si contentiosi esse nolumus, satis nobis propositum speculum est, ubi inspiciatur vita justorum, qui ex fide vivunt, & PERFECTE currunt, quamvis sine peccato non sint. Vnde dicunt, dimitte nobis: quia nondum, quo curritur, pervenerunt. Hinc dicit Apostolus: Non quia jam acceperim, aut jam PERFECTUS sim: Fratres, ego non me arbitror apprehendisse: unum autem, quæ retro sunt oblitus, in ea, quæ antea sunt, extentus secundum intentionem sequor ad palmam supernæ vocationis Dei in Christo Jesu. Quotquot ergo PERFECTI, hoc sapiamus: id est, quotquot PERFECTE CURRIMUS, hoc sapiamus, quod nondum PERFECTI SUMUS, ut illic perficiamur, quo PERFECTE adhuc CURRIMUS. In libro de peccatorum meritis & remissione cap. XIII. Paulus jam erat PERFECTVS VIATOR, etsi nondum erat ipsius itineris perfectione perventor. Denique tales vult secum in isto cursu comites rapere, quibus continuo subiungit, & dicit: Quotquot ergo perfecti, hoc sapiamus:*



Et si quid aliter sapitis, hoc quoque Deus vobis reuelabit: verumta-  
 men, ait Apostolus, in quod peruenimus, in eo ambulemus. Am-  
 bulatio ista, non corporis pedibus, sed mentis affectibus, & vitæ mor-  
 ibus geritur, ut possint esse PERFECTI iustitiæ possessores, qui recto iu-  
 nere fidei de die in diem sua renouatione proficientes, jam PERFECTI  
 facti sunt ejusdem iustitiæ viatores. Cap. XV. Cum dicitur cujus-  
 que PERFECTIO, qua in re dicatur, videndum est. Nam,  
 ex Apostolo testimonium paulo ante posui, ubi se fatetur in acceptione  
 iustitiæ, quam desiderat, nondum esse perfectum; & tamen continuo  
 dicit: Quotquot ergo perfecti, hoc sapiamus: quod utrumque non  
 diceret, nisi in alia re perfectus esset, in alia non esset. Velut si  
 jam sit quisquam sapientiæ perfectus auditor, quod nondum erant illi,  
 quibus dicebat: Lac vobis potum dedi, non escam; nondum enim  
 poteratis; sed nec adhuc quidem potestis. Eis quippe & illud ait:  
 Sapientiam loquimur inter PERFECTOS; utique PERFECTIORES  
 auditores volens intelligi. Potest ergo fieri, sicut dixi, ut jam sit aliquis  
 sapientiæ perfectus auditor, cujus nondum sit perfectus & doctor: pot-  
 est perfectus esse iustitiæ cognitor, nondum perfectus effector; potest  
 perfectus esse, ut diligat inimicos, qui nondum est perfectus, ut suf-  
 ferat. Et qui perfectus est in eo, quod omnes homines diligit, quip-  
 pe qui etiam ad inimicorum dilectionem peruenerit; quæritur, ut-  
 rum jam sit in ipsa quoque dilectione perfectus: id est, utrum quos  
 diligit, tantum diligat, quantum illa incommutabilis regula verita-  
 tis diligendos esse præscribit. Talia quam plurima in Augu-  
 stino passim occurrunt: posteriora autem non modo  
 perfectionem partium, uniuersis stantibus commu-  
 nem, sed & comparatiuam illam, de qua super c. I. §. IV.  
 & VI. respiciunt; ita, ut mentione diuersæ rei, partim  
 varia objecta, partim majores partium gradus signifi-  
 centur; non item partes ipsæ necessariae, quarum abesse  
 nulla,



nulla, per *rerum* naturam illarum, quæ producuntur, potest.

Sed quorsum testimonia illa Augustiniana? nimirum ut liquido constet, quomodo fieri nequeat, salua ut veritas discriminis inter *Legem & Euangelium* conseruetur, nisi vera ac *positiua* gratiæ, fidei seu charitatis, agnoscatur, vis & efficacia, ex Euangelio profluens, quæ secundum singulas atque omnes legis partis perstare possit in fidelibus sanctis, perpetuo licet imbecillitatis morbo laborantibus.

III. Esse & habitare diffusam in eorum cordibus charitatem Dei ac Spiritus Sancti gratiam, negauerit nemo, nisi qui verbum Dei ipsum non admiserit. Eandem juxta *omnes singulasque Legis partes* adesse, cum homo ex Spiritu generatus Spiritus, ac fides victoria de mundo facta est; Joh. III, 6. I. Joh. V, 4. & *res ipsa & prioris Propositionis* demonstratio, ostendit tam certum, ut contrarius opinionis error contra Scripturam dixerit, Deum non *creare cor mundum*, Ps. LI, 12. non *innouare SPIRITUM FIRMUM* intra hominem, v. 12. non *scribere legem in corda*: Jer. XXXI, 33. non *remouere cor lapidis*, non *DARE COR* carnis; non *dare COR NOVUM, SPIRITUM nouum* intra hominem; Spiritum suum non dare, non facere, ut in statutis diuinis ambulare, & diuina iudicia custodire, ac facere possimus. Ezech. XXXVI, 26. 27. Deum per *SPIRITUM VITÆ* in CHRISTO JESU non *LIBERARE* a lege peccati & mortis, nec nouitatem Spiritus, sensum Spiritus, nec *SPIRITUM CHRISTI* conferre. Rom. VI, 4. VIII, 2. 4, 5. 10, 11. qui Christi sunt, non ita carnem crucifixisse cum passionibus & concupiscentiis, ut *SPIRITU VIVANT*. Gal. V, 24, 25. non *INDUISSE CHRISTUM*. c. III, 27. Deum mortuos in peccatis, non *VIVIFICARE* & suscitare cum Christo iusti-



*stificatos: non factos opus Dei, non CREATOS in Christo Jesu ad bona opera. Eph. II, 5, 6. 10. non renouari SPIRITU mentis suæ, nec induere nouum hominem, creatum juxta Deum in iustitia & sanctitate ipsius veritatis. c. IV, 23, 24. non factos LUCEM in Domino, lucisque filios. c. V, 8. 1. Joh. I, 7. II, 9. non esse ex VERITATE. cap. III, 19. nec ipsis SPIRITUM suum, MENTEM suam Filium Dei dedisse. c. III, 24. IV, 13. V. 20. &c. Hæc omnia enim non aliter intelligi possunt aut debent, quam de partibus Legis uniuersis, quæ Spiritu fidei & charitatis in homine inflaurandæ sunt.*

Quandoquidem vero ita poenitentiae ac regenerationis opus ad præcepta omnia pertinet, an forte in renouationis negotio excipi ullum poterit, quod haud integretur? Faciamus hujus rei periculum, fingamusque, partem Legis illam, quæ ultima in Decalogo est, non seruari a *Stantibus*: certe stantes non erunt stantes, repugnantiaque committetur apertissima. Scite CHEMNITIUS obseruat de *nono & decimo præcepto*, ipsum Filium Dei ostendere sic interpretanda illa duo, *ut ducantur per omnia præcepta totius Decalogi.* Præsertim ultimum, ut non accusat tantum affectus vitiosos, ad quos accedit consensus; sed ipsam etiam prauam inclinationem, contra singula præcepta: sic contra requirit affectiones pias, & sanctitatis radicem atque habitum juxta eadem. Hic igitur est ille, qui *Spiritus ex regeneratione* datus prædicatur, seu vitæ spiritualis semen. Fac proinde, propter concupiscentiam, qua regeniti afficiuntur, postremam præceptionum hanc partem non impleri; (de gradibus jam non quæstio est:) num, quæso, remanebit aliqua Legis particula, quæ obseruari vere possit, principio isto fidei sublato? Quæ vero absurda



da contra Scripturam & hinc sequentur ! nempe hæc : ob peccata ex infirmitate admissa, Deum a fidelibus *auferre Spiritum Sanctitatis suæ*, nec *SUSTENTARE* eos spiritu spontaneo. Ps. LI, 13, 14. *in multitudine tentationum consolationes Dei non oblectare animum ipsorum*. Ps. XCIV, 19. non retinere illos *NOVITATEM SPIRITUS*, in qua ambulare, & Deo servire queant. Rom. VI, 4. VII, 6. eos, qui in Christo Jesu sunt, non *SECUNDUM SPIRITVM AMBULARE*. c. VIII, 1. non sentire, quæ Spiritus sint, nec *SENSUM* hujus, *VITAM & PACEM* custodire v. 5, 6, 7. *SPIRITUM DEI* non *HABITARE* in ipsis v. 9. 11. neque eos mortificare spiritu actiones corporis ; non agi Spiritu Dei, nec Fideles sentire hunc adoptionis testem, aut *SUBLEVANTEM* ipsorum infirmitates. v. 13, 14. 16. 26. separari a charitate Christi, nec vincere. v. 35. 37. non sistere corpora sua *hostiam VIVAM*, sanctam, acceptam Deo ; nec se *TRANSFORMARE*. per renouationem mentis. c. XII, 1, 2. abhorrentes a malo, non *AGGLUTINARI BONO*. v. 9. non *FERVERE SPIRITU* ; non servire Domino, non perdurare in oratione : v. 11, 12. sed vinci a malo, nec *VINCERE BONO MALUM*. v. 21. charitatem, de ipsis quæ dicitur, nullo sensu vero esse *πλήρωμα νόμου*, *LEGIS COMPLETIONEM*. c. XIII, 10. non inducos eos armis lucis, nedum ipso Domino Jesu Christo ; v. 12. 14. nec servire Christo in justitia, *PACE* & gaudio in Spiritu Sancto c. XIV, 17. nihil ipsorum ex fide esse, sed peccata omnia. v. 23. Testimonium Christi in ipsis non firmari, neque ipsos *FIRMARI* a Deo posse. 1. Cor. I, 6. 8. sed redigi sub rerum omnium potestatem ; non agglutinari Domino, nec unum cum eo Spiritum esse ; non esse templa Spiritus Sancti, nec glorificare Deum in corpore suo, & in Spiritu suo. c. VI, 12. 17. 19, 20. Si quis in Christo, non hunc esse *NOVAM CREATURAM*, nec secundum hanc regulam posse *INCEDERE*. 2. Cor. V, 17. Gal. VI, 15, 16.



*Christum non esse aut viuere in fidelibus* 2. Cor. XIII, 5. Gal. II, 20. *qui in Spiritu inceperint, non posse in eodem pergere.* c. III, 3. *fidem non per charitatem operari.* c. V, 6. **SPIRITU INCEDENTES**, quod concupiscit caro, perficere; eaque concupiscente aduersus SPIRITUM, hunc non bona conscientia in aduersum DOMINARI, neque ipsos SPIRITU DUCI. v. 16, 17, 18. non dari FRUCTUS SPIRITUS, contra quos non sit Lex; neque ita crucifigi affectus prauos, ut viuentes Spiritu, SPIRITU etiam INCEDANT. v. 22, 23, 24, 25. non esse OBSIGNATOS spiritu promissionis sancto, arrhabone; Eph. I, 13, 14. nec FORTITER CORROBORARI per Spiritum Dei in interiore homine; aut radicari & fundari in charitate, Christo in cordibus per fidem inhabitante. c. III, 16, 17, 18. Non posse fideles vere agere in charitate, ut crescant in Christum caput per OMNIA; non deponere veterem, nec renouari SPIRITU MENTIS sue, induentes nouum hominem in iustitia & sanctimonia veritatis. Eph. IV, 15, 16. 22, 23, 24. Obsignatos Spiritu sancto Dei, non posse non ipsum tristitia afficere. v. 30. Factos lucem in Domino, ut filios lucis non posse incedere, nec proferre fructus Spiritus in OMNI bonitate, iustitia & veritate. c. V, 8, 9. corroboratos forti robore Domini, indutosque uniuersa armatura Dei non POSSE STARE aduersus insidias Diaboli, nec resistere, nec OMNIBUS confectis, adhuc STARE; non stare lumbis circumcinctos veritate, ac iusticia thorace indutos; assumpto fidei scuto non posse OMNIA jacula mali illius ignita extinguere. c. VI, 10. 13, 14. 16. ipsorum CHARITATEM, concupiscentiae oppositam, non magis & magis redundare in agnitione omni-que sensu; non esse sinceros, nec in offenso cursu posse pergere, plenos iustitiae fructibus, qui per Jesum Christum existant. Phillipp. I, 9, 10, 11. non esse eo AFFECTU praeditos, qui & in Christo Jesu, c. II, 5. nec posse in Domino gaudere semper; nec



**N**ec **PACEM DEI CONSERVARE** corda & mentes in Christo Je-  
 su. ib. c. IV, 4. 7. neque imperare in iis. Col. III, 15. neque  
**CORROBORARI OMNI ROBORE** ipsos secundum gloriosam Dei  
 potentiam, ad **OMNEM tolerantiam & animi lenitatem cum**  
**gaudio.** c. I, II. non mortificare membra terrestria, nec depone-  
 re illa **OMNIA**; veterem hominem cum ipsius motibus non  
 exsuere, neque **INDUERE NOVUM**; nec indui, ut electos Dei  
 sanctos atque dilectos, **VISCERIBUS** miserationum, benigni-  
 tate, modestia, mansuetudine, lenitate, c. III, 5. 8, 9, 10. 12. non  
 corda inculpata **STABILIRI SANCTIMONIA** coram Deo. 1. Th.  
 III, 13. in ea non posse magis prouehi, cap. IV, 10. aut totos  
 sanctificari; nec **INTEGRUM SPIRITUM** cum anima & corpo-  
 re inculpate seruari. c. V, 23. non reperiri charitatem ex **PLU-**  
**RO** corde & conscientia **BONA**, & fide non **FICTA**: nec reti-  
 nere fidem & bonam conscientiam. 1. Tim. I, 5. 19. non teneri  
 datum **SPIRITUM ROBORIS**, & charitatis, & sanitatis animi.  
 2. Tim. I, 7. neminem legitime certare, aut coronari. c. II, 5. nec  
 certamen praeclarum decertare, nec cursum consummare, nec **FIDEM**  
**SERVARE**; 1. Tim. VI, 12. 2. Tim. IV, 7. nec sapienter, iuste &  
 pie vivere in praesenti saeculo, seu **ZELUM** praestare in bonis ope-  
 ribus, quenquam posse. Tit. II, 12. 14. nec posse τὴν ἀρχὴν τῆς  
 ὑποτάξεως **RETINERI FIRMAM**. Hebr. III, 14. nec posse **TE-**  
**NERI GRATIAM**, per quam ita seruiamus Deo, ut ei placeamus  
 eius in pudore ac timore. c. XII, 28. nec Deum nos perficere in **O-**  
**MNI opere bono**, ad praestandam Dei voluntatem; nec efficere in  
 fidelibus, quod ipsi acceptum sit. c. XIII, 21. non dari occultum  
 cordis hominem, situm in **INCORRUPTIONE** lenis ac quieti  
 spiritus, pretiosum coram Deo. 1. Petr. III, 4. neminem resi-  
 stere **FIRMUM PER FIDEM**; nec ipsum **DEUM**  
 afflictos integros reddere, nec stabilire, nec roborare, aut fun-  
 dare. 1. Petr. V, 9, 10. fugientes cupiditatem, naturae divinae  
 ad consortes fieri; nec virtutem ex virtute fluere; nec fide-



les in Domini sui imaginem transformari a gloria in gloriam ; neque vocationem ita FIRMAM posse efficere , ut ne impingant. 2. Cor. III, 18. 2. Petr. I, 4, 5. &c. 10. nec cauere, ne excidant a propria STABILITATE, ut CRESCANT in gratia. c. III, 17. qui malum vicerint, habitante in ipsis verbo Dei, non esse tamen FORTES, nec manere in Christo. 1. Joh. I, 14. 28. in renatis SEMEN DEI non MANERE posse. c. III, 9. neque ex SPIRITU, quem ipsis dedit, eos nouisse, quod in ipsis HABITET : v. 24. c. IV, 13. nec conseruare semet ipsos in Vero. c. V, 18. 20. VERITATEM non MANERE in fidelibus, neque hos INCEDERE IN VERITATE : 2. Joh. v, 2. 4. 3. Joh. v. 3, 4. nec denique posse per Spiritum S. orantes, sanctissima fidei se superstruere & conseruare in charitate Dei. Jud. v. 20. nec quod habeant, TENERE. Apoc. III, 11.

Omnia isthæc, iterum contra Scripturam posita, sunt talia, quæ necessario sequantur ex eo, si quis statuerit, primum vel ultimum præceptum a regenitis non præstari propter concupiscentias inuoluntarias ; hoc enim posito, necesse est, tollatur gratia habitualis, decimi præcepti propria, ipsaque sublata nihil veri superfit. Quod quum diruat omnem Euangelii oeconomiam, restituendum oppositum est, de manente Spiritu fidei & charitatis, omniumque bonorum fructuum : atqui iste, aduersus carnem concupiscens bonum, Fideles non aliter ducere, Gal. V, 17, 18. aut residere in iisdem poterit, quam durante ipsius domatu. hic vero est ipsa legis impletio, inchoata licet, vera tamen, atque integritate partium legalium constans, nec nisi gradibus recipiens minus vel majus quiddam. Unus id Jacobus satis edocuerit, agens tum de introspiciendo in PERFECTAM LEGEM, quæ libertatis sit, tum de permanendo in ea. c. I, 25. Totum caput versatur in tentationibus ac cupiditatibus



tatibus superandis, non ex lege modo illa, quæ dicit, *Non concupisces*; quam quidem audiens facile vel obliuioni tradiderit, vel traxerit ad malum ipsum magis irritandum: sed ita, ut *DONUM DEI PERFECTUM* usurpetur, adhibitoque Euangelio, mentes contritæ ac renatæ in Verbi recessus penetrent, atque *sermonem* hunc sibi *insititium* amplectantur, agnoscentes legem, fide stabilitam; id est, ita *perfectam* redditam, ut ex ipso *Spiritu* fidei & charitatis *positiuo* libertatem, a præcepti *negatiui* regnante aculeo, sentiant, & *permanentes* in ipso obsequio, *beatae* sint, *immaculatas se a mundo seruantes*. v. 13, 14. 17. 21. 24, 25. 27. Ad-  
ditur hinc, ad affectum *metus* ciendum, non tantum illud: *quisquis totam legem seruauerit, offenderit autem in uno, omnibus tenetur*, id quod supra vidimus: verum etiam, quod *per legem libertatis simus iudicandi*, rationem reddituri grauissimam, si vel *ita fecerimus*, vel *ita fuerimus LOCUTI*, ac si lex Euangelii legem, de concupiscentia fugienda, non sic instaurare in hominibus possit, ut Euangelicæ libertatis gratiam, cupiditatibus potentiores, experiantur. c. II, 10. 12. Unde & cap. IV. verbis, milite Christiano dignissimis, ad omnes dicitur: *Resistite Diabolo, & FLIGIET a vobis!* Eandem libertatem Paulus tantopere commendat, tanquam oppositam *Renatorum* statui ante *Regenerationem* pristino, Rom. VI, 18. 22. c. VIII, 2. ut *mortuos peccato, iustificatos a peccato* esse, pronunciet Rom. VI, 7. hoc est, absolutos a *reatu*, & a peccati *dominio* liberatos: quæ est optima istius *prædicati* interpretatio JAC. WELLERI in hunc locum, *antecedentibus & consequentibus* respondens. Atque agitur ibi, ut idem ait, *de morte in regeneratione, & sic domini deregatio & radicis peccati extenuatio* notatur. Cur vero dicit *mortuos peccato*; nisi aduersus totam legem, omnem-



omnemque huius partem, considerando? At *quales*, ab eodem *justificatos*, putat? non fane mortuos illi tantum; sed contra, qui etiam exinde *viui Deo reddantur in Christo Jesu, Domino nostro*: ut legimus v. 8. 11. (Conf. anteced. c. V, 9, 10. 21.) id quod non minus secundum omnem Legis partem valebit. Itaque intelligimus hinc duo: (1) exordium libertatis spiritualis ponendum in vera *contritione*, qua communio mortis Christi vires peccati eneruare incipiat, ne possit animum concupiscentia vincere, a lege seruanda abstrahere, & inescando retrahere in captiuitatem. 1. Cor. VI, 12. Jac. I, 14. (2) ejusdem vero libertatis maturitatem pendere ex vi resurrectionis Christi, ut mortui peccato, & ab hoc justificati, efficacitate Fidei illa gaudeant, quæ juxta unumquodque præceptum *VITAM SPIRITUS CHARITATIS* in iis peperit, efficiens ipsos idoneos, qui in *PERFECTA LIBERTATIS LEGE* permanere queant, neque excidant parte ulla. Quorum utrumque est, quod digne ponderandum præter cætera existimamus: quomodo ob *Veteris mariti mortem* in poenitentia fiat, ut Maritus animæ nouus ac verus, Christi Spiritus, primi atque ultimi præcepti effector, victoriam ex ipsius merito penes hominem obtineat ac tueatur; neque hinc ullum mandatum relinquatur non impletum. Rom. VII, 3, 4. 6. Eph. I, 17, 18, 19, 20. Ita enim si radicata fuerit in Christo charitas, ἡ ἀγάπη ἐκπύπτει, nunquam excidit. 1. Cor. XIII, 8. Phil. I, 9, 10, 11. Et vero isthæc duo quam constanter Scriptura Sacra Fidelibus attribuat, compluribus iis modo congestis locis, & *Conuersionem* & *Renouationem* spectantibus, ideo ante oculos visum est proponere, ut mens Lectoris, illorum omnium notationes diligentissime & sanctissime perpendens, ultro assequatur id, quod res est; non posse videlicet



cet partem Legis ullam stantibus, charitatis uno Spiritu animatis, deesse ad observandum præstandumque. Ejusdem causæ principia necessaria, impedimenta & pericula, quum ab initio fufius exposuerimus, demonstrationi cumulate satisfactum erit.

### CAP. III.

#### ANTITHESIS REFELLITUR.

**C**onfidimus equidem, Thesin ipsam ita firmiter fundatam esse ac roboratam, ut veritas agnita argumentationes facile possit diluere quaslibet contrarias. quoniam vero in iis, quæ animos a fallaci carnis licentia ad Spiritus veritatem auocant, fere fit, ut *Deus hujus seculi excæcet mentes infidelium, ne irradiet eos lumen Evangelii gloriæ Christi, qui est imago Dei*, instaurans imaginem Dei in fidelibus *facie resecta*, hoc est, juxta præcepta omnia, a gloria in gloriam; 2. Cor. III, 18. IV, 4. idcirco operæ pretium est, videre, quid hæsitacionem aduersus Perfectionem partium, integro sensu statuendam, alere & fovere soleat; quidque vana species a vero discrepet, ostendere, eamque ab hoc ipso decerpere ac secernere.

#### OBJECTIO I.

*A Legis partibus non eximendos gradus; quorum perfectio ut hujus vitæ non est, ita nec partium perfectionem integram statuendam.*

K

RE-



## RESPONS.

**C**ertum est, quemadmodum nullam partem, ita nec gradum ullum, si Lex sola, sibi relicta, & tota sua *quantitate* juxta ac *qualitate*, perfectionem exigat, defieri debere. Quandoquidem enim legis diuina indoles *spiritualis* existit, Rom. VII, 14. cujus natura maxime propria expletionem intendit exquisitissimam; eatenus tantum abest, ut lex momenta sanctimoniae suprema non desideret, ut tota potius eo nitatur ac contendat. Ut autem exemplo difficultatem hanc clarissime expediamus, quaeritur de Christi Domini sententia Matth. V, 48. *ESTOTE VOS PERFECTI, UT PATER VESTER, QUI IN COELIS, PERFECTUS EST.* Sunt, qui non vereantur committere, ut ipsius Magistri coelestis mentem peruertant, temere fingentes, haud dici, quid fieri possit, verum quid fieri debeat; nimis impie quidem illi immemores praelucentis apertae *oppositionis*, qua, qui perfectionem a Christo praecipiam neutiquam assequantur, nequaquam annumerentur filiis Dei, sed publicanis. Rectius *Augustinus* in haec Christi verba contra *Pelagianos* c. XIV. & XV. ut supra fusius adductum est, animaduertit: *Cum dicitur cujusque perfectio, qua in re dicitur, videndum est.* &c. Quum ergo non possit ibi intelligi perfectio graduum seu absoluta, & tamen accipienda sit ejusmodi, quae quibusuis ex Spiritu Dei renatis durantibus conueniat; Theologi recte distinguunt inter eam, quae *veritatis* sit, omnium verarum virtutum semina diuinitus illis insita complectens, & *aequalitatis* alteram. En *VERA* perfectio, non graduum, sed partium istarum, quibus positus homo vere est filius Dei! ib. Matth. V, 45. At enim cur Unigenitus appellat *filios Dei*, & quod maximum est, per-



*perfectos*, a quibus non tam *ÆQUALEM*, quam *VERAM* Dei indolem requirit? cur rationem habet *QUALITATIS*, nec pariter *QUANTITATIS*, in iis, quæ Legis æternæ sunt? Nimirum, quia ipse *mediator* est, perfectionis necessitatem *Foederis Evangelici ordini* attemperans. Ordo foederis Evangelici, quod Deus cum hominibus post lapsum iniit, perfectum seu *INTEGRVM* quid in homine instaurans, hoc tanquam verum & sincerum accipit, prout opponitur simulato & mendaci, & præcise *qualitatem* rei spectat, nec tantopere, quatenus augeri possit, vel non possit; cui licet multi gradus defuerint, non dici id tamen debet, mancum, sed justam habet indolem in genere suo, perfectumque est verissimo illo sensu, quem Hebræa lingua nomine ~~יוֹם~~ designat Gen. XVII, 1. & quo Psalter *subiecti justificandi*, seu *justificati*, necessariam proprietatem exponit, in hoc uno sitam, ut *IN SPIRITU EJVS NON DOLVS* sit. Psal. XXXII, 2. Ita quippe & gratia & veritas per Jesum Christum facta, ut homo in Christo *creatura nova* reddatur, cujus veritas præcepti decimi est quam maxime. 2. Cor. V, 17. Nec vero completam redintegratæ hujus imaginis Dei rationem, seu perfectionem, æstimari ex quantitate, sed ex illa fidei indole, quæ *victoriam de mundo* præstet; 1. Joh. V, 4. Evangelium uniuersa Fidei analogia ostendit. Lex secundum ordinem *Pacti Legalis*, quod ante Lapsum vigeat, hominem *viuificare* poterat ac debebat ita, ut hic omnes ejus numeros expleret, neque opus ipsi remissione esset vel culpæ, vel pœnæ: quod idem præstare Legem Moysi, Scriptura S. negat. Metienda igitur justitiæ perfectio erat ex omni absolute. Sic fiebat, ut supremi gradus merito essent partes maxime principales. Postquam vero partium legis minimarum



& maximarum debitum recepit Christus, Pater coelestis foedus Euangelii tam benigne constituit, ut propter eum non modo pristinorum delictorum non meminisse, nec rigide, quanta debemus, consuetari velit; verum etiam plenissimam ejus sanctitatem nobis attribuere, ac conferre *promissum spiritum, naturam*, seu indolem & qualitatem, *diuinam*; modo corruptionem, quæ *in mundo in cupiditate* inest, fugerimus, & consentanea receperimus fide tantas promissiones. Gal. III, 14. 21, 22. 2. Petr. I, 4. annectens nihilominus & hanc, qua, si dictum vitæ æternæ fundamentum jecerimus fideliter, quo majores tum in Christo obedientiæ novæ effloruerint gradus, eo sublimiora etiam futuræ gloriæ accrescentia præmia expectare habeamus. Hic ergo alia prodit perfectio, quam Legalis illa; nimirum Euangelica. Quicquid justitiæ graduum in foro diuino desiderari potest, perfectio, quæ, a Christo parta, dicitur *IMPUTATA*, abunde affert hominibus, vere in ipsum credentibus: *NON* autem *VERE CREDUNT*, *NISI QUI FIDE PECCATUM VINCUNT ET MORTEM*. Apol. Aug. Conf. p. 112. Atqui hæc *subjecti conditio* est *INHAESIVA* perfectio, non *Legalis* quidem indolis, quæ aliquid mereatur coram Deo; sed ordinis solum Euangelici, ne sanctissimi *Dei gratia transferatur ad proteruitatem*. Judæ v. 4. veruntamen ad Legem etiam foederis noui isthæc ratio refertur hactenus, ut Lex stabiliatur contra peccatum, *ne hoc amplius dominari possit* in homine. Rom. VI, 6. 14. VIII, 1. Quo quidem certo *FINE* constituto factum cernimus, ut *gratia* illa, sub qua Fidelibus tam securis liceat esse, jure suo perfectio agnoscatur vera, utpote quæ omnibus ac singulis Legis partibus *uiuificantem* Spiritum restituit, ipsumque regnantem; neque ideo ex *quantitate graduum*, verum ex *quali-*



qualitate ipsius formæ, quæ quantitatem quidem numericam præceptorum adimplet, censeridebeat. Quum enim intra finem monstratum dicta ordinis Evangelici necessitas cohibeatur, secundum eum partes Legis principes fiunt *primitiæ spiritus*, cui libet præcepto ad dominium peccati superandum atque elidendum accommodatæ ac sufficientes; tametsi ita, ut renati sint ἔχοντες τὴν ἀρχὴν τοῦ πνεύματος, Rom. IX, 23. habentes ac retinentes βεβαίαν τὴν ἀρχὴν τῆς ὑποστάσεως, firmum principium substantiæ spiritualis. Hebr. III, 14. qua locutione admodum significanter *primitiarum substantialium*, seu partium, integritas confirmatur. Gradus autem, qui regenitis deinceps inhæreant, non tam ad finem istum assequendum pertinent, quam ex eo oriuntur, ipsoque, ratione ordinis ac necessitatis ad salutem habita, posteriores, ideoque in pacto Evangelico partes minus principales sunt. Nam manifesta est consecutio, partes, ad rem in specie sua constituendam necessarias, primarias existere; alias vero, quæ certo modo aut tempore sine interitu ejus abesse queant, perfectionem adducere, quam *accidentalem* nominant: unde & *Renovationis gradibus* scite assignantur præmia *accidentalia*. Itaque distinguimus primò inter pactum *Legale*, quod gradus inbasuos omnes ponebat ac requirebat, eoque ipso perfectionem & graduum & partium; & *Evangelicum*, quod perfectionem utramque non minus præ se fert. illam autem hoc e Christo salutariter credentibus imputat, proptereaque eandem non postulat plenissimè ipsis inhærentem; requirit tamen aliquam hujusmodi, sed quæ partium est, nec meriti causa, sed quia eam diuinus ordo, ipsa *Pœnitentiæ ac Fidei* natura, sic efflagitat, ut *Justificatio ex Imputatione Christi* nec esse cujusquam nec manere possit, nisi



qui incedat vestigiis fidei patris Abrahami, quæ fuit in præputio talis, ut contra spem sub spe crederet; Rom. IV, 5. 12. 18. qui- que Spiritum Christi receperit, sine quo ipsius nemo est nec permanet. Rom. VIII, 9. 2. Cor. XIII, 5. qui- que ita intueatur in legem libertatis *INTEGRAM*, & in ea sic perseverare velit, ut in ejusdem effectione beatita- tem retineat. Jac. I, 25. Deinde, ad propositam *Objectionem* hæc non eo sensu regerimus, quasi negandum sit, vel, justitiæ gradus supremos in Foedere Evangelico tan- quam Legis partes attendi, quos Christus persolvit, & nos Fide amplectimur absolutissimos; vel, graduum cu- ram in Renouatione esse necessariam, quæ tam necessa- ria sit, ut, qui ei non sit deditus, sit cæcus, & oblitus, sese a pec- catis veteribus purgatum: 2. Petr. I, 9. sed distinctio omnis eo tendit, ut intelligamus differentiam, quæ semper obser- uanda inter *Justificationem* & *Regenerationem*, atque inter hu- jus Partes *constitutivas* & *consecutivas*. Est ergo Perfectio Partium integra, etiamsi destituatur gradibus; qui rege- nationem, renouationem seu sanctificationem latius di- ctam, inchoatam veram legis impletionem, creatum no- vum hominem, veritatem, quæ in Christo Jesu est, con- sequuntur, confirmant, augent, nec tamen eandem ef- ficiunt aut constituunt: nec isti propterea eximendi sunt a Legis partibus, modo discernantur partes Legis, refe- rendæ ad *Justificationem*, a Legis partibus ad *Regeneratio- nem* reuocandis. In pacto Legali legis partes principales sunt ipsi gradus, ad *justificandum* ita requisiti, ut homini omnes inhæreant. In pacto Evangelico iidem manent partes Legis principales, quatenus *justificationem* inten- dunt; verum hujusmodi gradus quærentur frustra in nobis, inveniuntur autem in Christo, ut nobis *imputandi*: attamen, ut nobis imputari illi possint, ad totam Legis indo-



indolem intra nos renascamur, necesse est ordine immutabili. In hoc partes legis, secundum præcepta omnia, respiciuntur; at indoles ipsarum partium seu *qualitas*, non item *quantitas* ipsorum graduum: qui post *regenerationem* completam, & *justificationem*, demum accedunt, atque idcirco in hac via partes sunt minus principales. Quamobrem partes implende legis principales, in ordine foederis Evangelici, esse gradus ejusdem in se suos; hoc vero est, quod negamus. (Conf. supra p. 9, 10. 12. 36. 41.) Ex quibus evidētissimum simul redditur, quanti momenti sit discrimen, quo partes legis a gradibus in Ecclesia Evangelica distinguuntur, ut ne aditus ad discernendum a Lege Evangelium præcludatur ignaris, vel inuitis etiam.

Quod superest, habemus jam perfectionem Evangelicam duplicem: unam *graduum*, in merito Jesu Christi eminentiæ plenissimam, qua *justificamur* sola coram Deo; alteram illam partium, ad quam regeneramur ita, ut ipsa priorem circumstet in nobis. Nec vero inusitatum esse loquendi modum, quo perfectio graduum e Christo deriuatur, præter cetera testimonio edocemus Leonh. HUTTERI Explicat. Libr. Christ. Conc. *Perfecti sunt renati ratione imputatae justitiæ Christi, quæ in scholis appellatur perfectio graduum; respiciens summum illum gradum, quo Legi divina potest satisfieri. Qualis perfectio in renatos non cadit respectu inhaerentis, & uti Jesuitæ somniant, infusæ alicujus sanctitatis & perfectionis: sed, tantum respectu imputationis per fidem.* De Perfectione Partium, quoad eam Gratia diuina in nobis gignit, notatu dignus est locus apud IRENAEVM, qui Sec. II. docuit, *aduersus Hæreses* lib. V. c. VIII. *Perfectus homo commixtio & adunitio est animæ assumentis Spiritum Patris, & admixtæ in carne, quæ est plasmata secundum imaginem Dei.* Propter quod & Apostolus ait: *Sapientiam loquimur*



mur inter Perfectos. Perfectos dicens eos, qui perceperunt Spiritum Dei, & omnibus linguis loquuntur per Spiritum Dei, quemadmodum & ipse loquebatur. Quemadmodum & multos audiuius fratres in Ecclesia Prophetica habentes charismata, & per Spiritum uniuersis linguis loquentes, & absconsa hominum in manifestum producentes ad utilitatem, & mysteria Dei enarrantes; quos & spirituales Apostolus vocat, secundum participationem Spiritus existentes spirituales, sed non secundum defraudationem & interceptionem carnis, & nude hoc ipsum solum. Si enim substantiam tollat aliquis carnis, id est, plasmatis, & nude id ipsum solum Spiritum intelligat; jam non SPIRITUALIS homo est, quod est tale, sed spiritus hominis aut Spiritus Dei. Cum autem spiritus hic commixtus animæ unitur plasmati, propter effusionem Spiritus, spiritualis & perfectus homo factus est, & hic est, qui secundum imaginem & similitudinem factus est Dei. Si autem defuerit animæ spiritus, animalis est vere, qui est talis, & carnalis derelictus, imperfectus erit, imaginem quidem habens in plasmate, similitudinem vero non assumens per spiritum. Sicut autem hic imperfectus est, sic iterum, si quis tollat imaginem, & spernat plasma, jam non hominem intelligere potest, sed & partem aliquam hominis, quemadmodum prædiximus, vel aliud aliquid præter hominem. Neque enim plasmatio carnis ipsa secundum se homo perfectus est, sed corpus hominis, & pars hominis. Neque enim & anima ipsa secundum se homo, sed anima hominis, & pars hominis. Neque spiritus homo: spiritus enim, & non homo vocatur. Commixtio autem & unitio horum omnium, perfectum hominem efficit. Et propter hoc Apostolus se ipsum exponens, explanauit perfectum, & spirituales salutem hominis, in prima ad Theſſalonicenses dicens; Deus autem pacis sanctificet vos perfectos, ut integer vester spiritus, & anima & corpus, sine querela in aduentum Domini Iesu Christi seruetur. Et  
quam



quam utique causam habebat, his tribus, id est, animæ & corpori & spiritui integram & perfectam perseverationem precari in aduentu Domini, nisi redintegrationem & adunionem trium unam & eandem ipsorum sciebat salutem? Propter quod & perfectos ait eos, qui tria sine querela exhibent Domino. Perfecti igitur, qui & Spiritum in se perseverantem habent Dei, & animas & corpora sine querela servauerunt, id est, illam, quæ ad Deum est, fidem servantes, & eam, quæ ad proximum est, custodientes. Bene in hæc verba GALLASIUS: Cum Spiritus hic commixtus animæ unitur plasmati propter effusionem Spiritus &c. haud dubie intelligit charismata illa spiritualia, quæ effunduntur in animas, & piis hominibus communicantur. Ac ne tres in homine spirituali partes ipsum statuere putemus, commemorandum est id, quod dixit initio capituli. Anima & spiritus pars hominis esse possunt, homo autem nequaquam. Ita conjungit Spiritum animæ, non ut duas partes, sed unam tantum efficiat. Nam animam imperfectam esse docet, quam diu non est particeps Spiritus Dei. Ac propterea dicitur a Paulo homo animalis, qui remanet in naturæ corruptæ meta, ut differat a spirituali, in quo imago Dei, prius deleta, Spiritu Dei renouatur. Quocirca sanctiorem meditationem merentur dicta I. Cor. II, 14. & Judæ v. 19 ubi impii vocantur animales, non habentes Spiritum. Conf. Jac. III, 15. BROCHMANDUS hic commentatur: Sapientia animalis est, quam homo consequitur vi ac virtute, ac industria animæ, sibi relicta, nec a diuina gratia singulariter adjuncta: alias vocata sapientia hujus seculi, & principum hujus seculi, qui pereunt. I. Cor. II, 6. Talem autem esse sapientiam, quam jaçant alienorum dictorum & factorum morosi censores, probatum facillimum est.



## OBJECTIO II.

*Non posse fieri, ut partes Legis omnes  
serventur; præsertim prima & ulti-  
ma: nec Spiritus dominium legi satis-  
facere; semper autem remanere pec-  
catum & concupiscentiam.*

## RESPONS. AD I.

**D**Ubi-um nullum superfuerit, quin omnino omnes Le-  
gis partes absolute illa perfectissima expleantur,  
quæ in Christi iustitia, vero spiritu credentibus a Deo im-  
putata, consistit: quam propterea recte nominari Perfe-  
ctionem Graduum Evangelicam, monuimus modo. Con-  
sultatur ad hæc venerabilis ac meritissimi SPENERI, tam  
de isto locutionis usu, quam de toto perfectionis argu-  
mento, *Præfatio* in B. KOEPKENII Dialog. de *Tribus San-  
ctorum gradibus*. Quum vero dudum probatum sit, nobis  
de Perfectione Partium *inbæsiua* disceptantibus, a conside-  
randa omni graduum perfectione, & Legali & Euangeli-  
ca, discedendum esse, & subsistendum in solis partibus,  
quæ indolem ipsius legis intra nos in integrum restitu-  
ant, tanquam principalibus in regenerationis negotio Eu-  
angelico, ac reliquarum omnium *accidentalium* seu *gradua-  
lium* radicibus; exinde litem hic præcisam arbitramur,  
quandoquidem hætenus abunde satisfactum illi quæstio-  
ni est, quomodo omnia & singula præcepta ipso fidei &  
charitatis spiritu præstentur. Nisi enim, agentes de par-  
tibus,



tibus, veram integritatem apud animum vero in fundamento constituentibus, *saltem & confusionem* euitauerimus oppositam; nec Scripturæ dicta, nec res ipsæ necessaria distinctione exponi poterunt. Exemplum huiusmodi supeditat controuersia, ad quam Pontificii, doctrina de Perfectione abutentes, protrahunt sanctas litteras, quibus aliqui seruasse mandata perhibentur. Rectissime respondet iis SCHERZERUS p. 759. *Quoad essentiam, non quoad complementum* (NB. alias ita efferunt, *quoad SVBSTANTIAM ACTVS, non gradum perfectionis*) *quoad qualitatem sinceritatis, non quoad quantitatem, vel intensiōis, vel extensionis* ad quosuis actus seu adjuncta actuum. Notamus; ibi qualitatem sinceritatis, essentiam, substantiam actūs (nempe *ex viribus collatis*) nihil aliud dici, quam quod perfectionem partium appellamus: quam si negare maluisset Auctor, quolibet alia responsione veritati haud respondisset.

Ex quo porro dijudicatur facile, quam frustra sint, qui non dubitarint negare, quod Spiritus Christi in Fidelibus omnem Legis partem faciat, seu impletionem legis *quoad substantiam*; objectantes illa ex *Apologia Aug. Conf. p. 91. Quid opus est longa disputatione? Tota Scriptura, tota Ecclesia clamat, LEGI NON SATISFIERI.* Non igitur placet ipsa inchoata legis impletio propter se ipsam, sed propter fidem in Christum. Alioqui lex semper accusat nos. Quis enim satis diligit, aut satis timet Deum? quis satis patienter sustinet afflictiones a Deo impositas? Quis non saepe dubitat, utrum Dei consilio, an casu regantur res humanae? Quis non saepe dubitat, utrum a Deo exaudiat? Quis non saepe stomachatur, quod impii fortuna meliore utuntur, quam pii; quod pii ab impiis opprimuntur? Quis satisfacit vocationi suæ, quis diligit proximum sicut se ipsum? Quis non irritatur a concupiscentia? Ideo Paulus inquit: Non, quod volo bonum,



*bonum, hoc facio, sed, quod nolo, malum. Item: Mente seruo legi Dei, carne autem seruo legi peccati. His aperte prædicat, se legi peccati seruire. Et David ait: Non intres in iudicium tuum cum seruo tuo, quia non justificabitur in conspectu tuo omnis uiuens. Hic etiam seruus Dei deprecatur iudicium. Item: Beatus vir, cui non imputat Dominus peccatum. Semper igitur in hac infirmitate nostra adest peccatum, quod imputari poterat. De quo paulo post inquit: Pro hoc orabit ad te omnis sanctus. Hic ostendit, sanctos etiam oportere petere remissionem peccatorum. Nam quis est, qui non videat, nihil hinc contra perfectionem partium, sed tantum dici omnia contra perfectionem graduum inhaesiuam, qua legi satisfiat? id quod ipsa Thesis præfixa, his speciminibus declarata, luculenter præfert. Agitur de sanctis, quibus sane adhuc cum tentationibus conflictandum est. Hinc quoque non absolute, sed ita: Quis SATIS diligit Deum? Quis non SAEPE dubitat? Neque alio sensu tribuendum iis, quod sequitur: quis diligit proximum, sicut se ipsum? qualis enim dilectio Dei, talis & proximi. Hanc plane mentem illorum esse, docent etiam uno ductu sequentia: Plusquam coeci sunt, qui malos affectus in carne non sentiunt esse peccata; de quibus Paulus dicit: Caro concupiscit aduersus spiritum, spiritus aduersus carnem; caro diffidit Deo, confidit rebus presentibus, querit humana auxilia in calamitate, etiam contra voluntatem Dei, dubitat de Dei misericordia &c. Cum talibus affectibus LUCTATUR SPIRITUS SANCTUS IN CORDIBUS, ut eos reprimat, ac mortificet, & inserat novos spirituales motus. Ergo de iis sermo est, in quibus Spiritus Sanctus habitat ac dominatur juxta legem uniuersam; in quibus quum unà sint peccati reliquiae, actusque & gradus imperfecti, propter hos noua integritas non iudicanda est mutila. Et quomodo mutilata sit ipsa ex carnis infirmitate*



mitatibus, dum ex tota lege militat, carnem legi seruientem cohibet, frenat, subigit, ne mens ab ulla præceptione in captiuitatem pertrahatur? Quapropter nihil prope vel inconsideratius, vel malitiosius fieri potest, quam si Scripturarum sanctissimarum, & Ecclesiasticorum scriptorum ejusmodi loca, quæ Fideles de carnis sensu imperfectos arguunt, obuertuntur aliis, quæ perfectos eosdem ob Spiritus veritatem (πίσω ἀνυπόκριτον 1. Tim. I, 5.) prædicant. *Opponuntur* sic minime opponenda. Quod quidem glaucōma ob oculos imperitorum facillime objicitur; sed nos perhorrescamus illud: *Maledictus, qui errare facit cæcum in via: dicetque omnis populus; Amen.* Deut. XXVII, 18.

Nec longius ab ineptiis aut dolo abest, quod vulgo jactitatur: esse neminem, qui præcepta omnia obseruaret sine intermissione, nec iis quandoque exciderit. Namque id alienum est ab hac quæstione, ubi non disquiritur, an perfectio partium continua per totam vitam, & nunquam interrupta esse queat; quæ res alia tractatione indiget, neque hanc ferit, præfinitam restrictæ ita, ut de ipsa integritate Stantium, congruatne cum omnibus præceptis, non vero, quamdiu perseueret, judicandum sit. Est magis idoneum, de quo quærat; quomodo accipienda sint Apostoli verba 1. Cor. XIII, 9. 12. *Ex parte cognoscimus: & quod inde produxit, Augustinum sequens, Magister sententiarum LOMBARDUS 3. sentent. distinct. 27. ex parte diligimus, sicut ex parte cognoscimus.* Neque hic quidem *PARS* significat partem Legis substantialem, sed imperfectam cognitionem mysteriorum Dei, quam sequitur dilectio, gradibus imperfecta. Similiter Auctores, veteres ac recentiores, non raro loquuntur, *legem non ex omni parte compleri: sed* eos hac locutione non nisi omni-



bus numeris absolutam negare perfectionem, & partem pro gradu accipere, docet res ipsa, & GERHARDUS, de Lege Dei, ostendit hisce: *Obedientia licet RIGORI LEGIS non OMNI EX PARTE SATISFACIAT*, tamen placet Deo, quia ex fide, & a dilectis filiis proficiscitur, ac, si quid vel imperfecte vel minus fit, propter Christum ipsis condonatur. Quod si docentium aliqui partes quasdam, quæ non impleantur, gradibus opposuerint, cogitantes de minus principalibus, vel circumstantiis, quæ & ipsæ ad eos certo modo pertinent; atque inde si unus, vel alter ex Scriptoribus, negarit perfectionem partium: hi certe immemores fuerint doctrinæ intimæ, quæ causæ hujus fundamentum est, de natura tum regenerationis, tum perfectionis integralis, tum pacti Evangelici. BALDUINUS perfectioni non nimium defert, nec tamen ipsam integram negat. *Etiam si*, inquit in 2. Cor. VII, part. I. Aphor. *perfectionem solidam in hac vita nunquam attingemus, ad eam tamen contendere oportet: ideo jubemur περιπατεῖν, ambulare in nouitate vitæ, Rom. VI, & esse perfecti, Matth. V, 48.* Intelligitur autem perfectio non essentialis, quæ secundum omnia requisita exacte congruit ad regulam legis diuinæ, qualis fuit in homine ante lapsum; (hic ad essentialem perfectionem ipsi etiam gradus referuntur, quo sensu neganda illa omnino est de Fidelibus post lapsum: aliàs Toti essentiali sufficit, quod necessarium est ad dandum esse rei, ut loquuntur; atque ita perfectionem partium, tanquam essentialem quoque, considerauimus supra c. I, §. IV, 4.) *sed integralis, qua quis secundum OMNIA mandata Dei facit, quantum per Spiritum Dei in hac infirmitate potest. Et hic in primis aut secundis subsistere non licet, sed progrediendum est quotidie; nam in viis Domini non progredi, est regredi.*

AD II.



## AD II.

**P** *PRIMA* Legis pars, præcepto Decalogi primo maxime expressa, & *negatiue* a Mose, & *affirmatiue* a Christo proposita est ita, ut intensius quidquam excogitari non videatur posse. Contra non existimandum, in Scriptura Sacra de Stantibus Renari ejusmodi quid minime efferri, aut minus proprie seu vere id usurpari. Testatur ipse Spiritus Sanctus de Dauide 1. Reg. XIV, 8. *bunc seruasse mandata Dei, & ambulasse post Deum in TOTO CORDE suo, ad faciendum tantum rectum in oculis Dei.* cap. XV, 3. *Dauidis cor fuisse PERFECTVM CVM JEHOVA Deo suo.* 2. Chron. XXXI, 21. *Jechiskiam fecisse bonum & rectum, & veritatem coram Deo; & in omni opere, quærendo Deum suum, fecisse in TOTO CORDE suo.* 2. Reg. XXIII, 25. *Josiam reuersum ad Jehouam, in TOTO CORDE suo, & in TOTA ANIMA sua, & in TOTIS VIRIBVS suis, juxta TOTAM legem Mosis.* David de se ipso ad Deum dicit Ps. CXIX. *In TOTO corde meo quasiui Te.* v. 10. *precatus sum facies Tuas in TOTO corde.* v. 58. *ego in TOTO corde seruo mandata tua.* v. 69. *clamaui in TOTO corde; responde mihi, JEHOVAH: ut statuta tua custodiam.* v. 145. In Nouo etiam Testamento Act. VIII, 37. Philippus ipso de conuersionis negotio respondet, Eunuchum non aliter baptizandum, nisi *crediderit TOTO CORDE*: hujusque conditionis testimonium Eunuchus accepit internum, ut Philippo ablato proficisceretur *LAETVS.* v. 39. Quibus effatis atque exemplis ut nolumus pro argumento ad statuendam *graduum perfectionem* uti, fictamen negari nequit, integritatem primi præcepti, quæ *absolute* capi non potest, accommodate, ad vires Spiritus Sancti receptas, significari verissimam.

Quod ut eo plenius & distinctius intelligi possit, quoniam  
niam



niam mandati primi indoles sine ultimo non perspicitur, confestim progredimur unâ.

### AD III.

**D**E parte *ULTIMA* Legis seruanda. Atque hîc circa utrumque & omnia Decalogi præcepta, maximam hæsitationis ansam sustulimus, quando supra ex *Augustino* p. 61. 62. observatum est, ad perfectionem partium non requiri, ut *BONUM* circa singula *PERFECTUM* sit, verum, ut *BONUM* circa singula *VERE FIAT*: illud enim esset perfectionis graduum; hoc autem partium perfectionem sistit integram, si nullum est præceptorum, juxta quod homo non præstet seu faciat bonum vero cum effectu. Aut enim nihil est discriminis inter hæc duo, *facere bonum & bonum perficere*; aut, si differentia omnino est magna, juxta eam quoque utraque perfectio censenda fuerit. Si quis putarit, ita non de partibus, sed de solis gradibus dicendam perfectionem; diuersum reputandum offerimus *respectum*, quod perfectio partium non sit, cujus unaquæque pars etiam perfecta reperiatur; id quod ipsam efficeret graduum perfectionem: sed, cui nullius partis, seu præcepti, vera indoles desit, ita, ut noua spiritus integritas toti respondeat mandatorum *systemati*, ut cum Musicis loquar, consensumque legis & quasi concentum referat, æquabiliter, si nondum æqualiter, inchoatum. Consulendus hanc in rem B. Lutheri *Tractatus de Bonis Operibus*, qui depingit miris modis, qua ratione fides per charitatem, tanquam *instrumentum*, (conf. ejusdem Comment. in Epist. ad Galat. c. V.) omnes legis partes animet, hæque exinde instar *ANNULI* se habeant, quarum alia aliam sic contingat, ipso fidei & charitatis influxu, ut omnes



omnes singulæque expleantur. Quod sane opus in primo & ultimo præcepto evidentissimum est: illius charitas hujus implet desiderium, extinguens cupiditatem; atque hujus prohibitio sollicitat eam magis magisque, ipsosque gradus elicit.

Jam vero quis, obsecro, ausit negare, quod præceptum primum a Stantibus sic verissime seruetur, ac seruari possit? Ex ore Christi S. *Johannes* ubique tradit certissimum Regenerationis signum, charitatem; quam *Paulus* docet mandati finem esse, & dari in hac vita *ex puro corde, & conscientia bona, & fide non ficta*, atque effundi in cordibus per Spiritum Sanctum: 1. Tim. I, 5. Rom. V, 5. *Petrus* ex natura, seu indole divina, penes Renatos deriuat, cum omni virtute, largiter augendam. ep. I. c. I. Idem hic post Conversionem suam ter a Christo interrogatus de charitate, etsi de gradibus nil profiteri audebat, ipsam tamen, constanter respondebat, apud se inueniri veram; nec ideo a Christo, cujus omniscientiam appellat, reprehenditur. Joh. XXI, 15. Si quis autem animum induxerit, affectionem isthanc in Fidelibus primo præcepto haud vere conformem existere; is uniuerso opponit se Euangelio, ut suprap. 65. &c. commonstramus, fontemque omnium Spiritus fructuum verarumque virtutum obstruit. Joh. XIV, 21. 23, 24. Neque enim Christum & Deum congruenter amat, nisi qui suauitate Domini intime perfusus, omnium rerum despicientiam persentiscit; qua sola via ut mandati primi habetur mens, ita Christiani officii omnis fortitudo aperitur.

Sin de summo præcepto nihil dubii superesse potuerit, quid scrupuli de ultimo restet? nisi forte hoc propter negationem additam supremum visum fuerit. At legis



circulus in seruando semper recurrit ad initium, quonempe fidei ac charitatis ardente spiritu, ipsa concupiscentia, veluti mors, ad victoriam absorbetur. Quin necesse est, cum reliquis omnibus decimum quoque in primo expediatur, si tota lex præceptum est unum. Rom. XIII, 9, 10. Gal. V, 14. RUFFINUS Aquileiensis in Psal. II. *Quia non PRAECEPTA, sed PRAECEPTUM dicit*, Joh. XII, 49, 50. XIII, 34. *fortassis charitatem nobis innuit, in qua cuncta praecepta finiuntur: & quam si quis impleuerit, cetera ab ipso implebuntur.* Hoc praeceptum nobis quotidie Christus prædicat, hoc praecepto a terris ad coelestia subleuat: & quicquid per alia praecepta dicit, mittere nos ad hoc UNUM praeceptum semper intendit. Quod quidem duplex est mandatum: nam IN DILECTIONE DEI EST DILECTIO PROXIMI. Et scriptum est, *quia in his duobus mandatis pendet Lex & Propheta.* Quicquid ergo Lex, quicquid Prophetia, quicquid Euangelium, quicquid sermo Apostolicus prædicat: OMNIA UNUM PRAECEPTVM, id est, *charitas una consummat.* Conf. supra p. 26, 27, 28, 29, 30, 35, 38, 39, 40, 41, 43, 44, 45. Tam prolixè est demonstratum, quomodo pars Legis etiam illa, *Non concupisces*, apud Regenitos impleta sit; neque in iis perfectionem partium completam esse neget, verum alteram solum, quæ graduum est.

Videamus autem, quid pugnare adhuc contra possit. Omne contradicendi momentum vertetur in eo, quod decimum mandatum a ceteris tantopere discrepet, ut, quum hæc aduersus actus peccandi ipsos posita sint, illud contra intimum propensionis malum, quod in Fidelibus saltem insidens manet, tendat, nec, nisi isto funditus sublato & extirpato, præstetur. Ne superuacaneum hic laborem innouemus ad respondendum, tria præbemus recogno-



cognoscenda ex superioribus. (1) differentiam decimi præcepti non eo extendi posse, ut apud regenitos durantes in seruando haud concilietur; quum spiritus Christi, ipsis collatus, defectum non modo compenset, verum etiam decimum præceptum sic impleat, ut sine eo nullum reliquorum exerceri possit. vid. p. 32, 33, 34, 35, 36, 37. 41, 42, 43, 44, 45. 48, 49, 50. 58, 59. 61. 81. (2) præcepti decimi *objectum adequatum* non esse litteram illam *negatiuam*, sed tantum *secundarium*; *primarium* autem consistere in Spiritu Euangelii restituto, qui & illi respondeat. p. 25, 26, 27. 30. 32, 33, 34, 35, 36, 37, 38. &c. 44, 45. 49, 50. 57, 58, 59. 61, 62. 71, 72. (3) hinc contra Scripturam ac veritatem dici; quod præceptum decimum non præstetur, quamdiu concupiscentiæ radix superest. p. 26. 33. 37. 44, 45. 50. 52, 53. 58, 59, 60. 62. 65. &c. 72. Quibus sat coniectis, argumentum primum sic diluimus: Si mandatum ultimum, præter actus vitiosos & prauum consensum, ipsa concupiscentia interdicat; & vero hæc in vere conuersis non *mortificata* est, nec ipsi contra eandem muniti sunt spiritu dominante, concupiscente rectius: ex eo efficeretur demum, postremam legis partem ab iis non seruari. E contrario cum allegatis ceteris considerandum, quod Rom. VI. VIII. &c. scriptum est, præsertim illud Rom. VIII, 10. *Si Christus in vobis, corpus quidem mortuum est propter peccatum, Spiritus autem vita propter iustitiam.* unde infertur, ipsos non amplius *debitores carni* esse. v. 12. Deinde, ut amplius intelligatur, quomodo præceptorum differentia non ita accipienda sit, quasi praua inclinatio eadem non vetita in ultimis, & priora inde facilioris fuerint obsequii: animaduertimus, quemadmodum eo nexu partes Decalogi pollent, ut una charitas mandetur, ita & unam eandemque amandari undique concupiscentiam;



quæ quidem propter varia *objecta* reputari diuerse, & propter hominis socordiam augeri potest. *Paulum*, absolute dicentem, *Non concupisces*, unâ cum *Christo* & *Jacobo*, verum hunc legis usum docere; optime commonstrat sæpe laudatus *Chemnitius*, ex Matth. V. Rom. VI, 12. VII, 22, 23. Gal. V, 16. &c. Jacob. I, 14. *Loco Theol. de Lege, nono & decimo præcepto.* Cum quo licet statuerimus, in reliquis, secundæ tabulæ interdictionibus, accusari significantius *illos affectus*, ad quos consensus accedit; in ultimis duobus, *primos motus*, & intimam omnis mali appetitionem, expressius: tamen non sequitur, eosdem nullatenus prohiberi in prioribus: imo sciendum, horum enunciata suppleri ipsis postremis in *VNA* Lege, utpote quæ de uno spiritu ac de una carne agit. Quo spectat *Synecdoche*, secundum quam non sumenda una modo *species* expressa, sed omnia bona, seu mala, ejusdem generis intelligenda sunt, maximeque fons & origo omnium. Neque aliam ob causam & generalius, seu *collectiue*, Scriptura loquitur: *Delector lege Dei, juxta interiorem hominem; video autem aliam legem in membris. &c. Caro concupiscit aduersus spiritum. &c.* Rom. VII, 22, 23. Gal. V, 17. Non igitur sentiendum: quamuis seruentur alia, ubi consensus non accesserit; ultimum tamen, etiam consensu omni excluso, non fieri. Valeret quidem hujusmodi consequentia, si Lex, ut *injustis posita* primum est sub forma accusante & condemnante, ita eosdem non mutatos respeceret, quoad proponitur implenda: tales enim recte dicerentur obedire, tanquam homines non *spirituales*, legi non *spiritualiter* spectatæ, in iis, circa quæ consensum refrenarent; *posito*, id fieri posse; & non obedire juxta mandatum ultimum, non abstinentes a prima procliuitate. Quando autem Lex *spiritualis* est, Rom. VII, 14. homi-  
nes



nesque spiritu poenitentiae ac fidei redduntur *spirituales*, Rom. VIII, 5. 1. Cor. II, 12, 13. 15, 16. Gal. VI, 1. non modo secundum reliqua, sed ante omnia eo pacto, ut in charitate *RADICENTUR* ac *FUNDENTUR* ad implendum postremum, tanquam ipsius Legis fundum; Eph. III, 18. Col. II, 7. sine quo fundamento contra praeceptum nullum consensus vere cohiberi potest: tenendum equidem, ultimo non servato, ne ullum quidem usquam servari; attamen vere servari illud, non solum, quod apud sanctos voluntas cupiditatibus surgentibus haud consentiat, sed apprime ex eo, quod *concupiscentia recti spiritus* conseruetur *dominans ac firma*, neque iis cedat. quod ipsum reuera est, *non consentire*. Atque ita fit uno prorsus modo in uniuersis, ut consensus non praebetur, radice ista spiritus recti manente, inexhausta. Nam *dominium*, quod dicitur, semper ex alterutra parte unum est, quo vel peccatum, vel stabilita, lex imperat: *dominium spiritus, vel carnis*. Eo in renatis superstita, saluae sunt legis *partes*, nec cupiditatibus, quatenus has spiritus *crucifigit ac mortificat*, franguntur; tum ipsa pars ultima est, quae sustentat roboratque omnes & singulas: quam eatenus non servari, quis sine aperta veri offensione dixerit? Si quis interea scrupuli sit tenacior, quaerens: cur vero tam clarum discrimen fuerit, inter ultima & antecedentia, ut haec ipsos *actus*, illa concupiscentiam & propensionem prohibeant? responsio, e prioribus succurrens, sufficit. Error est in *differentiae respectu* dirigendo, qui ad Fideles contra, ac oportet, refertur. Deus aliter ad regnitum, aliter ad irregnitum dicit, *Non concupisces*: hunc *concupiscentiae dominantis* arguit, qua perseuerante opera omnia, etiam si consensus interdum non videatur accedere, sint *mortis fructus*; Rom. VII, 5. illum non



ita intuetur, sed quum is verbum idem, *non concupisces*, contrario fidei & charitatis spiritu impleat dudum, paterne quidem ipsum commonefacit, ne cupiditates, quibus tenetur adhuc, porro eneruare unquam negligat, aut immemor fiat, tum *redemptionis*, cuius solius gratia earum & violentiæ & reatui obsistat, tum *imperfectiōis graduum*, qua non agnita semetipsum deceperit. 1. Joh. I, 7, 8. Itaque non omnino nullus discriminis præceptorum est usus apud Stantes, quando littera, de cogitationum interiore, malo, deterret, ne quis ratione actuum se putet legi *satisfacere*; utpote cui mentis inflationi respectus *graduum* obstat, assiduis defectibus obnoxiorum: Jacob. III, 2. nulla autem differentia mandatorum in eo statuenda est, quasi in seruando etiam ipsæ *partes* Legis diuulsæ haberi possint; quarum potius una in omnibus veris actibus existit vita, seu radix *spiritualis*, noua ipsa indoles, optima quæque concupiscens. Conf. supr. p. 33, 34, 35.

Iterum nascitur hæc ratiocinatio: Quodcunque præceptum consistit totum in tollenda concupiscentia originali, atqui hanc in ipsis regenicis adhuc semper actuose habitantem inuenit, illud ab iis non seruatur. At nos vero (1) de *Antecedentis* priore membro jam monuimus, tantum abesse, ut totum X. præcepti argumentum sit labes corrupti appetitus, ut etiam littera ista *negatiua inferior* tantum ejus pars sit, propter naturam infirmatam adhibita; & altera pars *superior* inferiorem simul sarciat, ea nimirum ipsa, quæ ex fide apud nos instauratur, *inductio noui hominis* dicta. Propterea CHEMNITIUS primam interpretandæ Legis regulam ponit; *in singulis præceptis latere antithesin*, ut, quando expressa negatione aliquid prohibetur, contraria affirmatio subintelligi debeat. vid. supr. Nota



P. 37. (2) Nec alterum antecedentis membrum valere ad inferendam consecutionem, docet natura ipsius status gratiæ. Licet enim residens in Fidelibus peccati sensus actuosus sit usquequaque, tamen afficit modo eos, nec conficit; premit; non opprimit. Atque ideo prohibitum *concupiscentiæ originalis* malum non exhaurit præceptionem decimam, quod hæc maxime tendit ad oppositum *justitiæ originalis* spiritum; in cuius, per fidem recuperatæ, *dominio positivo* acquiescit, modo inchoato, non minus hoc ultimum, quam præcepta cetera. Dum igitur Spiritus fidei victoriam retinet, nec cessat gratia; servatur sane illud constanter: nisi enim servaretur, excideret homo spiritu recto & tota lege. Huic autem, concupiscentiam vincenti, *donum adhuc perfectum* est, & ipse *effector operis*, atque in hoc opere suo *beatus*. Iac. I, 12-17. 22. 25. Non ergo concupiscentia in Stantibus partem legis ullam diruit, sed modo impedit perfectionem gradibus consummandam: de qua non est quæstio.

Hæc vero ne tantopere confundatur cum inchoata, constante omnibus veris partibus; tertio dispiciamus utramque penitus in radice damni superstitie. Quod gratia peccatum superet, hoc negotium videri potest ad ipsos pertinere actus solummodo, nec tam decimi esse, quam noni præcepti. Ergone autem lux videbitur occupare usquam locum, ubi non caliginem profliget? aut lumen spirituale id non præstabit, ut juxta Legem accensum dissiparit tenebras? Esto victoria in certis actionibus ad nonum referenda: non erit talis, nisi ipsa ex decimo profecta sit, cujus *spiritus* est, qui *actiones corporis mortificans*, vitam affert. Rom. VIII, 13. Exemplum suggerat *Nathanael*, in quo Christus *dolum* inesse negat. Joh. I, 48. Hic quæro, an  
nullum



nullum habuerit dolum aduersus nonum, attamen aduersus decimum? Nequaquam Dominus sic capiendus. Audiamus interpretem Spiritus Christi *Dauidem* in supra adductis verbis Psal. XXXII, 2. *Non in Spiritu ejus dolus*. Spiritus hominis fraude carere nequit aliter, quam ut gratia utriusque mandati, exprimentis interiora, firmiter contra peccatum recepta sit: quomodo enim dolus non adfit contra *nonum*, ubi juxta *decimum* non fundata sit veritas; vel, ubi hæc non potiores vires, quam caro, exferat? *Natus ex Deo*, an circa decimum præceptum æqua lance adhuc peccatum gratiamque habuerit? Cur vero hic idem non peccat in nonum, aut alia? nempe, quia *semen Dei in eo permanet* juxta decimum, & usque adeo quidem, ut eatenus nec possit peccare ex Deo natus. 1. Joh. III, 9. Jamne vides, cur apud *justificatum* dolus in spiritu non sit; quodque ipsum decimum ante omnia seruetur, nec ejus implendi integritas in postremum locum sit rejicienda, nedum relinquenda in dubio, sed omnis sanctimonix initium existat? Nisi enim *habitualis gratia* sic radicetur, ut sola imperans mentem possideat, peccatumque *habituale* omni dominandi consortio priuet, nullius mandati virtus emergere potest. Ipse nouus sanctæ charitatis instinctus, quo juxta decimum animus concitatur ad auertendum omne malum a proximo, is, inquit *Paulus*, ipsa *Legis impletio est*. Rom. XIII, 10. Tamenne igitur radix peccati superstes faciat, ut pars Legis ultima deficiat? Nullomodo. Vel, an homo, stans in gratia Dei, radicem spiritus & carnis æquali habebit & pari jure? Peccatum habet, ast redactum in cineres: Gratiam habet, ast viuentem atque ardentem. Reuiuiscant malæ reliquix, v. c. propensionis ad homicidium; gratia resistens ita superior esse poterit



ac manere, ut renatus durans *teneat vitam aeternam in se manentem*, quæ ipsa decimi præcepti summa est. 1. Joh. III, 15. Quapropter, si in nobis *vetus homo sic cum Christo crucifixus est, ut corpus peccati aboleatur, nec posthac serviamus peccato*; hæc est partium legis omnium instauratarum perfectio, quæ a radice peccati in cineribus superstite non disrumpitur: ut autem isto in statu magis magisque illud aboleatur, ex eo incipit accessio graduum, contendens ad perfectionem absolutam.

## AD IV. &amp; V.

**Q**UOD inchoatum *Spiritus dominium legi non satisfaciat*, concedimus: sed, perperam inde oppositio petitur adersus rem præsentem. Quum enim apud Theologos verbum, *satisfacere*, rigorem Legis summum exigat, sine quo Stantes in Lege & iudicio Dei paterno *consistunt beati*: Ps. I, 1. 5. hinc defectus satisfaciendi perfectionem quidem *in besuam* graduum impedit; non vero eam, quæ ex partibus integra est, licet hæc in iis supremum apicem nondum ascendat. Ceterum, ne quid dubitationis superet, an ipsa fidei ac charitatis victoria partem Legis primam, atque ultimam pro veritate satis impleat; sequentia addimus: (1) Scriptura de *dominio spirituali* loquitur *privative*, ut in renatis peccatum dominari neget, ipsosue huic servire, obsequi: Rom. VI, 6. 12. quo quidem respectu lex *complete* servari non videtur, nisi intellexerimus, unde fiat, ut in iis haud regnet prauitas. id quod (2) Scriptura *positive* acceptum refert *Gratia*, ad dominium perductæ. Rom. VI, 14. **PECCATUM VOBIS NON DOMINABITUR, NON ENIM SUB LEGE ESTIS, SED SUB GRATIA.** Apud Stantes igitur non tantum non dominatur Caro, sed contra dominatur

N

Spiri-



Spiritus; atque hic ipse *cupiditatem* opprimens, regulæ & initium & finem *charitate* complet. Nec vero ullum est præceptorum, quod impleatur aliter, quam dominio Spiritus, intentatum carnis dominium reprimente, ac firman-  
te gratiam: Rom. VI, 12, 13 ut eodem vel & decimum ser-  
uetur primum omnium, vel omnino nullum. conf. sup. p. 93. 96. (3) Gratia hæc Euangelii regnans efficit, ut *qui Chri-  
sti sunt, crucifixa carne, interiorius & uiuant spiritu, & spiritu  
agantur, & spiritu quoque ambulent.* Gal. V, 16. 18. 24, 25. in  
quibus veritatem Legis, *inchoate* completam, quiuis agno-  
scit. Neque id tantum; sed etiam præstat eadem, ut in  
hoc Spiritus cursu incedentes *JURE LEGIS COMPLETO*  
gaudeant. Rom. II, 4. nec peccatum, quo afficiuntur de-  
nuo, ipsis imputetur, *sub lege* non existentibus. Gal. V, 18.  
B. LUTHERUS ad illa, *Si autem spiritu ducimini, non estis  
sub Lege;* in Comment. cap. V. ad Gal. *Quia jus ademptum  
est legi per Christum, qui factus est sub legem, ut eos, qui sub  
lege erant, redimeret: ideo hoc, quod vere peccatum est contra  
Legem, Lex pro peccato non potest accusare in PIIS. TANTA est  
igitur POTENTIA DOMINII SPIRITUS, ut, quod vere peccatum  
est, tamen Lex non possit accusare.* Hæc autem potentia do-  
minii Spiritus, quam *justificati* in *CHRISTO* habent, *justifi-  
cationem* sic continuare non posset, nisi eadem in illis con-  
seruaret fidei victoriam, tanquam totius legis impletio-  
nem: simulac enim partem legis ullam vere non tene-  
rent, sub legem redigerentur, nec spiritum haberent domi-  
nantem. Conf. sup. p. 34, 35. Esse igitur sub Gratia do-  
minante, & præceptum Decalogi ullum non seruare; hæc  
duo ex iis sunt, quæ dicuntur *CONTRADICTORIA*. Quando  
ergo *nihil potest simul esse, & non esse;* Gratia operans & do-  
minans, seu Spiritus dominium, est ipsa totius legis veri-



*tas inchoata.* Quod nisi fuerit verissimum, Christus nunquam dixerit tanta *emphasis*, ὅτιως, ipso actu & statu vero *liberos*, & peccatum non facientes, quos liberarit agnita ipsius veritas. Joh. IIX, 32. 34. 36. Neque aliter, quam ex isto spiritus præsidio, juxta primam & ultimam Legis partem, *charitas est VINCULUM PERFECTIONIS*, quod tam firma veritate animos communit, ut ipsa *PAX Dei*, concupiscentiæ opposita, *imperet in cordibus*, Col. III, 12, 13. *mentemque omnem illa exsuperans*, custodiat corda & sensus in Christo Jesu. Phil. IV, 7. id quod præcipuum in Lege est. Itaque manet Pauli sententia: Gal. VI, 2. *PORTANTES* charitatis onus, spiritu dominante, sunt *IMPLENTES legem Christi*.

Denique, *semper remanere peccatum & concupiscentiam*, negandum minime, ut sæpe monuimus; quo minus vero hæc conditio integritati Legis partium obstare in sanctis videatur, porro considerandum bene, quod modus sit maxime diuersus in statu *iræ* & in *gratiæ* statu. Apud hominem, qui nondum ex vera poenitentia cum Deo unitus est, *affectus peccandi per ipsam Legem viget in membris, ad fructum ferendum morti*; non item in eo, qui per Christum *uiuificatus* fuerit. Penes hunc enim concupiscentia *mortificata* reperitur, ut ipse, *ex mortuis cum Christo excitatus, fructum ferre Deo secundum Legem uniuersam possit*; & *liberatus a Lege peccati*, seu affectu carnis, (qui eum antea *detinebat*, nunc autem post justificationem *succumbit mortuus*) *seruiat in nouitate Spiritus*, quæ ad decimum præceptum pertinet, *ac non in vetustate litteræ*, sub qua peccatum erat efficax. Neque hîc ita præpostere agendum, ut ipsa Spiritus nouitate existimet indutum se, qui peccati efficaciam regnantem adhuc sentiat; quo in statu hunc talem non posse capere, qua ratione mandatum ultimum ve-



re fieri queat, haud mirandum: sed cedat ille Augustino, juxta Scripturam, *intelligens, se nondum accepisse vires necessarias*, quæratque eas justo ordine, & meditetur laudati Patris consilium, quod communicamus sup. p. 55, 56, 57. Exemplum idem ipse optimum præbet suum, *Confessionum lib. VIII. cap. XI. XII.* cum enim in lucta carnis & spiritus diu impotens hæssisset, tandem experiebatur, *quasi luce securitatis infusa cordi suo, omnes dubitationis tenebras dif- fugisse*; & quidem ex eo Scripturarum dicto, quod victo- riam in decimo præcepto monstrat Rom. XIII, 14. *Indui- te Dominum Jesum Christum*, loco veteris hominis in omni- bus facultatibus; sic nempe fiet, ut *carnis pronitatem ne fa- ciatis ad concupiscentias*. Quod quomodo impletum in Au- gustino, & quantopere is dominatus sit tum, atque exsul- tarit triumphans de ipso illo concupiscendi malo, quod diu visum erat insuperabile; initio lib. IX. c. I. confitetur: *Quam suaue mihi subito factum est, carere suauitatibus nuga- rum? & quas amittere metus fuerat, jam dimittere gaudium e- rat. Ejiciebas enim eas a me, Christe Jesu, adjutor meus, & re- demtor meus, vera tu & summa suauitas: ejiciebas, & intrabas pro eis, omni voluptate dulcior, sed non carni & sanguini: omni luci clarior, sed omni secreto interior; omni honore sublimior, sed non sublimibus in se. Jam liber erat animus meus a curis mordacibus ambiendi, & acquirendi, & volutandi, atque scalpendi scabiem libidinum: & garriebam tibi claritati meæ, & diuitiis meis, & saluti meæ, Domino Deo meo.* Conferatur CHEMNITIUS, de Viribus Humanis seu Libero Arbitrio cap. VII. commen- dans conuersionis hujus Augustinianæ exemplum, & conquerens, plerosque non experiri veram cordis muta- tionem, atque hinc de rebus ignotis multa inextricabilia colli- gere. Est manetque res necessario inextricabilis, si quis, vana  
de



de gratiæ statu præsumptione captus, statuatur juxta sensum suum, propter carnem, concupiscentiam & peccatum, partem legis postremam non posse fieri; & tamen audiat e Scripturis, Spiritum, charitatem, gratiam dominari in fidelibus, vitam in iis spiritualem efficacem, & præcepta ipsis facilia esse, ita, ut integri reddantur, stabiliantur, roborantur, fundentur. Idem, si sibi ipse consentiat, quomodo judicare poterit, primum modo & ultimum excipi, quæ non seruentur; quum meminerit, eandem propensionem ad malum, quæ aduersatur decimo, aduersus alia maxime adhærere sibi, peccatumque idem ubiuis residuum, facere, ut par omnium ratio haberi debeat? *quisquis namque totam legem seruauerit, lapsus uero fuerit in uno aliquo, factus est omnium reus.* Jacob. II, 10. At uero, si quis ipse cum Augustino in regnum Dei per angustam portam ingressus fuerit, fruens *justitia, pace & gaudio in Spiritu S.* Rom. XIV, 17. hic non modo certamen Spiritus contra carnem, sed etiam fidei victoriam expertus, ipso usu animaduertit, plurimum differre concupiscentiæ *mortificatæ* reliquias ab ejusdem pristino jugo, & nouum Spiritus dominium veram mandati decimi esse indolem, concupiscentem meliora omnia. Potest quidem hic etiam dubitare, tentationibus præter voluntatem recrudescentibus, sitne sanitas *spiritualis* secundum Legem integra: mox tamen obseruabit, non lacerari illam, sed fidei exercitio manere victorem *Spiritum potentia, charitatis ac moderationis*; 2. Tim. I, 7. atque hinc gratiam, cujus *gradus* quouis peccati sensu aliquantum minuitur, facile confirmari. Conf. sup. pag. 33. 35. 37. Neque ideo cum Tridentino Concilio Sess. V. sentiendum, ac si *hæc concupiscentia ab Apostolo non appelletur peccatum, quod uere & proprie in renatis peccatum sit.* Recte



Synodus illa dixerat; *concupiscentiam AD AGONEM relictam esse, nec iis, qui non consentiant, sed viriliter per Christi Jesu gratiam repugnent, nocere; quin immo, qui LEGITIME certaverint, CORONARI.* Unde poterat concludere, quod instaurata Legis indoles in talibus prauo affectu *inuoluntario* nusquam diuellatur, neque hujusmodi peccatum iis mortem *spiritualem actu* inferat, siue auferat omnem gratiam, nec etiam *peccatum consummatum* sit; Jac. I, 15. non autem, quod non verum sit peccatum. quidni vero & hoc sequatur? ratio, si requiratur, hæc est; quod illa gratiæ, & *justificantis & sanctificantis*, permanens neutiquam ex peccati istius, sed *pacti Evangelici* natura oritur. Quicquid Legi haud congruit, *avopla* & peccatum est ipsisimum. Quando igitur in homine, perseveranter renato, bina sunt *agendi principia*, *spiritus* dominans, *caro* efficiens; illud secundum legem, hoc contra legem: affectiones carnis depravatæ, tanquam peccata, non possunt virtutes, nec medium quiddam fieri. Cui malo tam felicem attulit medelam Pactum Evangelicum, ut ipsum id simul in bonum traduxerit. Nam spiritum regenerationis, hoc est, imaginem Dei in lapsis, vere ad Deum reuersis, denuo accensam, Euangelium ex merito Christi instruit eis viribus, ut ex impetrata fidei victoria solus ille in animo regnet, viuat, militetque ita aduersus peccatum, ne hoc plene possit *concipere*, (*peccatum concipit, quando mens & voluntas in id consentiunt, quod praua concupiscentia faciendum suadet*: BROCHMAND. in Jac. I, 15.) nedum *parere*: interea carnis corruptela tam certe quidem peccatum est, ut *mors*, ejus effectus, etiam *dominetur* his, *qui non peccarunt ad similitudinem transgressionis Adami consummatæ*; (ibid. ex Rom. V, 13.) sed lues tam pestilens iusta est, filiis Dei victoribus, Deum



*Deum diligentibus, inservire ad bonum persequendum*, Rom. IIX, 28. ita omnino, ut malo stimulo hi tanto ardentius concitati, ad τὸν ἀγῶνα τὸν καλὸν decertandum, 2. Tim. IV, 7. a Spiritu Christi ex gloria in gloriam transformentur. 2. Cor. III, 18. Quamobrem caute ex Scriptura est reputandum, quod propterea renati nec facere peccatum, sed tantum habere, atque eatenus peccare dicantur. Adhibeamus hic HORNEIUM, qui *Disp. Theol.* part. II. p. 499. postquam accurate diuersissimam impiorum & sanctorum conditionem præmisit, ad objectionem ex Joh. I, 8. respondet; aliud apud Johannem esse, peccatum habere, & aliud, peccatum facere. „Et habet adhuc illud, inquit, in quo pronitas & procliuitas ad peccandum nondum prorsus extincta est: atque ita omnes sancti, dum in hac vita sunt, peccatum habent. Peccatum autem facit is, qui peccato operam dat, & cupiditatibus carnis suæ consentit & obsecundat. Id autem non competit sanctis: nam qui Christi sunt, carnem crucifixerunt cum affectibus & cupiditatibus. Gal. V, 24. Similiter carnales adhuc sunt renati, & quod ad carnem attinet, venundati sub peccatum, quatenus carnis imbecillitatem adhuc circumferunt, & cupiditates ejus ita exuere non possunt, ut nullos ejus stimulos sentiant: carnales tamen non sunt ita, ut quæ carnis sunt, sapiant, aut opera ejus probent ac peragant. Unde habitat quidem in iis peccatum, sed non regnat in mortali eorum corpore, ut auscultent ei in cupiditatibus corporis. Rom. VI, 12. Belligerat denique lex illa membrorum (carnis & affectuum ejus contumacia) aduersus legem mentis (pietatis & virtutis studium, quod est in eis,) & captiuos reddit, (reddere conatur, quantum in ipsa est,) eos peccato; sed Dei gratia facit in Christo Jesu, ut id illis non noceat, nec damnabile sit, modo non  
secun-



„*secundum carnem, sed secundum spiritum ambulent*, i. e. cupiditatibus illis non succumbant, sed *per Spiritum vitæ*, quem in Christo Jesu acceperunt, eas superent. Et sic constat, unde facultas illa nouæ vitæ instituendæ in iustificatis & renatis existat. Quæro & obsecro: cur Johannes affirmat, in luce ambulantes peccatum habere; negat eosdem peccatum facere? Nam, quid habeant, ex *naturæ* statu; quid committant, ex *voluntatis* proposito, censendum est. Jam vero, quamdiu filii Dei sunt, *Spiritum Christi* non modo *habent*, sed ipso etiam solo *aguntur*, *viuunt ac ducuntur*, nec quicquam destinant, nisi ex illo: Rom. II, 8. 14. Gal. V, 18. 25. *Spiritu vero ambulantes concupiscentiam carnis nequaquam faciunt*. v. 16. Ergo faciunt adhuc legem, cujus indolem nacti retinent, tuentur, ea veritate, ut, quo magis *motiones carnis* sentiunt, eo minus decipiant se, ac si peccata non essent, multoque acrius ab iis, nullo modo faciendis, abhorreant; Rom. II, 13. *AMANTES* constanter Deum, *ODERINT MALUM*, Psa. CXVII, 10. *adhæreantque bono; nec vincantur a malo, sed vincant malum per bonum*, Rom. XII, 9. 21. Ita sane, manente licet concupiscentia & peccato, sunt manentque illi factores legis, nec redacti sub legem, perstant in Lege, *ἐν νόμῳ*, Christo; 1. Cor. IX, 21. ut omnium virtutum totiusque legis possessores, pauperes spiritu, recte nominentur, *semper renouati mentis spirita, induentes nouum hominem, qui secundum Deum creatus est in iustitia & sanctitate veritatis*. Eph. IV, 23, 24.

Ita nec status gratiæ cum peccati statu, ut fieri plerumque solet; nec præsentis vitæ spiritualis ratio inchoata, cum gloria coelesti confunditur: id quod *Staphylus* quidam de CALVINO, talia differente, criminatus fuerat; cui hic bene respondet *Instit.* l. III. c. III. minime illud fieri, dum



imaginem Dei ex Paulo interpretetur sanctitatem & iustitiam veracem, quasi vero, ubi res aliqua definitur, non querenda sit ipsa INTEGRITAS & PERFECTIO. neque tamen locum negari incrementis. Similiter Augustinus Epist. XXIX. Cur ergo non dicimus, qui hanc virtutem habet, habere omnes, cum plenitudo legis sit CHARITAS? An, quanto magis est in homine, tanto magis est virtute præditus? quanto autem minus, tanto minus est virtus, quia ipsa est virtus: et quanto minus est virtus, tanto majus est vitium? Ubi ergo illa plena & perfecta est, nihil ex vitio remanebit. Proinde mihi videntur STOICI falli, quia PROFICIENTEM HOMINEM IN SAPIENTIA NOLUNT OMNINO HABERE SAPIENTIAM, sed tunc habere, cum in ea omnino perfectus fuerit: non, quia illum profectum negant; sed, nisi ex profundo quodam emergendo repente emicet in auras Sapientie liberas, nulla ex parte esse sapientem. Sicut enim nihil interest ad hominem præfocandum, utrum aquam stadiis multis super se habeat altam, aut unum palmum aut digitum: sic illos, qui tendunt ad Sapientiam, proficere quidem dicunt, tanquam ab imo gurgite surgentes in aërem; sed nisi totam stultitiam, velut opprimentem aquam, proficiendo velut emergendo euaserint, non habere virtutem, nec esse sapientes. Ubi autem euaserint, mox habere totam, nec quicquam stultitie remanere, unde omnino ullum peccatum possit existere. Hæc similitudo, ubi stultitia velut aqua, & sapientia velut aër ponitur, ut animus a præfocatione stultitie tanquam emergens in sapientia repente respiret; non mihi videtur satis accommodata nostrarum Scripturarum auctoritati. Sed illa potius, ut vitium vel stultitia tenebris, luci autem virtus & sapientia comparetur; quantum ista similia de corporalibus ad intelligibilia duci possunt. Non itaque sicut de aquis in aërem surgens, ubi earum summum transierit, repente quantum sufficit inspiratur; sed, sicut de tenebris in lucem procedens, paula-



*paulatim progrediendo illuminatur. Quod donec plenissime fiat, jam eum tamen dicimus tanquam de abditissima spelunca egredientem, vicinia lucis afflatum, tanto magis, quanto magis propinquat egressui: ut illud, quod in eo lucet, sit utique ex lumine, quo progreditur; illud autem, quod adhuc obscurum est, sit ex tenebris, unde egreditur. Itaque & non justificabitur in conspectu Dei omnis viuens: & tamen justus ex fide viuit. Et induti sunt sancti iustitia, alius majus, alius minus. Et nemo hic viuit sine peccato, & hoc alius magis, alius minus: optimus autem est, qui minimus. Nesciebant Stoici, veram sapientiam, veluti lucem, infundi in animos superne, *ἀνωθεν*. Iac. III, 17. Lux hæc supernaturalis quid aliud, quam ipsa Lex est; vel, si malis, anima Legis & vita? quæ ubi victoriam obtinuerit, quicquid residuum fuerit concupiscentiæ, aliquem demere gradum legis, partem non potest. Expergefacto, & surgenti e mortuis, non impedimento sunt noctis reliquiæ, quin Christus ipsi illucescat. Eph. V, 14. quæ primi & ultimi præcepti forma est. Nec caput serpentis propterea non totum conculcatum manet, quod læsio calcis insequitur; quam potius occasionem fieri ad potentiam maiorem capeßendam, Euangelium commonstrat. Sicut fieri consuevit antidotum, etiam de serpentibus contra venena serpentum. Quid est ergo 2. Cor. XII. *sufficit tibi gratia mea; nisi, ne deficiendo succumbas sub colopho angeli Satanae?* Et quid est: *Virtus IN INFIRMITATE PERFICITUR*; nisi, quia in isto loco infirmitatis hætenus perfectio potest esse virtutis, ut, in ipsa infirmitate præsentem elatio reprimatur? August. ad Bonif. lib. III. cap. VII. Optime Lutherus in cap. V. ad Gal. *sancti sumus sanctitate passiva, non actiua. ignis diuinus, sanctitas: eædem partes Decalogi, quæ primo gratiæ operantis gradu implentur, (nec plures, aut pauciores, hoc est, omnes,) admittunt quoque secundum, at-*  
que*



que alios; vel eosdem amittunt. qui vero ardor non omnia præcepta vere occupat, *hypocriticus* est, nullus est. Utrumque ergo Spiritus Sancti enunciatum, quod in uno Johannis Epistolæ contextu habetur, consensu gaudet, immoto ac conspiratione inuicta: cap. I, 8. *SI DIXERIMUS, NOS PECCATUM NON HABERE; NOS IPSOS FALLIMUS, ET VERITAS IN NOBIS NON EST.* quo inhæsiua graduum perfectio de hac vita negatur. Et cap. II, 4. *QUI DICIT, NOVI DEUM, ET MANDATA EJUS NON SERVAT, MENDAX EST, ET IN EO VERITAS NON EST.* quo integra partium perfectio sanctis vindicatur. atque additur: *QUI AUTEM SERVAT SERMONEM EJUS, VERE IN HOC CHARITAS DEI ADIMPLETA EST: PER HOC SCIMUS, NOS IN IPSO ESSE.*

### OBJECTIO III.

*Abstinendum ab eo dicendi genere; quippe quod laboret æquiuocatione, & improprium sit.*

### RESPONS. AD I.

**N**Os vero testamur iterum iterumque, non de verbo nos, sed de re laborare. Ne rem perderemus, adhibita est loquendi ratio: quæ, tantum abest, ut *æquiuocationem* inferat, ut non aliam ob causam, quam ad tollendam ex Ecclesia, & a perfectionis doctrina, ipsam *æquiuocationem*, introducta sit, atque etiam nunc usurpetur. Quum enim *Romanenses* mirum in modum abuterentur perfectionis vocabulo, petito e Scripturis sanctissimis; una ex parte in rebus plane aliis, quam in quibus inueniri potest, eam quærentes; qua de re tantopere conqueritur *Aug. Confess. Artic. XVI. & Abus. VI. ejusdemque Apologia* sæpius: ex



altera autem, fingentes talem, quæ Legi omnibus numeris satisfaceret: (cujus utriusque erroris periculum modo laudata *Speneriana Præfatio in de Templo Salom.* fusius exponit) non poterant salua conscientia Nostrates deferere Perfectionis veritatem, sed conabantur illam ambiguitate, quatenus illata errabant aduersarii, fideliter liberare; accommodantes ad id distinctionem, quam rerum natura aptissimam monstrabat, inter ea, quæ vel a partibus integrantibus, vel a gradibus altioribus, *perfecta* dicuntur. *conf. supra Cap. i. §. III.* Addimus insigne in hanc rem testimonium Wilhelmi NIGRINI, Tractatu de Legis impletione, Rob. Bellarm. Gregorii de Valentia, Mart. Becani, Francisc. Costeri, aliorum Romanensium erroribus & strophis opposito *Wittenb. a. 1617. p. 680.* Duplex datur perfectio, una dicitur inchoationis, vel ut aliis placet, perfectio partium; altera consummationis, seu perfectio graduum. Nostra sententia hæc est, quod, quemadmodum renouatio fidelium, in mortificatione carnis consistens, perfecta est, non saltem ratione Dei operantis & acceptantis, verum etiam quodammodo ratione subiecti, nimirum respectu inchoationis: ita & legis impletio, quæ a renatis in hac vita proficisci potest, perfecta queat nominari ratione inchoationis seu PARTIUM, non vero ratione consummationis seu graduum; qualem tamen perfectionem lex in rigore suo exigit. Romanensibus autem, qui contrarium tenent, & perfectione inchoationis non contenti, consummatam insuper seu completam legis perfectionem jactitant, incumbit, ut hypothesein hanc suam firmis argumentis demonstrent, priusquam ad textus Apostolicos eam applicent. Deinde pag. 693. ad argumentum hoc: Quicumque possunt esse perfecti, illi & perfecte possunt diligere, (caritas enim est vinculum perfectionis) & consequenter præcepto adimplendo satisfacere; At qui fideles possunt esse, imo di-



cuntur perfecti in Scriptura; Ergo possunt tam perfecte diligere, ut legi satisfaciant: Responsionis Augustinianæ sensum hunc aufert; committi in argumento Fallaciam *AEQUIVOCATIONIS*. Perfectio enim, pergit, duplex est; alia absoluta, *VULGO* vocatur perfectio graduum, quæ summum illum obedientiæ gradum, quem lex requirit, integre præstat. Alia vero respectiva & conditionata. *VULGO* perfectio partium dicta, quæ est sincera illa fidelium secundum *TOTAM* legem obedientia summo conatu in hac vita inchoata, quæ lex perfecte non adimpletur. &c. En, cur Stantibus adjudicata sit perfectio partium! Hac ipsa scilicet appositione remouetur *æquiocatio* a perfectione, quam fidelibus sacræ litteræ adscribunt.

Quid vero, si altera dictio, qua appellata eadem est *inchoata*, videatur sufficere? Videtur quidem; sed non sufficere eam vitandæ ambiguitati, vel experientia documento fuerit, cum malint facile nonnulli inchoatam dicere, quam dicere partium perfectionem. quam ob causam, quæso? non, ob fugiendum sensum ambiguum, quem locutio hæc, apposito restricta vocabulo, alteri de gradibus eo distinctius opposita, multo magis amolitur; sed propterea, quod opinio de aliquibus præceptis excipientis, sub *inchoata* abscondi potest, neutiquam vero sub mentione *partium*, quarum perfectio mandatum nullum exclusum esse patitur. Atque hoc, inquam, momentum est gravissimum, cujus causa iste loquendi modus non deferendus, quem a *Reformationis* tempore usque ad hunc diem Ecclesia Evangelica tenet prudentissime. Et quid denique supersit ambiguitatis in eo, qui contra *æquiocaciones* ipsas receptus est? Absoluta sub isto accipi non potest perfectio; quandoquidem non alius ejus usus, quam quod partes gradibus opponantur. Partes autem præcepta de-



notare, tam notum existit, ut nec *Latine* aut *Germanice* exponantur illæ seu reddantur aliter, nisi de mandatis *decalogi*. Sin propter rudiores *æquiocatio* formidatur; ne ulla quidem fuerit doctrinæ Christianæ pars, de qua non idem metuendum, si vel nulla, vel praua, rerum ad salutem necessariarum, informatio animis sit antecepta. Nihil *æquiocati* in descriptione illa BALDUINI, cui super 2. Cor. VII, 1. perfectio est partium seu *integralis*, qua quis secundum OMNIA mandata Dei facit, quantum per Spiritum Dei in hac infirmitate potest. Fundamentum vero hæc verba ponunt in Spiritu Dei, secundum præcepta omnia Fidelibus collato. Fatemur, idem significari, quando *Apologia August. Confess.* illud Jerem. XXXI, 33. *dabo legem meam in corda eorum*: sæpissime interpretatur, de impletione legis *INCHOATA*; neque enim lex impletur ullo vere modo, nisi tota. Neque aliud dicunt reliqua de perfectione loca in libris *Symbolicis*, quorum præcipua sunt: Aug. Conf. Art. XVI. *Euangelicam PERFECTIONEM collocandam esse in timore Dei & fide: quia Euangelium tradit iustitiam æternam cordis. Abus. 6. PERFECTIONEM christianam esse; serio timere Deum, & rursus concipere magnam fidem, & considerare propter Christum, quod habeamus Deum placatum; petere a Deo & certo expectare auxilium in omnibus rebus gerendis juxta vocationem. Interim foris diligenter facere bona opera, & servire vocationi. In his rebus VERAM esse PERFECTIONEM, & verum cultum Dei. Apolog. de dilect. & Implet. Leg. p. 134. In his rebus PERFECTIONEM Christianam & spiritualem ponendam, si simul crescant poenitentia & fides in poenitentia. Quod ipsis antecedentibus sic declaratur: Ideo regeneramur & Spiritum sanctum accipimus, ut nova vita habeat nova opera, novos affectus, timorem, dilectionem Dei,*



Dei, **ODIUM CONCUPISCENTIAE** &c. Hæc fides, de qua loquimur, existit in poenitentia; & inter bona opera, inter tentationes & pericula confirmari & crescere debet; ut subinde certius apud nos statuamus, quod Deus propter Christum respiciat nos, ignoret nobis, exaudiat nos. Hæc non discuntur sine magnis & multis certaminibus. Quoties recurrit conscientia, quoties sollicitat ad desperationem, cum ostendit, aut vetera peccata, aut nova, aut immundiciem naturæ? Hoc chirographum non deletur sine magno agone, ut testatur experientia, quam difficilis res sit fides. Et dum inter terrores erigimur, & consolationem concipimus, simul crescunt alii motus spirituales, notitia Dei, timor Dei, spes, dilectio Dei; & regeneramur, ut ait Paulus, ad agnitionem Dei. & intuentes gloriam Domini, transformamur in eandem imaginem, id est, concipimus **VERAM** notitiam Dei, ut **VERE** timeamus eum, **VERE** confidamus nos respici, nos exaudiri. Hæc regeneratio est quasi inchoatio æternæ vitæ, ut Paulus ait: si Christus in nobis est, spiritus vivit, corpus autem mortuum est &c. Et superinduemur, si tamen induti non nudi reperiemur. Ex his judicare candidus lector potest, nos maxime requirere bona opera, in quibus **PERFECTIONEM** ponimus.

**Item de Vot. Monast.** Quia regnum Dei est justitia & vita in cordibus, ideo **PERFECTIO** est, crescere timorem Dei, fiduciam misericordiae promissæ & curam obediendi vocationi; sicut & Paulus describit perfectionem, transformamur a claritate in claritatem, tanquam a Domini Spiritu. Quid pulchrius aut planius, quam cum ita *August. Confess. & Apologia* locis, quam plurimis perfectionem ponunt in officiis Christianis, & præcipue in **MOTIBUS CORDIS**! Namque *Apologia*, affirmans, his legem **VERE** fieri, inchoari in vobis, & subinde magis magisque fieri legem; & complectens simul utrumque, videlicet spirituales motus & externa bona opera; p. 83, 84, 85. nullum excipit



cipit præceptum Decalogi, juxta quod lex fieri non pos-  
 sit: accusat illa potius Aduersarios, tanquam *suaues Theo-*  
*logos, tantum opera secunda tabulae externa intuentes;* docens,  
 circa legem faciendam spectanda esse, *quae sunt PROPRIE*  
*legis diuinae, hoc est, affectus cordis erga Deum, qui præcipiun-*  
*tur in prima tabula, nec posse fieri sine Spiritu Sancto: conside-*  
*randa illam æternam legem, & longe positam supra omnium*  
*creaturarum sensum atque intellectum: Diliges Dominum Deum*  
*tuum ex toto corde. p. 84.* Enim vero, si hæc ipsa æterna  
 Lex inchoatur, & in renatis fieri potest, cum contigit *Spiri-*  
*tus Sanctus:* ibid. & pariter sine omni dubio inchoantur eti-  
 am affectus, qui præceptis ultimis postulantur, *odium con-*  
*cupiscentiae, &c.* ut eadem loquitur; certe sine ambiguitate  
 dicitur idem, quod perfectio partium designat. Interim  
 quando hæc noua obedientia appellatur *justitia inchoata,*  
 factum astu Satanæ, iis omnibus quasi non scriptis, ut post  
*Reformationem Euangelicam,* abuterentur aliqui tum hostes,  
 tum etiam ciues Ecclesiæ, optimo illo *epitheto;* præsertim  
 quum aliquando satis recte additum sit, *INCHOATAM per-*  
*fectionem procul abesse a perfectione, qua Legi possumus satisfac-*  
*re:* quasi vero, quod a perfectione graduum procul abest,  
 non possit constare partibus integris. Unde Majores  
 tam illorum peruersis cauillationibus, quam defidiosis  
 horum excusationibus obortis occurrebant, ex veri-  
 tate rei commonentes; licet negarent, in perfectio-  
 ne *gradus* attingi, quibus Legi satisfaceret, nequaquam se  
 tamen negare integritatem *partium.* Ita ergo deleta *equi-*  
*uocatione,* tam liquidæ distinctionis usus, & communis &  
*VULGARIS,* sequebatur; de quo, tanquam *non recente,* sub  
 initium *superioris seculi,* supra adductus *Nigrinus* testimoni-  
 um perhibet.



## AD II.

**I**MPROPRIMUM esse dicendi genus, *Perfectionem Partium*; rei natura non minus refutat. Modo percepimus, *Apologiam Aug. Conf.* confiteri, quod, quæ *PROPRIE* sint legis diuinæ, a re generatis *VERE* fiant: neque excipi de his quidquam poterit, nisi aliquid graduum, ut demonstratum est. Ea ipsa, & *veram perfectionem* esse in Christianismi partibus, aperte profitetur, ut vidimus. Aut dubitabimus, infantem, ratione partium habita, perfectum hominem dici *proprie*? Nec enim minus recte ac *vere perfectio partium* est, ubi harum integritas reperitur; quam *perfectio graduum*, ubi gradus non desunt. Auctor hujus in dicendo veritatis, ad diuina translatae, ipse est Apostolus Eph. IV, 14, 15. *Ne simus amplius νήπιοι, paruuli; sed crescamus in Christum OMNIA, τὰ πάντα (μέρη.)* Si debent renati in omnibus partibus, ut recte B. Lutherus vertit, adolescere; partes omnes ex regeneratione adsint, oportet. conf. 1. Petr. II, 2. Quod etiam collustrans mente beatissimus MACARIUS, Patrum Ecclesiæ primorum decus, Libro de *Patientia & discretionem*, Cap. XI. XII. scribit: *Aliquo respectu etiam illa ipsa per Sanctum Spiritum generatio imaginem PERFLECTIONIS habet, & in forma, & in membris; non tamen (gradibus) virtute, aut mente, aut fortitudine.* Atque iterum: *Quod per Spiritum gignitur, modo quodam, ut ostendimus, perfectum est. Sicut aliquem infantulum recens natum, suo modo esse perfectum dicimus, ἐν τῷ τὰ μέρη πάντα τῆς ὁλότητος ἀποσώζειν*, in eo, quod ipsas partes omnes ipsius integritatis (*totalitatis*) saluas exhibeat. Cum habeant ergo singulas atque omnes Legis, ad quam regenerati sunt, partes vere pii, hæc partium perfectio non *improprie*, sed prorsus *proprie* appellatur.



Nec ab eo, quod inter status naturalis & spiritualis perfectionem est similitudo, hanc minus *propriam* censere licet; utrobique enim sunt veræ partes, in diuerso rerum genere adæquatæ cum toto suo: cuiusmodi comparatio neutrum ex duobus *improprie dictum* sistere potest.

Præmissimus initio, quam solícite B. CHEMNITIUS agat in hac causa. Idem stans in acie contra *Andradium*, qui perfectionem, quæ sine peccato esset, huic tribuebat vitæ; ad objectiones, de perfectione renatorum, ex Scriptura S. & Patribus petitas, non respondet, hanc improprie dici de illis: ut alioqui facere solent, qui contradicunt, de via deflectere: sed in eo est, ut ostendat, quantopere aduersarii has sententias deprauent. *Non est questio*, inquit, *an renati habeant charitatem, & incipiant facere legem; hoc enim concedimus & docemus: sed questio est, an charitas renatorum in hac vita sit integra, perfecta & absoluta. Item: an PERFECTA obedientia satisfaciat legi.* Hinc probat omnino dicta Augustini ad Bonifacium lib. III. c. 7. Obedientiam renatorum perfectam dici posse pro statu viatoris. Ibidem: secundum hominis mortalis capacitatem, & pro huius vitæ modulo, perfecti sumus. Cuiusmodi est etiam, quod porro illic sequitur: *Qui nondum habebat magnam illam iustitiam, quam capit æqualitas angelorum; & propter illam, quæ jam inerat, perfectum: & propter istam, quæ adhuc deerat, imperfectum se esse, dicebat.* Conferantur plura ad Augustinum de Gratia cap. XLIX. XLIX. & de perfectione Iustitiæ. Ad vitandum autem abusum horum & similium omnium, planam responsionem subnectit, quæ tribus distinctis rem momentis diiudicat: *Hoc modo mandata Dei non sunt graua. Primo, quia sunt Dei filii, quæ ipsi est inchoata nouitas, seu integra partium perfectio. Secundo, quia ducuntur Spiritu Dei, quo gra-*  

dus



dus aliqui referri etiam possunt, a quibus perfectio vocatur *comparativa*. Tertio, quia, quicquid non fit, propter Christum ignoscitur: sicut Augustinus inquit. ne perfectio graduum fingatur. Et statim addit: Hoc etiam modo renati dicuntur perfecti, Philip. III. & 1. Cor. II. imputatione scilicet & inchoatione. vid. Exam. Concil. Trident. De Bonis Operibus Quæst. III. ubi, circa finem, argumentum libri Augustiniani, de perfectione justitiæ, scripti contra Coelestinum, pari sollicitudine contra Andradium sic definit: In eo libro docet, in hac vita neminem pervenire ad TANTAM perfectionem charitatis seu inherentiæ justitiæ, ut perfecta & absoluta impletione SATISFACIAT primo & ultimo præcepto, ITA, ut sit SINE PECCATO. Similiter passim illis, qui per Spiritum Sanctum renati sunt, haud omnem adimit perfectionem, sed, cum appositione eam, QUAE SINE PECCATO SIT, UT SEVERITATEM DIVINI JUDICII SINE REMISSIONE PECCATORUM SUSTINERE POSSIT: quam, qui vis intelliget, esse graduum, non partium.

## OBJECTIO IV.

*Rectius dici; perfectionem Fidelium sitam in eo, ut imperfectionem suam agnoscant.*

## RESPONS.

**O**pponuntur, non opponenda. Rectius vero dici, urgemus, perfectionis PARTEM esse, agnoscere imperfectionem suam. Nam Patres non ita dixerunt: Perfectio est, imperfectionem agnoscere: sed ita; Perfectionis PARS



est, imperfectionem agnoscere. Ipse celebratus CHEMNITIUS, loco adducto, hac de re perspicue pergit: *Augustinus ad Bonifacium lib. 3. c. 7. diserte declarat, quomodo perfectionem viatoris intelligi velit, cum inquit: Virtus, quæ nunc est in homine justo, hætenus perfecta nominatur; ut ad ejus perfectionem pertineat, ETIAM ipsius imperfectionis & in veritate agnitio, & in humanitate confessio.* Tunc enim secundum hanc infirmitatem pro suo modulo perfecta est ista parva justitia, quando ETIAM, quid sibi desit, intelligit. Ita Apostolus, perfectum & imperfectum se esse, dicit. GERHARDUS Loco Theol. de Lege Dei, postquam ipsam perfectionem partium descripsit, serium ac sincerum studium obediendi Deo, secundum OMNIA ejus præcepta, etsi aliquid desit respectu graduum; addit: *Hanc perfectionem renatis tribui, non diffitemur: & pergit, de ipsa illa recte usurpari illud veterum: Perfectionis pars est, imperfectionem agnoscere.* Et in Genes. ad illud: *Noah vir perfectus:* adhibet differentiam inter perfectionem partium & graduum, illam viæ, hanc patriæ. Ubi inter cetera & his verbis utitur: *Illius (partium seu viæ) perfectionis pars est, imperfectionem agnoscere.* idque tam hic, quam illic probat ex Phil. III, 12. Ubi Paulina perfectio duabus partibus constat: tum priore, ut cognoscat Christum, & vim resurrectionis ejus, & communionem ejus per passionum; non solum theoretice, sed multo magis practice: quod indicat Apostolus, subjungens, *ita ut conformis fiam morti ejus, si quo modo occurram ad resurrectionem, quæ est ex mortuis.* tum posteriore, quod agnoscat, se nondum apprehendisse, vel affecutum esse finem. Maximo-pere autem notandum una est; Paulum in secundo hoc momento non tam perfectionem suam, quam modo hujusmodi ejus partem ponere, qua, tanquam *secundaria*, eo acrius ipse excitetur ad *primariam*, in vero implendæ Legis



gis negotio versantem, excolendam. Cohærent enim sic verba Apostolica: *Non quod jam apprehenderim, aut jam assecutus sim finem (graduum): sed PERSEQVOR, an quoque apprehendam, cujus etiam rei causa apprehensus sum a Christo Jesu.* Quam totam, bimembrem suam sententiam, Paulus confestim eodem nexu repetit: *Fratres, ego me ipsum non arbitror metam comprehendisse. Vnum autem ago: ea quidem, quæ a tergo sunt, obliuiscens; ad ea vero, quæ a fronte sunt, contendens; juxta scopum PERSEQVOR, ad præmium supernæ vocationis Dei, in Christo Jesu.* Atque hinc concludit: *Quotquot itaque PERFECTI sumus, hoc sentiamus.* Neque alia fuit methodus Vet. Testamenti, quam ut sapientia ex defectuum agnitione ardentior redderetur. *Syrac. c. LI, 19, 20, 21. Decertavit anima mea in ipsa, & in praxi famis accuratus fui. Manus meas extendi in altum, & IGNORANTIAS ejus LUXI. Ipsam animam meam hinc direxi ad eam, cor possedi cum ipsis ab initio, & in puritate inveni eam: propter hoc non derelinquar. Et venter meus perturbatus est ad querendum eam: propter hoc possedi bonam possessionem.* Quod quidem minime videntur sentire, qui imperfectionis agnitionem, non partem veræ perfectionis aliquam, sed ipsam nescio quam perfectionem interpretantur. Duo sane ad quamlibet renouationem requirenda: *malum exterminare, & recipere novitatem spiritus.* Rom. VI, 2, 3, 4. VII, 6. VIII, 10. Nec admirari satis possumus, quam fideliter *Apologia Aug. Conf.* utramque partem doceat semper, ut in exemplo sub *Object. III.* prolixiori apparet; quomodo ex imperfectionis agnitione, si vera sit, noui motus cordis spirituales redundant, vere inchoatæ perfectionis seu spiritus fructus. Et quanquam bona opera, pag. 95. ait, in carne fiunt nondum prorsus renouata, quæ retardat motus Spiritus Sancti, & asper-



git aliquid de sua immundicie: tamen propter fidem sunt opera sancta, diuina, sacrificia & politia Christi, regnum suum ostendentis coram hoc mundo. **IN HIS enim SANCTIFICAT CORDA, & REPRIMIT DIABOLUM;** & ut retineat Euangelium inter homines, foris opponit regno Diaboli confessionem Sanctorum, & **IN NOSTRA IMBECILLITATE DECLARAT POTENTIAM SUAM.** At vero, cui hæc non adsunt, is cæcus est, nihilque vere cernens, **OBLITUS**, sese a veteribus peccatis suis fuisse purgatum. 2. Petr. I, 9. id est, tam alienus a perfectione, quæ sit in agnitione imperfectionis, ut, hæc quid sit, sibi utut videatur scire, juxta cum ignaris calleat. Quamobrem usum ejus dicti a nocentissimo abusu liberat *Augustinus*, de Spiritu & lit. cap. ult. monens: *Per hoc* (præceptum de dilectione Dei & proximi) *quantum mihi videtur, in ea, quæ PERFICIENDA est justitia, multum in hac vita PROFECIT ille, qui, quam longe sit a PERFECTIONE justitiæ, PROFICIENDO cognouit. Proficiendo, inquit; non, deficiendo.* Mens *Augustini* est eadem, quæ *Johannis* 2. Ep. v. 8. **ATTENDITE VOS IPSOS, ne perdamus, quæ operati sumus, sed ut mercedem plenam recipiamus.** Huic ardori, ut augeatur, inseruit illa attentio. *Meditat. Saer. Gerhardi* XXVII. idem habet. *In via Domini aut proficimus, aut deficiamus. Singulis ergo diebus vitam tuam examina, an in pietatis studio proficias, aut deficias. Stare in via Domini, est retrogredi: non ergo te delectet, in cursu pietatis stare; studeas autem semper, in via Domini ambulare.*

Fructus Redemptionis est duplex. Gratia Jesu Christi, seu promissio Euangelica, non una, sed gemina est; Remissionis peccatorum, & virium Spiritus Sancti. Nemo illam sine hac potest; neque hanc sine illa, vere habere. Illa, hujus fundamentum; hæc, illius documentum. Obluiscitur status imperfecti salutariter agnoscendi, in ipso



ipso qui temere acquiescit, nec curat firmare integritatem suam. 2. Petr. I, 9, 10. quod dictum Apostoli vix satis hîc commendare possumus.

## COROLLARIUM.

**F**inem huic disquisitioni imponentes, optamus illud unum, ut causa isthæc a quovis dijudicetur non aliter, quam vero LUTHERI hac in re & spiritu & sensu, quem DANNHAWERUS *Hodosoph.* p. 496. commendat ex *Tom. III. Lat. p. 18.* *Lex Spiritus est, quæ nullis prorsus scribitur litteris, nullis profertur verbis, nullis cogitatur cogitationibus: Sed est ipsa viua voluntas, vitæque viua, vitæque experimentalis; res quoque ipsa, quæ scribitur digito solo Dei in cordibus. Rom. 5. charitas Dei diffusa est in cordibus nostris per Spiritum Sanctum. De qua & Hierem. 31. ut ex illo Ebr. 8. adducit Apostolus: dabo leges meas in mentes eorum, & in corda eorum superscribam eas. Hæc, inquam, intellectualis lux mentis, & flamma cordis, est Lex fidei, Lex noua, Lex Christi, Lex Spiritus, Lex gratiæ justificans; OMNIA implens, & carnis CONCUPISCENTIAS crucifigens. Nos enim, Perfectionem Partium defendentes, per eam nihil omnino aliud intellectum volumus, quam id ipsum, quod diuinus Pater allatis illis descriptionibus in homine ex regeneratione ponit. Tollat, oportet, e Scripturis ac renatorum cordibus, ipsum Euangelii Spiritum; vel probet, eum Legi non toti respondere, seu reddere, QUOD LEGIS est; (QUANTUM, quærere, jam nihil attinet:) si quis usitatam partium perfectionem integram ex Theologia sublatum eat. Hoc unum qui obseruarit, nec Scripturæ S. dicta, nec rationes ullas aduersus ipsam pugnare, facillime animaduertet. Partes Legis a regenito durante cunctas seruari, nulla veritas*



ritas negabit usquam: quicquid videbitur contrarium in Scriptis *Biblicis*, vel non dictum fuerit de *Stantibus*, ut *talibus*; quemadmodum illud Rom. VII, 7, 8, 9. respiciens statum pristinum, indicatum etiam v. 5. vel, si de iis accipi quiddam posse statuatur, non euertet integritatem *partium*, sed *graduum*: sicut ibidem v. 20, 21. nemo *orthodoxorum* sentit, agi de peccato prorsus dominante: multo minus e toto illo capite extorquere quisquam poterit hanc mentem, ac si id, *Non concupisces*, opposito regenerationis Spiritu, & inchoata veritate seruari a se posse, neget Apostolus. Nam ut cap. sequ. VIII. ita & Gal. V. rem eandem tractans, increpat: *DICO autem; Spiritu incedite, & concupiscentiam carnis nullatenus perficietis*: v. 19. item, *si Spiritu ducimini, non estis sub lege*; v. 18. & iterum, *Si vivimus Spiritu, Spiritu incedamus*, si modo *crucifiximus carnem cum affectibus & concupiscentiis*: v. 24, 25. quæ singula, identidem ponderanda, Spiritum Gratiae regnantem, præcepti ultimi effectorem esse, pronunciant. Nec Jacobi effata contraveniunt, cum perfectione partium plane conspirantia. *Quicumque enim totam legem servabit, offendet autem in uno, sic omnibus tenetur*, (Cap. II, 10.) ut nullo modo inter *Stantes* reputandus sit amplius, verum ad *lapsos* pertineat, neque ad hanc quæstionem referendus: nam fieri posse, ut perfectus non maneat perfectus, extra hanc causam est. Quod dicit idem cap. III, 2. *In multis offendimus omnes*: hæc de *lapsibus proæreticis* ne sumamus, adducimur auctoritate & ratione Sebast. SCHMIDII, argumentationem rectissime interpretantis *a minori ad majus*; Si nec pii doctores lapsum, saltem infirmitatis, expertes sunt; quanto magis, cum ex turpi ambitione & invidia docere contendunt, contra quos ibi agitur, Spiritu regenerationis dudum expulso,



pulso, in varios malitiæ lapsus incident! Et promiscue quidem τῷ πταίειν uti *Jacobum*, de peccatis *voluntariis* & *involuntariis*, non mirum fuerit, consideranti, *Paulum* Gal. VI, 1. etiam παράπτωμα, quod grandius quid sonat, quam πταίσμα, de tentatis, necdum penitus lapsis, modo certo adhibere. Qui vero nitentur contrà, putantes, de *voluntariis* dici & *mortalibus*; meminerint, neque eo quidquam obtineri, quin fideles, qua *Stantes* manserint, perfectione partium consistant. *Lapsos* etenim, quis *stantes*, vel perfectos, dixerit? Manebit enim certe; quamdiu *Stantes* sint, eos non *proæretice* labi, nec legis partem dissoluere. Quod pergit Apostolus: *Si quis in sermone non labitur, hic perfectus vir est*: vel de perfectione *absoluta*, vel de *inchoata* intelligendum. De *inchoata*, seu partium, id agere, persuadet totus orationis contextus, præsertim in fine capitis, ubi ipsa *partium perfectio* eleganter depingitur: nam iis, v. 8. *linguam domare nullum hominem posse*, agi de natura humana, τῇ φύσει τῇ ἀνορθωπίνῃ, videlicet nondum sanata per regenerationem, monstrant proxime antecedentia. Neque vero illud: *Si quis in sermone non labitur, hic perfectus vir est*; simpliciter de immunitatis apice, sed pro *comparatio* gratiæ statu, positum arbitramur: qua ratione I. Cor. III, 1, 2, 3. II, 6. 15. propter eandem linguæ continentiam, *carnalibus* opponuntur *spirituales* atque *perfecti*. Acceperit autem de *perfectione absoluta*, qui maluerit; sensus tum hic fuerit totus: Si omnes nondum viri plane consummati sumus, vos multo maxime, qui ambitione abrepti estis, affectu isto ad delicta prolabemini. Quo ipso nihil comprehenditur, quod facultatem præstandæ legis, *inchoatam* integre apud fideles, quam nos defendimus, dubiam reddat. Quocunque tandem modo se vertat e-

Q

jus



jusmodi oppositio, vel asseruntur lapsus contra conscientiam commissi, quibus labentes omni legis parte exciderunt, sed non quatenus stantes, nedum perfecti; vel *imbecillitates*, quæ ipsos parte legis nulla funditus priuant, nec tollunt gratiæ integritatem; vel *gradus* negantur, at remanent tamen *partes*. Cujusmodi est Luc. XVII, 10. *Cum feceritis OMNIA, quæ præcepta sunt vobis, dicite: serui inutiles sumus; nam quod debuimus facere, fecimus.* In quæ verba optime *Apologia A. C. p. 132.* *Serui inutiles significant insufficientes, quia nemo TANTUM timet, TANTUM diligit Deum, TANTUM credit Deo, QUANTUM oportuit.* Quocirca ejusdem verbis profiteamur: *Sic sentiendum est de omnibus similibus locis.*

Si autem quidam eo impotentia processerint, ut scribant, *Conuersionis & Renouationis partes*, quæ perfectionem hanc inchoatam efficiant, debere quidem fieri, sed non fieri a *Fidelibus*; aut, bona opera tanquam *fructus Spiritus*, instauratæ in mentibus *salutis*, seu *Christianismi*, esse partes, ausi fuerint negare: quum utrique Scripturæ S. directe contradicentes, ignorent, quid egerint; ad tantam Ecclesiæ illatam injuriam agnoscendam, deplorandam ac delendam, ut permoueantur, Æternam Misericordiam imploramus.

FINIS.

EMENDANDUM.

**P**Ag. 91. l. 28. pro *ultimis* leg. *ceteris*.

DISPU-



# DISPUTATIONIS CONSPECTUS.

## CAP. I. QUAESTIONIS STATUS EXPLICATUR.

§. I. **D**octrinae de Perfectione clavis Chemnitiana.  
Historia Pelagiana.

Simplicior docendi ratio propter abusum mutata in distinctiorem.

Testimonium de sincera prudentia in distinguendo.

§. II. Subjectum quaestionis, Stantes.

Hi dicti a Statu Gratiae.

§. III. Occasio receptae distinctionis inter graduum & partium perfectionem.

Distinctio Pontificiorum peccat in fundamento.

Necessitas distinctionis orthodoxae. Auctoritates.

§. IV. Perfectio Partium respicit omnia & singula Decalogi praecepta.

Horum impletionem perfectam Perfectio Graduum sola exigit.

Consensus Reformationum.

Integralis Perfectionis natura.

Testimonia in eam rem.

§. V. Tractatio non logomachica.

Momentum ejus practicum.

§. VI. Testimonia quaedam generaliora.

## CAP. II. THESIS FIRMATUR, ex principiis duobus.

*Propositio I.* Legis partem nullam deesse fidelibus.

§. I. Lex stabilita in Fidelibus.

§. II. Idem confirmatur Ecclesiae documentis.

Nota. De legis sensu & usu.

§. III. Tota lex in Stantibus stabilita.

Prima difficultas, de Lege spectanda subjective.

Altera, de Legis littera negativa.

Nota. Lex Christi & Moysis eadem.

§. IV. Probat. ex aliis dictis Scripturae S. 1. Serva mandata,

2. Charitas, Legis totius impletio.

3. Sitis perfecti, in nullo deficientes.

*Propositio II.* Legis parte ulla non effecta, gratiam ipsam tolli.

§. I. Gratia, in uno Legis spiritu fita.

§. II. Probat. e dictis Scripturae S.

§. III. Illustrat. per testimonium.

Nota. Fideles charitatem Dei habent passivae.

## THESIS CONFIRMATUR.

§. I. Fidei & charitatis spiritus, Legis forma, in omnibus praeceptis retinetur.

Idque



Idque adeo verum, ut ejus etiam incrementa obtineantur.

§. II. Augustinus, contra perfectionem Pelagianam pugnans, veram non negat, sed commendat.

Testimonia ipsius de supernaturali affectu, quo lex impleatur.

Plura ejusdem, de spiritu vincente carnem in omnibus præceptis, & Legem faciente.

Perfectionis dictio apud August. de Stantibus.

Thesis, ad discrimen Legis & Euangelii necessaria.

§. III. Hypothesis opposita, aduersatur sacris litteris; de Conuersione. Item, de Renouatione.

Thesis obsignatur.

### CAP. III. ANTITHESIS REFELLITUR.

Obj. I. Esse etiam gradus Legis partes.

Resp. Gradus, qui inhæreant Fidelibus, Pactum Euangelicum agnoscit tanquam minus principales.

Testimonia, de perfectione graduum in Christo; & partium in Stantibus.

Obj. II. Partes non omnes seruari: non primam; nec ultimam; dominium Spiritus non sufficere: peccatum haud tolli.

Resp. ad I. Non resiliendum ad gradus: partes substantiales seruari omnes.

Loca imperfectionem arguentia, Thesi non aduersantur.

Conciliantur, quæ vulgo vel de perseverantia, vel de locutionibus usitatis, v. c. *ex parte*; opponuntur.

Ad II. Prima Legis pars a Fidelibus seruatur.

Ad III. Ultima, cum prima & reliquis. Accommodatur indoles perf. partium.

Ostenditur hæc in præcepto primo.

In ultimo eadem reputanda.

Argum. 1. soluitur; quod decimum præc. in seruando non diffellatur a reliquis, sed potius fundamentum iis præbeat.

2. Littera negativa non exhaurit præceptum X.

3. Victoria maxime est præcepti X.

Ad IV. & V. Dominium spiritus vivificum omnia præcepta efficit.

Ad capiendum, quomodo in renatis peccati reliquæ integritatem præcepti ultimi suffocare nequeant, praxis necessaria. Illi, habentes peccatum, non faciunt illud, sed Legem; id ipsum verò sibi inferuire cogunt.

Status peccati cum gratiæ statu haud confundendus.

Obj. III. Locutionem esse æquivocam, & impropriam.

Resp. ad I. adhibita illa potius ad tollendam æquiocationem.

Neque aliæ ambiguitatem æque tollunt.

Ad II. Proprietas explicatur.

Confirmatur.

Obj. IV. Perfectionem potius sitam in agnitione imperfectionis.

Resp. Hanc omnino esse partem perfectionis partium, nec ipsi opponendam.

Redemptionis fructus non inodo Justificatio, sed etiam Sanctificatio.

COROLLARIUM remouet cetera, quæ obstare videri possint.

\*

\*

\*



Breithaupt, Joachim Just,

Joach. Justi Breithaupt ... de perfectione partium tractatio theologica

Hala 1705

4 Diss. 2094#Beibd.29

urn:nbn:de:bvb:12-bsb10828040-8

VD18 14854201-001